

शक्ति शर्मा
श्याम लाल शर्मा

त्रिवेणी

डोगरी भाषा
संस्कृति ते साहित्य

त्रिवेणी

100

PRINTED

(Dogri Sanstha)

त्रिवेणी

(डोगरी लेखें दा संग्रह)

शक्ति शर्मा

श्याम लाल शर्मा

TRIVENI

(Essays in Dogri)

By

Shakti Sharma

Shyam Lal Sharma

❀ प्रकाशक

श्रीपति शर्मा

श्रीपति प्रकाशन, १६५, विजयगढ़ जम्मू ।

❀ आवरण

श्री राममूर्ति कलाकार

कृष्ण नगर, दिल्ली ।

❀

मूल्य



❀

पहली बार १९६१

❀

मुद्रक

आर० सी० प्रिंटिंग प्रेस,

अप्पर बाजार जम्मू ।

समर्पण

अद्धेय डा० सिद्धेश्वर वर्मा जी गी जिन्दे

चरणें विच बइऐ भाषा विज्ञानै दे

बेसम्ब खजाने दी भाती थोई

ते अपनी मातृ-भाषा गी

इस दृष्टि कन्ने

दिखने दी

प्रेरणा

होई ।

त्रिवेणी दी प्रस्तावना

श्री शक्ति जी ते श्री श्याम लाल जी द्वारा लिखे दे, डोगरी भाषा, संस्कृति ते साहित्य सम्बन्धी लेखें दा ए संग्रह अऊं प्रस्तुत करनां । लेखकें दा परिचय तुसें गी अगें गै ऐ । ए मते चिरै थुआं देश दी सेवा करदे आवै दे न । हुण डोगरी जनता ते साहित्य प्रेमी ए लेख पढ़िऐ होर कृतज्ञ होऊन ।

श्री श्याम लाल होरें भाषा दे तथें विच डोगरी दे अनुसन्धान दी नी बन्ननं दी कोशिश कीती ऐ । नी जिन्नी डूंगी ते चैड़ी होग उन्नी गै मारत निगर ते विशाल बनग । डोगरी भाषा दी कथा डोगरें दा इतिहास ऐ । इतिहास जिन्ना भाषा विच प्रतिबिम्बित ते अङ्कित होए दा लबदा ऐ उन्ना कुतै बी नई । भाषा इक ओ सम्पत्ति ऐ जेदे जोड़ने विच हर इक बोलनं आला अमो समर्थ अनुसार सहायता करदा ऐ । सुभावक रीति कन्ने हर इक डोगरा अमो डोगरी भाषा गी

अपनी आयु पर्यन्त वचपन थुआं लइऐ बोलदा, सिखदा, सुआरदा ते समालदा रौन्दा ऐ । ए डोगरी भाषा-ज्ञान दिनें रातीं सोलां घण्टे, सत्तै दिन हफते विच, बुंजा गै हफते साले विच, ते अपनी जिन्दू दे सारे गै साले विच ओ प्राप्त करदा ते वरतदा रौन्दा ऐ । जिन्ना प्रेम ते प्रयत्न अस डोगरी भाषा गी समझने ते ओदे साहित्य रचने विच करगे उन्नी गै उन्नति साड़े देसै ते जाति दी होग । ध्वनि समूह, शब्द रचना, शब्द-भण्डार, वाक्य-विन्यास ए भाषा दे अंग न । इन्दे'चा हर इक उपर खोज ते छानबीन होनी चाही दी ऐ । ए इक्कले आदमी दा कम्म नई । श्यामलाल होरें लीह पाइऐ साथिए गी अगें वदने दी प्रेरणा दिती ऐ ।

२. दूआ भाग ऐ संस्कृति । संस्कृति इक व्यापक शब्द ऐ । एदे विच न केवल जातीय संस्कार गै शामिल हुन्दे न. देश दा धरातल, जलवायु, धर्म कर्म, खानपीन, रैत बैत, दिन धियार, तीर्थवर्त, व्याहृ ढंग रीति रवाज, भाषा, साहित्य पढ़ना लिखना, ज्ञान विज्ञान, नाच रंग हासे तमासे जन्ममरण ए सब अंग शामिल हुन्दे न । ए बेसम्ब खजाना ऐ, जिन्ना लिखो थोड़ा ऐ ।

३. त्रिवेणी दे त्रिये भागै विच लेखकें डोगरी साहित्य दा नमूना दिता ऐ । साहित्य ओ जेड़ा सदा साथ देऐ ते सदा हित करै । लेखक बिचारें दा अगुआ हुन्दा ऐ । जीवन गी अपने पिच्छें लान्दा ऐ । सच्चा नेता हुन्दा ऐ । युगप्रवर्तक हुन्दा ऐ ।

कथा, कहानी, काव्य नाटक, गीत इत्यादि साहित्य दे अंग हुन्दे न। वड़ी प्रसन्नता दी गल्ल ऐ जे डोगरी भाषा दे लेखकें साहित्य दे सबने अंगें दी पालमा कीती ऐ। ते सबने आससै उन्नति करी दस्सी ऐ। ओखी थोड़े बख्तै बिच। श्री शक्ति जी ते श्याम लाल होर धन्यवाद दे पात्र न जे ओ डोगरी भाषा दे पारखी, उपासक ते लेखक बनिए अपने साथिए ते अनुयाइए लई आदर्श बनने दी साधना करै दे न। मेरे उपपर उन्दी वड़ी किरपा ऐ जे उनें भिगी त्रिवेणी पढ़ने दा प्रकाशित होने थुआं पहले गै मौका दित्ता ते में उन्दा परिचय पाठकेंगी भेंट कीता। 'त्रिवेणी' डोगरी साहित्य गी इक प्रामाणिक देन ऐ। होर बधिया २ कृतिएं दी दोनै लेखकें कशा अस आस रखनेआं।

2-H/16-D.

चण्डीगढ़

निवेदक

गौरी शंकर

डोगरी साहित्य दी विकास-वत्ता दा इक नमां मील-पत्थर

भाषा, संस्कृति ते साहित्य सम्बन्धी लेखें दे इस संग्रह दा नां 'त्रिवेणी' बड़ा गै भावपूर्ण ते सुन्दर ऐ। डोगरी-साहित्य नै पिछले २०-२५ वरें'च बड़ी महत्वपूर्ण उन्नति कीती ऐ। कवता, कहानी, नाटक, एकाङ्की ते उपन्यास सबनँ पासै इस भाषा दे साधकें अपनी साधना दे जोरें भाषा दी साहित्यिक सगोसारी गी निगार करने दा सराहने जोग जतन कीता ऐ। कोई बी भाषा गद्य साहित्य दी साधना दे बगैर उम्सरदी मठोन्दी नई', ते गद्य साहित्य दी साधना इन्नाचिर अपना पूरा गुआड़ नई' दसदी जिन्नाचिर उसी साहित्यिक निबन्धे दा साजसिंगार नई थोन्दा।

डोगरी भाषा दे इस बोध-विकासै उपपर भाए' असेंगी मान अभिमान करने दा पूरा-पूरा हक ऐ पर साहित्यिक निबन्धें (लेखें) दी ए कमी हर वेल्लै चुब्बी दी छिडा आड मनै'च रड़कदी

रौन्दी ही । 'त्रिवेणी' दे रूपै'च श्री श्याम लाल ते शक्ति देवी नै इस कमी गी पूरा करने दा जेड़ा ए पहला उद्दम कीता ऐ, डोगरी साहित्य दे इतिहासै'च इक बड़ी महत्वपूर्ण ऐतिहासिक घटना मन्नेया जाग ।

इस 'त्रिवेणी' च बी गोता लाइऐ डोगरी भाषा दे प्रेमिएं दे मन प्रसन्नता कन्नें होले होई जाडन । इनें लेखें'च खासकरी पहले भागै दे छें निबन्धे'च जिनें समस्याएं जां विषयें उपर लेखकें अपने वचार साढ़ै सामनै रक्खे न, उन्दे उपर डोगरी दे गंभीर पाठकें बी थोड़ा मता वचार करना जरूरी समझेया तां इस रचना दी सार्थकता होर बी बदी जाग ।

'त्रिवेणी' डोगरी साहित्य दे गद्य दे बोध विकासै दी जिस नमीं दिशा'च पगडंडी दी पतली रेख बनिऐ चमकी ऐ, मेद ऐ इत्थें बल्लें बल्लें इस चाली दी साहित्य साधना दे राए' दूए साधक पक्का रागमार्ग बनाने दा जतन करडन ।

अऊं इऐ प्रार्थना करना जे डुग्गर दी भाग्य भगवती इस धरती दी जनता गी अपनी इस नमीं सम्पत्ति गी परखने ते साम्बने समालने दे जोग बना ।

हवेली वेगम, जम्मू
२५ जून १९६१

रामनाथ शास्त्री

अपने पासेआ—

कुसै बी देसै ते राष्ट्रै दी महानता दा प्रतीक ओदा साहित्य हुन्दा ऐ। साहित्यै दे माध्यम कन्ने गै उस देसै दी भाषा, सभ्यता ते संस्कृति दे दर्शन हुन्दे न।

साहित्य सेवा देश सेवा ऐ। साहित्य पटारी बिच अपने प्यारे देसै दियां रौंगलियां बहारां, बड्डे बडेरें दे शीरवाद, ते अपने जीवनै दे सुखें दुखें दियां अनुभूतियां सल्लेरिऐ ए मानत अस अपने समाजै ते औने आलिएं पीढ़िएं आस्तै सांवी ओड़नेआं।

मनै बिच ए बड़ी साध ही जे अपनी मातृभाषा दी किश सेवा करिऐ अऊं बी देसै ते गुरुएँ दे ऋणै दा भार हौला करां। इस भावना गी जिसलै भित्तरें दी प्रेरणा ते सहायता दा सहारा थोआ तां सच्चें मुच्चें अपनी चाह, गुरुएँ दा शीरवाद ते भित्तरें दी सहायता इस पोथी दे भाषा, संस्कृति ते साहित्य दी त्रिवेणी दा

रूप धारिऐ प्रगट होई । एदे विच अपनी चीज शड़ी चाह ते जतन ऐ बाकी सब पूजा जोग डा० वर्मा हुन्दी प्रेरणा दा प्रसाद ऐ जां मित्तरें दा प्रोत्साहन । प्रो० रामनाथ शास्त्री हुन्दा बड़ा देनदार आं । उनें त्रिवेणी दी सोधसाध विच बड़ी सहायता कीती ऐ ।

कुरुक्षेत्र विश्व-विद्यालय दे पहले विशेष पदाधिकारी डा० गौरी शंकर होरें त्रिवेणी दी प्रस्तावना लिखी ऐ ।

पंजाब विश्व-विद्यालय दे हिन्दी विभाग दे अध्यक्ष डा० हजारी प्रसाद द्विवेदी, दिल्ली विश्व-विद्यालय दे हिन्दी विभाग दे रीडर डा० विजयेन्द्र स्नातक, डोगरी मण्डल जम्मू दे सर्वश्रीअनन्तराम शास्त्री होरें गी त्रिवेणी शैल लगगी ते उनें पिठ ठोकी ते हिम्मत बधाई । इने मन्नें दे विद्वानें दा बड़ा देनदार आं । पुस्तक पाठकें सामनै ऐ । जे इस जतनै होरनें गी प्रेरणा दिती ते डोगरी गद्य दा ए अंग होर बदेया, फुल्लेया तां अऊं अपना परिश्रम सफल मन्नड ।

—श्यामलाल शर्मा

विजयगढ़, जम्मू
रक्षा बन्धन, १९६१

सम्मतियां

पुस्तकालय

I have looked through the pages of the work 'Triveni' by Mrs. Shakti Sharma and Shri Shyam Lal Sharma. It is an intellectual adventure quite beyond my expectation, placing in a brief compass the wide range of linguistic, literary and cultural values before Dogri speaking community. Such a big jump however, cannot be accomplished effectively without highly elaborate indices on all the aspects of all these three values and without giving occasional talks to school teachers and teacheresses, elucidating clearly the fundamental issues involved. It is hoped that the authorities concerned will support the publication of this work, the first of its kind in Dogri language, a work which will raise the intellectual level of the community for which it is intended.

Chandigarh
21-7-1961.

Siddheshwar Varma

मैंने श्रीमती शक्ति शर्मा तथा श्री श्यामलाल शर्मा लिखित डोगरी भाषा, संस्कृति और साहित्य का परिचय कराने वाली पुस्तक “त्रिवेणी” को बड़े मनोयोग पूर्वक देखा। पुस्तक यद्यपि डोगरी भाषा में है तथापि उसके मूलाशय को समझने में मुझे कोई बाधा नहीं हुई।

डोगरी भाषा का व्याकरण तथा रचनात्मक स्वरूप स्पष्ट करने में लेखक द्वय ने वैज्ञानिक शैली का प्रयोग किया है। संस्कृति खण्ड में मौलिक विचारों का चयन है और साहित्य खण्ड में भी मौलिक रचनाएं संकलित हैं। डोगरी के गद्यरूप का इस लघु पुस्तक से जैसा आभास मिलता है वह इसकी विपुल सम्भावनाओं का द्योतक है। मैं “त्रिवेणी” का हार्दिक अभिनन्दन करता हूँ।

विजयेन्द्र स्नातक

४२-ई कमला नगर, दिल्ली
२८ जुलाई, १९६१

रीडर हिन्दी विभाग
दिल्ली विश्व-विद्यालय

श्रीमती शक्ति शर्मा और श्री श्यामलाल शर्मा द्वारा लिखित 'त्रिवेणी' डोगरी-भाषा, संस्कृत ते साहित्य नामक पुस्तक देख कर मुझे बड़ी प्रसन्नता हुई है । डोगरी भाषा हमारे देश की महत्व-पूर्ण भाषा है । परन्तु अभी उसके साहित्य का यथोचित प्रकाशन नहीं हुआ है । इस छोटी सी पुस्तक में तीन भाग हैं जिनमें डोगरी भाषा, उसके बोलने वाले लोगों की सांस्कृतिक विशेषता और साहित्य पर विचार किया गया है । मुझे यह देखकर प्रसन्नता हुई कि डोगरी के विचार-शील लेखकों ने देवनागरी लिपि को अपनाया है । लिपि विषयक अड़चन न होने के कारण इस भाषा से पूर्ण परिचित न होने पर भी मैं इसकी बातें बहुत कुछ समझ गया । एक लिपि होने का यह बड़ा भारी लाभ है । पुस्तक में बहुत ज्ञातव्य बातें हैं । संस्कृति और साहित्य वाले भाग तो विशेष रूप से पठनीय हैं ।

हजारीप्रसाद द्विवेदी

अध्यक्ष हिन्दी विभाग

पंजाब विश्व-विद्यालय

चण्डीगढ़

३१ जुलाई, १९६१

में 'त्रिवेणी' दा अध्ययन कीता ऐ । मिकी ए आखदे होई
 हर्ष हुन्दा ऐ जे अज्जै थुआं पञ्ज-सत्त बरे पहलें दियें डोगरी पुस्तकें
 ते इस नमीं रचना दी भाषा बिच पृथ्वी आकाश दा अन्तर ऐ ।
 'त्रिवेणी' दी भाषा मंजी दी ते सुलभी दी ऐ ते इसी पढ़दे होइ
 अपनी भाषा, संस्कृति ते साहित्य उपर फखर हुन्दा ऐ । अजं
 'त्रिवेणी' दा अभिनन्दन करनां ।

अनन्तराम शास्त्री

पक्की ढक्की, जम्मू

२० जुलाई, १९६१

अनुक्रमणिका

	पृष्ठ
समर्पण	
त्रिवेणी दी प्रस्तावना	(क)
इक नमां मील पत्थर	(घ)
अपने पासेआ	(च)
किश सम्मतियां	
१. डा० सिद्धेश्वर वर्मा, चण्डीगढ़	
२. डा० विजयेन्द्र स्नातक, रीडर हिन्दी विभाग दिल्ली विश्व-विद्यालय	
३. डा० हजारीप्रसाद द्विवेदी, अध्यक्ष हिन्दी विभाग, पंजाब विश्व-विद्यालय	
४. श्री अनन्तराम शास्त्री, डोगरी मण्डल जम्मू ।	

विषय-सूची

पहला भाग (भाषा)

१.	भाषा दे किश तत्थ	...	१
२.	डोगरी भाषा	...	१६
३.	डोगरी ते भद्रवाई	...	२५
४.	डोगरी साहित्य दा लेखा जोखा	...	३४
५.	डोगरी शब्दें बिच इकरूपता	...	४२
६.	डोगरी भाषा दी स्मृद्धि दे उपा	...	५७

दूआ भाग (संस्कृति)

७.	संस्कृति	६५
८.	राष्ट्रीयता ते हिन्दी	...	७०
९.	वैष्णों भोजन	...	७६
१०.	छिन्ना ते अन्ध-विश्वास	...	८५
११.	गान्धी जी	९३

तीया भाग (साहित्य)

१२.	डोगरी लोक गीतें बिच नारी चित्रण	...	१०७
१३.	बैर ते बीरो	११५
१४.	बम्सोआं	...	११६
१५.	तमीज	...	१२५
१६.	टपला	...	१३४
१७.	घापेमारी	...	१३६
१८.	बताल-पचीसी	...	१४१

पहला भाग

(भाषा)

भाषा दे किश तत्थ

डोगरी भाषा

डोगरी ते भद्रवाई

डोगरी साहित्य दा लेखा-जोखा

डोगरी शब्दे बिच.इकरूपता

डोगरी भाषा दी स्मृद्धि दे उपा

गान्धर्व

(गान्धर्व)

गान्धर्व की कथा

गान्धर्व की कथा

गान्धर्व की कथा

गान्धर्व-गान्धर्व की कथा

गान्धर्व-गान्धर्व की कथा

गान्धर्व की कथा

भाषा दे किश तत्थ

भाषा के ऐ ?

दूएगी अपने मनै दी गल्ल दसने दे साधनै गी भाषा आखदे न । सारतीं करिऐ, रोइऐ, हत्थें ते ओठें दी बनौटै कन्ने अस रोज गै कई गल्लां हुन्दियां दिक्खनेआं । मिल्टरी आले भण्डी हलाइऐ अपने स्नेए दूर-दूर पजाई लैन्दे न । प्रेमी रमाल ते फुल्ल भेजिऐ 'मनै आली गल्ल' दस्सी लैन्दे न । पशु ते पक्खरू अपना हिरख-शोक सुख-दुःख ते मनै दे भावें दियां तब्दीलियां किश बोलिऐ, किश रौं-रवां (भाव-भंगिमा) कन्ने दसदे लब्दे न । ए सारे गै साधन भाषा खुआंदे न, पर इन्दे कन्ने शङ्गे मनोविकार गै भलाका दिन्दे न । सोचने, समझने ते बचार करने बिच ए पूरी-पूरी मदत नई दिन्दे । दरअसल

भाषा मनुक्खे दी बोली गी गै आखदे न जेदे कन्ने अस अपनियां गल्लां ते अपने बचार दूए अगें प्रगट करी सकने-आं । इसी “व्यक्त” भाषा आखदे न ते दूए साधन (सारतां, सैनियां आदि) अव्यक्त हुन्दिआं न ।

व्यक्त भाषा

मनुक्खे दी बोली जेदे बोलने बिच शरीर दे अंग-फेफड़े संधा, लुर्का, तालू, जीभ ओठ, आदि बरतोन्दे न ते जिसी बोलने करी दूआ ओदी गल्ल समझी लैन्दा ते अपना भाव जां जबाब पुछने आले गी दस्सी लैन्दा ऐ ‘व्यक्त’ भाषा खुआंदी ऐ । इस व्यक्त भाषा दा दूआ बहु गुण ए ऐ, जे मनै दी गल्ल प्रगट करने कन्ने ए मनुक्खे गी बचार करने ते मनन करने बिच बी मदत दिन्दी ऐ ।

बोलने ते सोचने दा सर्वन्ध

मनुक्ख जे किश बी बचार करदा ऐ ओदा उच्चारण बी मुएँ कन्ने करदा जन्दा ऐ । कई लोक टुरदे जन्दे ते उन्दे ओठ हिलदे लब्दे न । ओ दरअसल मनै बिच किश गल्लां सोचा करदे हुन्दे न । इऐ सोचना जिसलै बोलिऐ

होए तां भाषा होई जन्दी ऐ । दरअसल बोलने ते सोचने
 दा आपूं बिच बड़ा सबन्ध ऐ । मन्ने दे व्याकरण शास्त्र
 दे बड्डे पंडित श्री कामताप्रसाद होर ते आखदे न जे हर इक
 नमां शब्द इक नमें बचारा दी तस्वीर हुन्दा ऐ । ते भाषा दा
 इतिहास ओदे बोलने आलें दा इतिहास हुन्दा ऐ ।

लिखत भाषा

भाषा गी जित्थें बोलिऐ प्रगट करदे न उत्थें लिखिऐ बी
 प्रगट करदे न । इसी लिखत भाषा आखदे न । लिखत
 होई जाने कारण भाषा अमर होई जन्दी ऐ । भाएं किन्ना
 समां बीतो जा, लेख दिखिऐ ओदा चेत्ता आई जन्दा ऐ ।
 जीआं बिन्द सारे बीऐदा परिणाम एड्डा बड्डा बड़ें दा बूटा
 होई सकदा ऐ ईआं गै कईं बारो लिखे दा इक शब्द जां
 बोले दा इक बोल, हजारें लवखें लोकें गी सोचने ते किश
 करी गुजरने उप्पर मजबूर करी दिन्दा ऐ । इस्सं करी कईं
 विदवानें दा मत ऐ, जे भाषा दा इतिहास गै कुसै जाति दा
 सच्चा इतिहास हुन्दा ऐ जेदे बिच ओदी बचार शक्ति ते
 संस्कृति दा भलाका थोन्दा ऐ ।

अडोल परिवर्तन

भाषा दा ते जीवनै दा बड़ा सर्वन्ध ऐ । लौका जागत तोतले शब्द बोलदा ऐ ते अपने भाव प्रगट करने गीतें चीजें दे बचित्तर गै नां पाई लैन्दा ऐ । पानी गी 'मम' रुट्टी गी 'चुच्चो' पशाबै गी 'बू' आक्खिए अपनी भाषा दा निर्माण करी लैन्दा ऐ । उऐ जिसलै किशोर ते गबरू बनदा ऐ ओदे शब्दें-बिच स्पष्टता, ओज ते प्रवाह आई जन्दे न । अगे जाइऐ बढ़ेपे बिच जिसलै मुँऐ बिच दन्द नई रौन्दे तां ऊऐ शब्द फत-फत करदे लब्दे न । जीआं बचपन-कशा बढ़ेपे तक्कर भाषा ते ओदे उच्चारणै बिच तब्दीलियां हुन्दियां लब्दियां न इआं गै सामूहिक रूपे कन्ने जाति दी भाषा बिच बी परिवर्तन हुन्दे रौन्दे न । वेदें दी संस्कृत, पुराणें दी संस्कृत ते सौर्यकाल दी संस्कृत बिच बड़ा भारी फर्क ऐ, इआं गै चन्द्रबर्दाई विद्यापति, जायसी ते सेनापति दी हिन्दी ते भारतेन्दु, महावीरप्रसाद, लछमनप्रसाद हुन्दी हिन्दी ते अज्जकल्लै दे मैथिलीशरण गुप्त, महादेवी वर्मा, सुमित्रानन्दन पन्त, ते गुलाबराय हुन्दी हिन्दी बिच लक्खें हत्थें दा फर्क ऐ ; इआं बभौंदा ऐ जे ओ किश बक्खरी गै भाषा ऐ ।

महाराजा रणबीरसिंह हुन्दे दर्बारा दी डोगरी बसोहली

रामनगर, उधमपुर ते अखनूर दी डोगरी बिच वी मता गै फर्क लब्बग । ईआं अज्जकल्ले दी जम्मू शहरा दी डोगरी ते डुड्डु-बसन्त गढ़े दी डोगरी बिच मता फर्क ऐ ।

भाषा दी ए तब्दीली हुन्दी लब्दी नई । इस तब्दीली दी चाल इन्नी चुपचपीती ते अडोल हुन्दी ऐ जे कुसै बी बभोदा गै नई । पर किश समे बाद असेंगो उसै इक भाषा दे कई रूप लब्बन लगी पौन्दे न ते ओ भाषा मतिऐ बोलिए बिच बंडोई दी दृष्टि-गोचर हुन्दी ऐ । इक भाषा दे स्थान भेद करी मते रूप होइ जन्दे न । जम्मू दे 'ओ गेआ सा' (वह गया था—हिन्दी) दा रूप अखनूर "ओ गेआ हा" ते कुद् आलें पासै 'ओ गेआ था' लब्दा ऐ भाषा विज्ञाने दा ए कथन जे दस्सै मीलें परैन्त बोली दा रूप बदली जन्दा ऐ कोई भूठ नई । ईआं गै जम्मूआ दा "अऊं जाड" (मैं जाऊंगा—हिन्दी) रामनगर 'अऊं जागा' होई गेदा ऐ । जम्मू शहर दे गै दौं महल्लें बिच 'में जाड' ते 'अऊं जाड' दोऐ रूप बर्तौन्दे लब्दे न ।

जल-वायु दा प्रभाव बोली बिच मते ते भिन्न रूप बनाने दा कारण हुन्दा ऐ । "शुद्ध महादेव" उधमपुर जिले दा तीर्थ उप्पर पहाड़ें बिच सड्डोइऐ छड़ा 'सुद्दी' जां 'मादा'

रई गे दा ऐ ।

‘कुत्ते नै बड़ी ओड़ेआ’ (कुत्ते ने काट खायो—हिन्दी)
 “कुत्तै बड्डूड़या” दे रूपे बिच बदलोए दा लब्दा ऐ । जम्मुआ
 दी ‘कुड़ी’ भद्रवाह ‘कुई’ बनी गई दी ऐ ।

जीआं जीआं मनुक्ख तरक्की करदा जन्दा ऐ उंआं उंआं
 गे भाषा बिच बी परिवर्तन आँदे जन्दे न । इक्क
 जतनै कन्नै जे दो कारज सिद्ध होई जान तां अंग्रेजी बिच
 ओदे आस्ते मुहावरा ऐ ‘To kill two birds with
 one stone’ ‘इक्क जन्ती कन्नै दौं पक्खरू मारी
 लेना’ डोगरी बिच ऐ “कन्नै पुन्न ते कन्नै फलियां” इक्कै
 कम्म करने कन्नै पुन्न होई जन्दा ऐ ते कन्ने गै लाह
 बी होई जन्दा ऐ । पर हिन्दी दा “एक पन्थ दो
 काज” सभ्यता दी दृष्टि कन्नै इन्नै दौन्नै कशा मता
 उच्चा ऐ ।

परिवर्तनै दे कारण

थां, मोसम ते सभ्यता भाषा बिच मतिएं तब्दीलिएं
 दे कारण हुन्दे न । कश्मीरी ‘चार’ गिनती आस्ते

होर लोक जां 'चोर' आखडन जां 'सोर' आखडन उन्दे कशा 'च' ते 'स' दे बिच्चा दा बक्खरा-‘त्सो’-नेआ अक्खर खोन्दा गै नई । ईआं गै कइएँ बोलिएँ दे शब्द दूइएँ बोलिएँ बिच उसै चाली नई बलोन्दे । सभ्यता दे फला कन्ने भाषा बिच शब्दें दी बृद्धि हुन्दी जन्दी ऐ ।

कईं बेरी दूएँ दी बड्डी सभ्यता दे प्रभाव करी कुसै थां दी बोली बिल्कुल दबोई बी जन्दी ऐ । आस्ट्रेलिया दे तस्मानिया टापू बिच अंग्रेजी दे प्रचारा करी उत्थुआं दी बोली बिल्कुल खत्म होई गई । कुसै बी भाषा दा ईआं लोप होई जानां भाषा आस्तै बड़ा घाटा हुन्दा ऐ ।

भाषा दा कम्म

पढ़े गुढ़े दे होने करी ते मते सम्पर्क करी शहरू लोकें दी भाषा ते दूर पे दे अपने कम्में बिच रुज्जे दे ग्राईं लोकें दी भाषा बिच मता अन्तर हुन्दा ऐ । शहरू मनुक्खें दा उच्चारण स्पष्ट ते शुद्ध होग । ग्राईं भाव प्रगट करने बिच गै बोली दी सार्थकता पाई लैन्दा ऐ । शहरी 'गोस्वामी, चन्द्र, पूर्णिमा, संक्रान्ति, एकादशी इत्यादि आखग ते ग्राईं गुसाईं,

चन्न, पुन्नेआं, संगरान्द, कास्ती बोलिए अपने भावें दा प्रदर्शन करी लैन्दा ऐ । शहरी पणत जित्थें शिखरणी ते मन्दाक्रांत छन्दै दी मस्ती दा लुआरा लैन्दा ऐ उर्थें ग्राईं जवान इक लल्लर जां टार सुट्टिए नन्दै दा भूटा लेई लैन्दा ऐ । गल्ल इत्थें नन्दै दी नईं भाषा दे फर्कें दी ऐ । शहरी दा उच्चारण स्पष्ट होग ग्राईं दा शुद्ध जां उन्नां शुद्ध नईं हुन्दा । ए फर्क जिसलै मता गै होई जा तां भाषा दा रूप गै बक्खरा लबबन लगदा ऐ । संस्कृत नाटकें बिच जिन्नियां बी प्राकृतां, ते अपभ्रंश बोलियां थोंदियां न ओ इससै गल्ले दा नतीजा न । नायक ते पण्डित शुद्ध उच्चारण करदे न ते उन्दी भाषा संस्कृत ते अलंकृत ऐ । नायिका, विदूषक इत्यादि उए जनेह भाव अपनी स्थानीय बोली बिच प्रगट करदे न ते अस दिखवने आं जे इक संस्कृत भाषा दे पाली, माग्धी, शौरसेनी, पेशाची इत्यादि किन्ने गै रूप किन्निएं गै बोलिएं बिच बण्डोए दे न ।

कईं बारी ए हुन्दा ऐ जे दो बक्खरिआं भाषां इक थार बलोन लगन तां उन्दे सम्पर्क कन्ने इक नमीं भाषा सामनै आई जन्दी ऐ जिआं हिन्दी ते फारसी दे सम्पर्क कन्ने उर्दु (लश्करी) भाषा बनी गेदी ऐ ।

अपना भाव ते अस हथै दी सैनी ते अक्खीं दी सारता कन्ने बी प्रगट करी लेनेआं पर जिसलै किश बचार समझाना पौन्दा ऐ तां अस ग्लाइऐ गै समझाई सकनेआं । उस ग्लाने बिच बी बचारै दे कई हिस्से हुन्दे न । उन्हें सारें हिस्सें गी इक्क इक्क ते बक्खरा २ नईं, किट्टा ते क्रमबद्ध करी बोलचै तां गै दूए गी सारा ते ठीक मतलब समझोई सकदा ऐ ।

“बमार जागतै गीतै माऊ दे बुद्धै दा बदल गवै दा दुद्ध गै होई सकदा ऐ” ए सारी गल्ल इआं गै आखचै तां समझोई सकदी ऐ । जे इसी ईआं नईं आखिए छड़ा जागत बमार माऊ गवै आदि शब्द अगें-पिच्छें बोलचै तां किश पिड़-पल्लै नईं पौग । सारी गल्ल दूए गी समझोऐ तां उसी “वाक्य” आखदे न । छड़े शब्द किट्टे करने कन्ने वाक्य नईं बनदा । पूरी गल्ल समझाने जां समझोने बिच गै शब्दें दी सार्थकता हुन्दी ऐ । ए सार्थक ध्वनि गै शब्दें दी जान हुन्दी ऐ । ज, आ, ग, त इत्यादि मूल ध्वनियां न, पर जिस लै इन्दा समूह ‘जागत’ शब्द बनिए सामने आँदा ऐ तां अर्थ भट समझोई जन्दा ऐ । बक्खरे २ बचारै गी प्रगट करने आस्तै बक्खरा २ शब्द हुन्दा ऐ । जित्ने बचार

उन्ने गै शब्द । ईआं नईं होए तां 'गड़बड़ चौदया' गै मची जा । कुसै गी इक दूए दी गल्ल गै नईं समझोए । शब्दें दा ठीक ठीक प्रयोग करचै तां गै उन्दी सार्थकता हुन्दी ऐ, कन्ने सारी गल्ल जां पूरा वाक्य बनदा ऐ ।

सार्थक शब्द

'जेड़े शब्द अस बोलनेवां' ए कीआं बने हे ? ए मते बचार करने दा विषय ऐ । इसलै इन्नां गै समझो लैनां काफी ऐ जे हर इक वस्तु, ते बचार आस्तै शब्द बनाई लैते गे दे न । निरुक्त ते (Etymology) दा विज्ञान दवै हर इक शब्द दी व्युत्पत्ति दसने दा जतन करदे न, पर कई भाषा दे बड़्डे पणतें दा मत ऐ जे शब्द दा उस वस्तु जां बचारै कन्नै, जेदे आस्तै ओ प्रयुक्त हुन्दा ऐ, कोई सर्वन्ध नईं । इन्नां गै सर्वन्ध ऐ जे उस शब्द कन्नै उस 'वाच्य वस्तु दी भावना प्रगट होई जन्दी ऐ ते उस शब्द दा तत्काल बोध होई जन्दा ऐ ।

कई शब्द (Onomatopoeic) अर्थात् अनुकरणात्मक हुन्दे न । कां कां, मैं मैं, चूँ चूँ, बै बै झर झर सुनदे, गै कां, मेमना, चूहा, भिडु ते झरनें दा पता लगगी जन्दा ऐ ।

पर ए अनुकरणात्मक शब्द मती संख्या बिच नईं हुन्दे । भाषा दे भण्डारै बिच इन्दा बचार जरूर ऐ, पर भाषा गी भाषा दा नां देने आले सार्थक शब्द गै हुन्दे न । मूल ध्वनिएं दे जोड़ै कन्ने सार्थक शब्द, ते शब्दें दे विधि-पूर्वक प्रयोग कन्ने वाक्य बनदे न, जेदे कन्ने पूरी गल्ल समझोदी ऐ । पूरी गल्ल इक शब्द कन्ने समझोऐ तां ओ इक्क शब्द बी वाक्य खुआंदा ऐ ।

मिलटरी दी परेड होऐ करदी होऐ तां 'दक्ष' आखने दा सारै ए अर्थ समझी लैन्दे न जे "सारे सावधान होई जाओ ।"

इसबेलै अपने सामनै इन्ती गै गल्ल ऐ जे अनुकरणात्मक शब्द थोड़े हुन्दे न । भाषा दा नां सार्थक करने आले सार्थक शब्द गै हुन्दे न ।

वर्ण ते मात्रा

मनै दी गल्ल जा भाव प्रगट करने दा "माध्यम" भाषा हुन्दी ऐ । अपनी गल्ल, भाव जां बचार अस संकेत करिऐ, बोलिऐ, ते लिखिऐ प्रगट करी सकनेआं ।

संकेत जां सारतीं कन्नें गल्ल करनेआं तां भाषा दा नां “संकेतिक” भाषा हुन्दा ऐ । आमनै सामनै बोलिऐ गल्ल करने गी “कथित” भाषा आखदे न । ते जे दूर कुसै दोस्तै गी चिट्ठी भेजिए किश ग्लाना होऐ तां “लिखत” भाषा दा प्रयोग करदे न । बोलने बिच भिन्न २ ध्वनियां प्रयोग करनेआं ते लिखने बिच उन्न ध्वनिऐं दे चिन्ह बनाई लैते दे न । उन्न चिन्हें गी “वर्ण” आखदे न । ध्वनिऐं दा समूह शब्द ते वर्ण दा जोड़ अक्षर हुन्दा ऐ । ध्वनि कन्नें कन्नें सुननेआं ते अक्षर अक्षीं कन्नें दिखनें आं । कथित भाषा कन्नें दा विषय ऐ ते लिखत भाषा अक्षीं दा ।

लिपि

ध्वनि दा चिन्ह वर्ण दरअसल उस ध्वनि दा प्रतिनिधि गै हुन्दा ऐ । इन्न वर्णों दी गै लिपि बनी जन्दा ऐ । संसार बिच किन्निआं गै भाषां न ते किन्नियां गै लिपियां न ।

पहलें ज्ञान छड़ा सुननें दा विषय हुन्दा हा । गुरु अपने शिष्य गी जा पिता अपने पुत्तरें गी कोल बहालिए गल्ल समझांदा हा । ओह अगें अपने शिष्य ते पुत्तरें गी ईआं समझांदे हे । ते श्रुति अनुसार ए परम्परा बनी दी ही । इस्से करी

बेदें दे ज्ञाने दा नां “श्रुति” पेदा ऐ । अगें चलिऐ जिसलै
ए ज्ञान भोज पत्तरें उप्पर लिखोन लगी पेआ तां एदा नां
“स्मृति” होई गेआ ।

जीआं बक्खरी २ वस्तुऐं आस्तै शब्दै दा निर्माण कीआं
होआ ऐ सोचने दा ते मनन करने दा गंभीर विषय ऐ, ईआं
गै लिपि दे निर्माण बारे बिच बी भिन्न २ बचार न ।

कइएं दा बचार ऐ जे हर इक शब्दै दा इक इक
चित्तर हुन्दा हा । जे ग्रां दा गौ नुआनी हुन्दी ही तां गवै
दी मूरत बनाई भेजदे हे ते अगले समझी जन्दे हे जे गौ
संगा करदे न । अगें चलिऐ गवै दी सारी मूरत नई छड़ा
मुंह जां होर कोई भाग, फी, ओदा बी कोई चिन्ह रही
गेआ, ईआं हर इक लिपि दा निर्माण होई गेआ ।

एदे परा गै पोथिआं ते ग्रन्थ लखोऐ ते पुस्तकालय
ते लायब्रेरियां बनियां । आखदे न बेबीलोनियां बिच इक
पुस्तकालय हा जेदे बिच मिट्टी दी तखतियें दियां, जेड़ियां
अगो च तपाइऐ पक्कियां बनाइ दियां हुन्दियां हियां, दस
हजार पोथियां हियां । मंगोल लोके हमला करिऐ ओ
पुस्तकालय गै बर्बाद करी ओड़ेआ ।

शब्दें दा सर्वन्ध

भाषा के ऐ ? शब्दें ते ध्वनिएं दा भण्डार । जिन्ने मते शब्द होङ्ग उन्नी गै समृद्ध भाषा होग । की, जे हर इक शब्द अपने थार इक बचार गै हुन्दा ऐ । ते बाकी शब्दें दे प्रसंगे कन्ने ओदे होर बी मते अर्थ ते भाव निकलदे न । 'गौ' आखदे गै इक दुद्ध देने आले पशु दी मूरत साङे सामने आई जन्दी ऐ । पर जे अस सुनचै "ए कुड़ी निरी गौ ऐ" तां 'गौ' शब्द दा होर गै अर्थ साङे सामने आँदा ऐ । इत्थें दुद्ध देने आला पशु नईं होइऐ उस शब्दें दा भाव गवै दा सील सुभा ते भोलापन प्रगट हुन्दा ऐ । पर जेड़े शब्द कुसै कम्मै दा होना, करना, सहना आदि भाव दसदे न उन्दे ते कईं रूप होई जन्दे न । 'जाना' शब्द सारे समझेद न । ओ जा'रदा ऐ । में जानां ऐ (मैंने जाना है) ओ गेआ उठी । (वह चला गया) तू जागा (तू जायेगा) अऊं जाड (मैं जाऊंगा) उन्नै नईं नोआ (वह नहीं जा सका) आदि वाक्य च 'जा'रदा 'जाना' 'गेआ' 'जागा' 'जाड' 'नोआ' एह सारे शब्द जाना 'धातु' दे गै रूप न । पर सारें दा अपना अपना अर्थ ऐ । ए 'जाना' क्रिया दे गै रूपान्तर होए दे न । कई शब्दें दी ए

गल्ल हुन्दी ऐ जे बक्खरे बक्खरे उन्दा अर्थ किश होर हुन्दा ऐ, ते किट्टे करो तां नमां गै अर्थ बनी जन्दा ऐ । जीआं संस्कृत बिच 'गौ' ते 'अक्ष' गौ ते अक्खीं दे अर्थ दसदे न, पर 'गवाक्ष' आखो तां ओदा अर्थ 'खिड़की' होई जन्दा ऐ । ईआं गै ईऐ जनेह मते शब्द थोन्दे न ।

भाषा ते व्याकरण

अस जेड़ा बी वाक्य बोलनेआं ओदे बिच शब्दों दी अपनी तरतीब हुन्दी ऐ । जे किश अगें पिच्छें करिए बोलचै तां बगड़वात गै लब्बै । जां ठीक गल्ल नई समझोऐ । वाक्य बिच शब्दों दा क्रम होना गै चाही दा ऐ । इस कन्ने भाषा बिच स्थिरता ते समता औंदी ऐ ।

शब्दों दे शुद्ध ते ठीक रूप निर्धारित करने गीतै, ते उन्दे ठीक ते उचित प्रयोग दसने आस्तै, जेड़ा शास्त्र बने दा ऐ उसी व्याकरण शास्त्र आखदे न । पर व्याकरण शास्त्र दे नियम ते सिद्धान्त उसलै गै बनदे न, जिसलै भाषा लिखत रूप बिच किश साहित्यिक सम्पत्ति किट्टी करी लै । बोलिएं दे व्याकरण नई हुन्दे । इस करी बोली बिच थोड़े २ छिण्डे पर रौने आलें लोक अपनी मरजी मताबक शब्दों दा

प्रयोग करिऐ गल्ल नभाई लैन्दे न । पर नियम तां बनदे न जे मता किश लिखोऐ, ते भाषा दे शब्दें दे रूप निश्चित होई जान । कन्ने मन्ने-तन्ने दे, ते पणत, ते स्याने लोक उनेंगी स्वीकार करिऐ अपनी साहित्यिक कृतिएं बिच लई औन । पहलें व्याकरणों दे नियम बनें दे होण, ते फी भाषा दे रूप निश्चित होण, नेई गल्ल नई । भाषा बिच मते ते प्रयुक्त होए दे शब्दें दे रूप नियम स्थिर करदे न । संसारें बिच भाषा ते बोलिआं हजारों न, पर व्याकरण उन्हें भाषाएं दे गै थोन्दे न, जिनें साहित्य दा निर्माण कीता दा होऐ ।

व्याकरणौ दे फायदे

व्याकरण-शास्त्रं दा ज्ञान होऐ तां पढ़े लिखेंदे लोकें सामनें बोलने बिच कोई संकोच नई हुन्दां । व्यक्ति नभक्क होइऐ गल्ल बात करी सकदा ऐ । शब्दें दे बोलने बिच शुद्धता रौन्दी ऐ, ते बचार भलेआं समझान हुन्दे न । पर अस दिक्खनेआं जे उप्परले तबके दे घरानें बिच उन्दे लौके २ जागत बी बड़ी शैल ते शुद्ध भाषा बोलदे न । ते कई हिन्दी दे व्याकरणों दे जानकार ते दूए प्रान्तें दे विद्वान बी कई बारी शब्दें दे बोलनें जां लिखने बिच, गलती करी जन्दे न । व्याकरण नई बी औंदा होऐ तां बी मातृ-भाषा बिच मनुक्ख भलेआं बोलदे गै न ।

ते कोई गलती बी नईं हुन्दी । अजकल कईं लेखक व्याकरण दे ज्ञान बिना गै बड़ा शैल ते शुद्ध लिखदे लब्बदे न ।

कई विद्वानें दा स्याल ऐ जे पुरानियां भाषां, जीआं संस्कृत ग्रीक, लैटिन इत्यादि बोल-चाल दिआं भाषां नईं रई दियां इसकरी ओ व्याकरण दे नियमें च बभोई सकदिआं न । पर जीवित भाषाएं बिच नित-नमिआं तब्दीलिआं औन्दिआं रौन्दिआं न, इसकरी व्याकरण दे नियम उस भाषा गी बन्ती नईं सकदे । व्याकरण शब्दों दी बनावट ते उन्दी निरुक्त आदि दे आधार उपपर खोज इत्यादि दे कारण भाषा बिच इक शुद्धता ते स्पष्टता जरूर लइ औंदा ऐ ।

मातृ-भाषा दे अतिरिक्त होर कुसै भाषा दी जानकारी आस्तें व्याकरण बड़ा उपयोगी हुन्दा ऐ । कई बारी कोई भाषा बड़ी कठन ते संदिग्ध हुन्दी ऐ ओदी सही जानकारी आस्तें व्याकरण बड़ी मदत दिन्दा ऐ ।



डोगरी भाषा

सारी दुनियां दियां भाषां ते बोलियां बारें परिवारें बिच बण्डोई दियां न । उन्दे बिच इण्डो-यूरोपियन परिवार बड़ा बड्डा परिवार ऐ । इस परिवारें बिच आर्यन भाषाएं दा बड़ा मान ते उच्चा थां ऐ । एदी मुख्य भाषा संस्कृत ऐ । संस्कृत भारतवर्षें दिऐं सतिऐं भाषाएं दी सा ऐ ।

भारत वर्षें बोलिएं ते भाषें दा अजैबघर ऐ । दक्खन-भारतें बिच द्रविड भाषां बोलियां जन्दियां न, ते उत्तर भारतें बिच आर्यन कुलें दियां । द्रविड भाषें बिच तामिल, तैलुगु, कन्नड ते मलयालम प्रधान न, हिन्द आर्यन कुलें बिच हिन्दी, बंगाली,

बिहारी, राजस्थानी, गुजराती, मराठी, पंजाबी आदि किन्नियां गै भाषां न, डोगरी बी इस्सै परिवारै दी भाषा ऐ ।

भाषा विज्ञानै दे कई विद्वान डोगरी गी पंजाबी दी उपभाषा आखदे न, ते कई इसी स्वतन्त्र भाषा मनदे न । मुट्टी नजरै कन्ने ते भूगोलै दे हिसाबै सिर, डोगरी दा सिद्धा सर्वन्ध पंजाब कन्ने आँन्दा ऐ । पंजाबी भाषा शौरसेनी भाषा बिच्चा निकली दी पच्छमी हिन्दी, राजस्थानी, गुजराती आदि भाषे कन्ने सर्वन्ध रखदी ऐ । इस्सै चाली भाषा शास्त्रै दे नियमै मूजब डोगरी बी हिन्दी दी गै धी बभ्छोन्दी ऐ । हिन्दी भाषा भारत वर्षे दे मझाटले हिस्से बिच खड़ी बोली, ब्रज बांगरू ते कनौजी आदि रूपे बिच फुल्लै फलै करदी ऐ । पंजाबे बिच पंजाबी ते कांगड़े, चम्बे ते जम्मू दे इलाके बिच आइऐ डोगरी दे रूपै बिच बदै फलै करदी ऐ ।

डोगरी दा प्रमुख क्षेत्र चढ़देआ रावी नदी कशा लेइऐ घरोंदे पासै चन्दरभागा तोड़ी ऐ । चन्दरभागा थुआं पार अखनूर, काली धार ते ज्योड़ियां तोड़ी बी डोगरी बोलदे न । एदे बिचा बी राम नगर, उधमपुर ते रियासी आले इलाके बिच डोगरी दा ठेठ रूप थोन्दा ऐ । जम्मू, साम्बा, हीरानगर ते कठूए दे इलाके बिच बी डोगरी प्रधान ऐ, पर किश किश

असर पंजाबी दा पेदा ऐ । उधसपुर कोला उप्पर रामबनी, भद्रवाई, किशतवाड़ी रूप डोगरी दे गै रूप न पर इन्दा शमार कश्मीरी कन्ने हुन्दा ऐ । खशाली, गोजरी ते पहाड़ी बी इससै सूबे दियां बोलियां न, ते डोगरी कन्ने सर्वन्ध रखदियां न । पोठोहारी दा किश किश रूप राजौरी, पुन्छ दे इलाक बिच थोन्दा ऐ । पर एदा सर्वन्ध लैह्न्दा पछमी पंजाबै कन्ने ऐ ।

कण्डयाली, कांगड़ा ते भटयाली बी डोगरी भाषा दे अन्दर गै ओदे रूप न । कण्डयाली गुरुदासपुर जिले दे उत्तर पूरब बिच बोली जन्दी ऐ । कांगड़ा कांगड़े जिले दी बोली ऐ । भटयाली पछमी चम्बे बिच बोली जन्दी ऐ ।

डोगरी जां डोगरा शब्द आम तौर उप्पर 'द्विगर्त' शब्द थमां निकले दा मनदे न । इतिहास ग्रन्थें बिच ते द्विगर्त शब्द दा किश थौ पता नई' लगदा । इयां बभोंदा ऐ जे 'त्रिगर्त' शब्द कन्ने मेल खन्दा 'द्विगर्त' शब्द बनी गेदा ऐ । सर जार्ज कनिंघम हुन्दे मतै मूजब त्रिगर्त कांगड़ा ते चम्बे दे दक्खन थुआं जालन्धर तोड़ी इलाके दा नां हा ।

द्विगर्त आली गल्ल इयां बभोंदी ऐ जे साम्बे ते रामनगर दे दम्यांन दौं बडिड्यां बडिड्यां भीलां न, जिनें गी सरुई-सर

ते मानसर आखदे न । सरुई-सर जम्मू कशा पैदल रस्तें
कोई ठारां मील दूर ऐ, ते मानसर नुआड़े कशा बारां मील
परे ऐ । इनें दौनें भीलें करो गे 'द्विगर्त' नां पेदा लबदा ऐ
जेड़ा बिगड़िऐ डुंगर जां डोगरा बनी गेदा ऐ । स्टेन महोदय
ने राजतरंगिनी बिच 'द्विगर्त' दे थार दुर्गर लिखेदा ऐ । चम्बे
बिच दौं त्रामे दे पटे थोए न जिन्दे बिच दुर्गर इलाके दा नां
ऐ । कनिंघम हुन्दे मतें मूजब दुर्गर देस जम्मू दा इलाका ते
जेलम ते रावी दे बिच्छा दियां लौकियां लौकियां रियासतां
हियां । डुंगर जां डोगरा देस रावी ते चनाब दे दर्म्यान
पहाड़ी इलाके दा नां ऐ ।

इक नमें मतें मूजब डोगरा नां 'द्विगर्त' जां 'दुर्गर' शब्दें
थुआं नई ऐ । राजस्थान बिच डूंगर पहाड़ी जां टीले गी आखदे
न । जिसलै राजस्थान उप्पर मुस्लमानें दा जोर होआ तां
किश राजपूत नस्सिए जम्मू दे पहाड़ी इलाके बिच आई बस्से ।
ओ पहाड़िएं ते टीलें गी 'डूंगर' आखदे हे । इत्थुआं उन्दा
नां डोगरे पेई गेआ । ते इलाके दा नां बी डुंगर ते भाषा
दा नां बी डोगरी होई गेआ ।

खैर ! इन्नी गल्ल ते पक्की होइ जे जम्मू प्रदेश डुंगर
देश ऐ, इत्थुआं दे रौने आले डोगरे ते उन्दी भाषा डोगरी ऐ ।

डोगरी भाषा दी अपनी लिपि बी ऐ । इसी 'टक्करी' आखदे न । साहूकार अपने बई खाते 'टक्करी' बिच गै रखदे हे । महाराजा रणवीरसिंह होरें इसी देवनागरी ते गुरमुखी दे बरोबर लई आन्दा ते सरकारी लिपि बनाया । इनें अक्खरें गी 'नमें डोगरे' आखन लगी पए । सहूकार 'पुराने डोगरे' गै बर्तदे रए । महाराज रणवीरसिंह होरें ते छापा खाना बी बनवाई ओड़ेआ ते कई पुस्तकां ते ग्रन्थ डोगरी बिच छपाए । पर ए स्कीम मता चिर चली नई । महाराजा हुन्दियां अक्खीं मटोंदे गै उर्दू ते अंग्रेजी नै डोगरी दा थार मल्ली लेआ । डोगरी दा छापा खाना गै बन्द होई गया ।

जोका टक्करी लिपि जां डोगरें दा प्रचार मूल गै घटी गेदा ऐ । इस लिपि बिच देवनागरी वर्णमाला दे 'ऋ' ते 'लृ' गी छोड़िए सारे गै अक्खर हैन ।

जम्मू कश्मीर सरकारें ते डोगरी दी संस्थाएं हुए देवनागरी लिपि गी डोगरी आस्ते मन्नी लैता ऐ । ए बड़ी दूरन्देसी दी गल्ल होई ऐ । एदे कन्नं रियासतें दियें दूई भाषें आस्तें बी जेकर देवनागरी लिपि गै मन्नी लैती जा तां सारे दे सें दी एकता गी बड़ा बल थोग ।

ग्रियर्सन साबे डोगरी गी पंजाबी दी बोली ग्लाय़ा ऐ । पर वैब्सटर दे अन्तराष्ट्रीय शब्द कोष (Webster's International Dictionary) मूजब ते, डा० सिद्धेश्वर वर्मा (जिने गी भाषा सर्वन्धी सेवा उप्पर भारत सरकार 'पद्मभूषण' दा तकमा दित्ता ऐ) हुन्दी डोगरी भाषा सर्वन्धी खोज-पड़तालै मूजब, डोगरी पंजाबी दी बोली नई । इक अपने परें खड़ोती दी भाषा ऐ ।

भारत वर्षे दा नकशा दिक्खो तां डोगरी टकोदी बन्ने दी भाषा लब्दी ऐ । इसी भाएं 'सरहदी' भाषा आखी लौ । सरहदी भाषा होने करी आसे यासे दिएं बोलिएं दे मते शब्द ते उन्दा असर बी डोगरी भाषा उप्पर पेदा ऐ । 'रामबनी' जम्मू सूबे दी बोली ऐ पर नाड़े उप्पर कश्मीरी ते शिना बोलिएं दा असर ऐ ।

पंजाबी ते हिन्दी बिच जेड़े शब्द 'छ' ध्वनि कन्ने शुरू हुन्दे न, डोगरी बिच उत्थें 'श' वर्तोन्दा ऐ । छज्ज, छुहारा, ते छतरी आमतौर उप्पर शज्ज, शुहारा, ते शतरी बलोन्दे न । कश्मीरी ते पहाड़ी भाषे दी सिफत ऐ जे इनें भाषे बिच 'छ' ते 'श' दे बिच्चै दी इक ध्वनि थोन्दी ऐ । न ते ओ 'छ' ऐ ते न गै ओ 'श' ऐ । किश मझाटली नेई बाज ऐ ।

डोगरी भाषा दी इक होर सिफत ए जे 'व' दे थार 'ब' बोलदे न । We walk when we like इस फिकरे गो डोगरा जातक खास करी साम्बे दे इलाके दा "बी बाक बेन बी लाइक" बोलग ।

डोगरी भाषा दी इक होर खूबी बी ए । नाड़े बिच कर्म वाच्य (Passive voice) मता बर्तोदा ए । हिन्दी बिच पुछड़न "क्या खा रहे हैं ? क्या पी रहे हैं ? क्या लिख रहे हैं ? क्या पढ़ रहे हैं ?" डोगरी बिच आमतौर उपपर ईआं आखड़न 'के खलोआ'रदा ए ? के प्लोआ'रदा ए ? के लखोआ'रदा ए ? के पढ़ोआ'रदा ए ।

डाक्टर ग्रियर्सन साब नै Linguistic Survey of India बिच डोगरी भाषा दी जान पछान कराई दी ए ।

डा० गौरीशंकर शर्मा हुन्दा इक खरी जानकारी कराने आला लेख Linguistic Society of India दै बुलिटीन Indian Linguistics Vol. I, 1931 बिच छपेआ हा । डोगरी भाषा दी सारी जानकारी कराने आला होर कोई ग्रन्थ जां लेख हज्गे नई थोदा । डा० सिद्धेश्वर वर्मा हुन्दे जम्मू सूबे दिए पहाड़ी बोलिएं उपपर लेख बेजोड़ न । तेजराम खजरिया होरें 'डोगरी ध्वनियां' इक लेख लिखेआ हा । 'डोगरी' शब्द दी व्युत्पत्ति उपपर हंसराज शर्मा ते प्रशान्त हुन्दा इक शैल लेख लखोए दा ए ।

डोगरी ते भद्रवाई

साड़ी जम्मू कश्मीर रियासत बोलिएं दा इक निक्का
 नेआ अजैबघर ऐ । कश्मीर ते लहाखै दियां कश्मीरी ते
 लहाखी भाषां छोड़िए सारे जम्मू बिच बोलिएं दी भरमार
 ऐ । कश्मीरै बिच कश्मीरी प्रमुख बोली ऐ । बोलने दे लहजे
 बिच, बक्खरे २ धर्मे दे लोकें दे अपने २ शब्दें बिच, जां
 बोलने दे उतार चढ़ा बिच, निक्का शुक्का फर्क भाएं लब्बै, पर
 इक कश्मीरी बोली गै सारे कश्मीर प्रान्तें दी बोली ऐ ।
 ईआं गै लहाखै बिच निक्के-शुक्के फरकंगी छोड़िए बोली इक्कै
 थोन्दी ऐ । पर जम्मू सब बिच ए गल्ल नई । भाषा दा
 ऐ निजम हुन्दा ऐ, जे-दस्से मीलें परैन्त किश बदल आइन्दा ऐ ।

जम्मू सूबे बिच इलाके परती इक २ बोली ऐ, ते ओदे बोलने आलें दी संख्या बी खरी ऐ ।

जम्मू सूबे दियां प्रमुख बोलियां ए न ।

डोगरी, किश्तवाड़ी, भद्रवाई, रामबनी, खशाली, पंजाबी गोजरी, पोठोहारी इत्यादि ।

पीर पजाल कश्मीरै ते जम्मू दे बशकार इक बड़ी भारी कन्ध ऐ । कश्मीरै ते जम्मू गी बक्ख २ रखने बिच पीरै दा मता हत्थ ऐ । इसै करी जम्मू ते कश्मीरै दी संस्कृति, ते भाषा गे बक्ख २ होई गई दियां न । फी बी बन्हाल ते किश्तवाड़ आलै रस्तै इन्नी आओजाई जरूर ही, जे दौनों पासें दिऐं बोलिएं उपपर आपू बिचें मेल बर्तनै दा असर पेया । इक बारी कश्मीरा काल पेया, ते उत्थुआं दा मते लोक पीर टप्पिए भद्रवा ते किश्तवाड़ आई बस्से । इस करी उन्दे बस्सी जाने कन्नै भद्रवाई ते किश्तवाड़ी बोलिएं उपपर कश्मीरी भाषा दा असर पेया । इनें दौनों बोलिएं बिच अबाजै दा उतार चढ़ा, किश कश्मीरी कन्नै मेल खन्दा ऐ । फी बी भद्रवाई जम्मू सूबे दी बोली होने करी डोगरी दे मती कच्छ ऐ ।

दोनों बिच इक्कै नेए शब्द थोन्दे न ।

डोगरी	हिन्दी	भद्रवाई
इक्कला	अकेला	अक्कलो
सारत	इशारा	सारथ
बतोए दा	पागल	बतोरो
हुट्टे दा	थका हुआ	हुट्टेरो
घाटा	घाटा	घाटो
जाड़	जंगल	जाड़

ईऐ हसाब रामबने थुआं उत्परले इलाके दा बी ऐ ।
उधमपुर जम्मू ते कठूआ ए त्रै बड्डे इलाके न, जित्थें इक्कै
नेई भाषा बोली जन्दी ऐ । इसी डोगरी आखदे न । ते
बोलने आले डोगरे खुआन्दे न । इस भाषा दा नां डोगरी की
ऐ । एदा कारण ऐ । इस बड्डे इलाके बिच दो सर न ।
मानसर ते सूईं सर । इन्हेंगी पुरानी पोथिएं बिच 'द्विगर्त'
आखदे न । संस्कृत 'द्विगर्त' दा बिगड़िए 'दोगड़' ते 'डोगर'
बने दा ऐ ।*

*स्टेन साब नै दुर्गर शब्द लिखेआ । नमीं सोधा
सूजब 'डूंगर' शब्द थुआं 'डोगरा' शब्द नै रूप लैता ।
'डोगरी भाषा' लेख नं० २ बिच उसी बिस्तार कन्ने पढ़ी ली ।

‘द’ दा ‘ड’ बिच परिवर्तन इस भाषा उपपर ‘लैह्’ दा भाषा’ दा प्रभाव ऐ । कठूए दे कन्ने बगदी रावी दे कच्छ शाहपुर कण्डी बिच ए वातावरण थोन्दा ऐ । अस आखने आं “दौं पैसैं दा दर्ई दे” (दो पैसों का दही दो-हिन्दी) उत्थें आखदे न “डों पैसैंआ डा डई डे” अस आखने आं ‘दीआ बाल’ (दीपक जलाओ हिन्दी) ओ आखदे न “डीवा बाल” । साड़ी ‘चट्ट’ उत्थे ‘डट्ट’ होई जन्दी ऐ । भाषा दे इस निजमैगी मता पीओ तां जरूर गै तत्थ थोग नईं गल्ल नईं । कईं अपवाद बी थोडन ।

डोगरी जम्मू प्रान्तै दी बड्डी ते प्रमुख भाषा ऐ । पक्खम आलै पासै ‘पोठोहारी’ बोली थोन्दी ऐ, एदे उपपर उर्दू फारसी दा मता असर ऐ ।

डोगरी ते भद्रवाई इक्के प्रान्तै दियां भाषां न, ते सक्कियां भेनां न । इक्क माऊ दियां धीआं होने उपपर बी दौने बिच किश फर्क लब्दे न । सक्किएं भैएँ दा सुभा, रौन-बौन बी बक्खरा २ हुन्दा ऐ । डोगरी ते भद्रवाई बिच खून इक्के ऐ । कईं खुआनें, कत्थें, मुहावरें बिच इक्के तान बजदी लब्दी ऐ ।

डोगरी

भद्रवाई

- | | |
|------------------------------------------|----------------------------------------|
| १ सुन्नै चल्हैनै बिल्ला मकदम | म्हाले मुगदु बनी वशोरो |
| २ आई अगलैन, बनी
बैठी घरै आली | आई अग नैन, बनी मुभानी |
| ३ पल्लै नईं फक्क ते जगन्नाथें
दी तक्क | पल्लै नईं फक्क ते जगन्नाथन
जई तक्क |
| ४ मारी घराटिएं रोसा घरै
आलें उपपर | कुट्टी घराटिएं रूशशी बर
वालन सेंई । |

डोगरी कर्म वाच्य प्रधान भाषा ऐ । ए इस भाषा दी खास सिफत ऐ । हिन्दी बिच पुछड़न “सुनाओ जी, भोजन कर रहे हैं ?” सोने लगे हैं ? लिख रहे हैं । में सुन नहीं पा रहा । फुहार पड़ रही है इत्यादि, पर डोगरी बिच आखदे न “सुनाओ जी, खलोआ करदी ऐ । सुनोआ करदा ऐ । लखोआ करदा ऐ । में नईं सुनचोंदा । कनोआ करदा ऐ ।” भद्राई बिच बी ईआं गे कर्म वाच्य प्रधान थोग । ‘शुनाथ जी, खैरा होरे आथ । जुलोरा होरे आथ । लिखिरा होरे आथ । मीं न शुनोए । कंनीं पैरा होदे अन ।’ ए वातावरण डोगरी ते नाड़ी भैरों गी संस्कृत भाषा दे मते कछ ब्हालदा ऐ ।

ईआं गै लिंग, वचन ते कारक दी दृष्टि कन्ने बी डोगरी ते भद्रवाई संस्कृत दे मतियां कच्छ न । विशेषण ते विशेष्य दे लिंग बचन ते कारक इक्कै नेए चलडन, हिन्दी बिच ए बदलोई गे दे न ।

डोगरी	भद्रवाई	हिन्दी
चंगी धी	खरी कुई	अच्छी लड़की
चंगियां धीआं	खेरी कुइयां	अच्छी लड़कियां
कुंगली फली	अलीशई	कोमल फली
कुंगलियां फलियां	एली शइयां	कोमल फलियां
होर कई भाषे बिच ए चीज नई रइ दी ।		

क्रिया दे रूप बी डोगरी ते भद्रवाई बिच मते इक्कै नेए थोन्दे न । भूतकाल, वर्तमान, ते भविष्यत् दे रूप दिक्खिए पता लग्गी जन्दा ए ।

	डोगरी	भद्रवाई
भूत	ओ दुरी गेआ	तै चली जाउ
वर्तमान	ओ पढ़दा ऐ	तै पढ़ने लग्गे रो
भविष्यत्	अऊं औंड	अऊं एजेलो

साहित्य रचना दी दृष्टि कन्ने भद्रवाई बिच लोक गीत कथां बाकी भाषे आडू मतियां न । पुस्तक रूप बिच घट्ट

थोन्दे न । बासकी—पुराण संस्कृत दा थां ए । एदे बिच भद्रवा दा इतिहास थोन्दा ए । गीता दा अनुवाद भद्रवाई दा इक ग्रन्थ जरूर ए । होर कोई खास पता नईं लगदा । कविता दी हेठली पंगति बिच फलासफी दा झलाका दिक्खो ।

सिन्नी मित्ती लाई लाई धोड़ों चा कुलेरे लेई,
ओन्तरिओं न मेल निस्से बेरिएं न्हाने सेई

“शरीरै दी बाहरली सफाई कन्ने अन्दरै दी मेल नईं
धनोई जन्दी ।”

भद्रवाई बिच नपुंसक लिंग

संस्कृत ते किश भाषाएं गी छोड़िए, नपुंसक लिंग दा प्रायः लोप गै हुन्दा जा करदा ए । जीआं हिन्दी ते होर कई भारती भाषे बिच होई गेदा ए । डोगरी बिच बी नपुंसक लिंग नईं । भद्रवाई बिच नपुंसक लिंग मजूद ए । डा० सिद्धेश्वर वर्मा होरें (Neuter Gender in Bhadrawahi, Indian Linguistics 1931, Vol. 1) बड़ा सुन्दर लेख दिखे दा ए । भद्रवाई बिच पुल्लिंग ते नपुंसक लिंग इक बचन ते नेए इकरूप न, जे पनशोन्दे गै नईं । भाषा विज्ञान दे जानू पशानू गी ए फर्क सेई हुन्दा ए । ए दी टकोदी पशान ए ए, जे पुल्लिंग ते नपुंसक लिंग इकबचन

बिच ते इक समान लबदे न, पर बहुबचन बिच पुलिग
इक वचन समान गै रौन्दा ऐ नपुंसक लिंग बिच बहुबचन
कन्ने “आं” प्रत्यय लग्गी जन्दा ऐ ।

भद्रवाई शब्द	लिंग	इक वचन	बहु वचन	डोगरी
सप्प	पुलिग	सप्प	सप्प	सप्प
वर	नपुंसक	घर	घरां	घर
भूत	“	भूत	भूतां	भूत
दार	“	दार	दारां	दर्वाजा
दुद	“	दुद	दुदां	दुद्ध
गिह	“	गिह	गिहां	गिहड़
कुल	“	कुल	कुलां	कुल
अम्ब	पुलिग	अम्ब	अम्ब	अम्ब
मैनु	“	मैनु	मैनु	मानु
बदाम	“	बदाम	बदाम	बदाम
हत्थ	“	हत्थ	हत्थ	हत्थ
कुतर	नपुंसक	कुतर	कुतरां	कुत्ता
मट्ठ	“	मट्ठ	मट्ठां	जातक
तिहार	“	तिहार	तिहारां	तिहार

ए बड़े चवातै दी गल्ल ऐ जे भद्रवाई ते गुजराती बि
नपुंसक लिंग प्रायः मते थारें इक्कै नेए थोन्दे न ।

भद्रवाई	गुजराती	लिंग	डोगरी
दुख	दुख	पुलिंग	(दुःख)
सुख	सुख	नपुंसक	(सुख)
अनाम	इनाम	„	(अनाम)
अस्मान	आस्मान	„	(श्मान)
गुमान	गुमान	„	(गमान)

डाक्टर वर्मा जी दा बचार ऐ जे भद्रवाई बिच नपुंसक लिंग दा अस्तित्व कायम रौना दसदा ऐ जे नाड़ा सर्वन्ध इण्डो-जर्मन मूल कन्ने ऐ ।

हूए संस्कृत गुजराती ते भद्रवाई दे बिच कई शब्दों दा लिंग नपुंसक, ते उन्दा रूप इक समान होना बड़ी हुरानगी दी गल्ल ऐ ।

कुत्थें गुजरात ते कुत्थें भद्रवा, हजारें मीलें दा अन्तर ऐ । पर ए इक समानता दी गल्ल बी इक अजूबे कोला घट्ट नई ऐ ।



डोगरी साहित्य दा लेखाजोखा

सर जार्ज ग्रियर्सन नै भारत वर्षे दी सारिएं भाषाएं दा सर्वे (Survey) कराया ते छड़ा इन्नां गे दस्सेआ जे डोगरी भाषा पीर पञ्चालै दे खल्ल खल्ल जम्मू प्रान्त, चम्बा ते कांगड़ा जिले बिच बक्खो बक्ख रूपे बिच खिल्लरी दी ऐ । ग्रियर्सन होरे बाइबल (ईसाइएँ दा धर्म ग्रन्थ) बिचा इक कथ लैती (Prodigal Son फजूल खर्च जागत) ते उसी भारत वर्ष दे सारे लाके बिच भेजेआ । सारिएं भाषाएं उप-भाषाएं ते बोलिएं बिच नुआढ़ा अनुवाद कराया । भाषा विज्ञाने दे हसाबै सिर क्रिया, सर्वनाम, संज्ञा, उपसर्ग आदि

शब्दें बिच जित्थे किश भेद बभोआ ऊए चुनी चुनिए डोगरी भाषा दा रूप खडेरि ओड़ेआ । पर डोगरी सर्वन्धी इस जतनै गी अस डोगरी भाषा दा विकास, जां इतिहास नई आखी सकदे । इआं गै किट्टी कीती दी कत्थें, खुआनै गी डोगरी साहित्य आखी ओड़ना किश मनै नई लगदा । इसी डोगरी दा लोक साहित्य आखी सकनेआं । सेरामपुर दे पादरिएं (New Testament) (बाइबल दा नमां रूप) दा अनुवाद सारिएं भाषें बिच कराया । १८७६ ई० बिच नाढ़ा डोगरी बिच बी अनुवाद होआ । इस भाषा दा नां उन्हें 'डोगुरा' जां 'जम्मू' रखेदा ऐ । डोगरी भाषा दी छी दी भाए ईऐ पहली पोथी होऐ ।

डा० ब्यूलर होरें लीलावती (संस्कृत भाषा दी हसाबै दी पोथी) दे डोगरी अनुवाद दी गल्ल कीती दी ऐ । पर ए पोथी कुतै लब्बी नई । सर फ्रेड्रिक ड्र्यू होरें Jammu Kashmir Territories नां दी पोथी बिच रियासत जम्मू कश्मीरै दा भूगोल लिखदे डोगरी भाषा, ओदी लिपि, ते व्याकरणै सर्वन्धी थोड़ी मती जानकारी दिती दी ऐ ।

डा० A. C. Woolner जेड़े पञ्जाब यूनिवर्सिटी दे उपकुलपति हे डा० गौरी शंकर जी दे गीता दे डोगरी

अनुवाद दी भूमिका बिच लिखदे न । “डोगरी पञ्जाबी दी गे
इक बोली ऐ, ते जम्मू रियासत दे दक्खनी लाकें बिच बोली
जन्दी ऐ । डोगरे लोक बहादर शपाही लोक हुन्दे न । ए लोक
अपनी पढ़ाई या विद्या करी पसिद्ध नईं । Linguistic
survey of India बिच दित्ते दे डोगरी दे किछ नमूनें गी
छोड़िए डोगरी दा कोई साहित्य नईं । डा० गौरा शंकर
हुन्दा गीता दा डोगरी अनुवाद डोगरी भाषा दी साहित्यिक
समर्था दा नमूना ऐ” ।

स्वर्गीय महाराजा रणवीर सिंह हुन्दे समें बिच डोगरी
राज-भाषा बनी । दफतरें दा कम्म-काज डोगरी बिच होत
लगा, फौजें दे हुकम ते किश पसिद्ध ग्रन्थें दे अनुवाद हिन्दी
संस्कृत निष्ठ डोगरी भाषा बिच होए । पर ए बड़े चर्ज
दी गल्ल ऐ, जे डोगरी भाषा दा कोई साहित्यिक कम्म
नईं होआ । कोई कवि जां लेखक डोगरी भाषा दी साधना
करने आला नईं होआ ।

बसोहली दे दत्तू कवि हुन्दा ‘कमलनेत्तर पसिद्ध ऐ ।
दत्तू हुन्दे कुलै बिच पं० गंगाराम जी होए जिन्दी कविना
“कण्डिया दा बस्सना ।”

बाजरे दी राखी करी डंगर डराइ करी
चिड़ियां डुआरी करी, कीयां २ कत्तना
क्रोह जाई पानीं भरी, पत्थरें इच पैर भन्नी
ढक्किआ दा दुःख भैयों कुसी जाई दस्सना

डोगरी कविता दा पहला फुल ए ।

रामधन हुन्दी

सुनी लै रामधना प्रीतै दी रीता गी ।

लड़कना कच्चिया तन्दै कने ।

पंगती डोगरी कविता दा बड़ा शैल नमूना ए । इन्हें
इक दौ टोकमें नमूने कोला बक्खरी कोई लिखत रूपे बिच
डोगरी कविता जाँ लोकबार्ता नई' लब्दी ।

अपने डोगरे देसँ गी पशेंडे दिखिऐ पं० हरदत्त होरें
गलाया—

तेरा कीयां गजारा होग

ओ डोगरेआ देसा

संसारें दे लोकें अग ते पानी कःनें समुन्दरें बिच जहाज
चलाई ओड़े, पर तुसँ डोगरें शड़ा तमाकू पीना गै सिक्खेआ ।
ईऐ नेए ताने मीने मारी मारी उन्हें डोगरें गी अगें बदने
आस्तँ डोगरी कविता कीती ते डोगरी दा साहित्य बनाया ।

डोगरी भजन माला नं० १ ते २ डोगरी साहित्य दे कीमती रतन न । उन्दे पिछुआं भगवत प्रसाद साठे ते दीनू भाई पन्त होरें डोगरी भाषा बिच 'कुड़में दा लामा' ते 'गुतलू' कहानी ते कविता लिखिएँ डोगरी साहित्य दी उन्नति दा मुण्ड पाया । दीनू भाई दे 'वीर गुलाब' नै डोगरें गी भुनकेया ते गूढ़ी नीन्दरा दा बभालेआ । नमीं चेतना दा फणाका कराया ।

भारत देसै दी बण्ड के होई, जे जुग गे बदलोई गया । हकूमतां होर होई गइयां, ते सोचने दे तौर तरीके बी नमें आइ गए । मातृभाषा बिच पढ़ाने दी गल्ल सबनें दे मनें लग्गी । सरकारें बी ए गल्ल मन्नी लैती । इस नमीं चेतना नै डोगरी भाषा गी मता सहारा दित्ता । रेडिओ उप्पर बी डोगरी दा प्रचार होन लगा । साहित्यिक संस्था "डोगरी संस्था" नै इस घासँ बड़ा गे कम्म कीत्ता ऐ । कविता कहानी, नाटक उपन्यास ते निबन्ध सारे पासँ गे गहमा गैमी लबन लग्गी पई ऐ । कई ग्रन्थें दे डोगरी अनुवाद बी होई गए न । भर्तृहरि दे नीतिशतक दा कविता बिच अनुवाद श्री रामनाथ शास्त्री होरें कीता ऐ । पञ्चतन्त्र दा अनन्तराम शास्त्री होरें, श्रीमद्भागवत गीता दा ठा० रघुनाथ सिंह सम्याल ते परसराम नागर होरें कविता बिच, दुर्गासप्तशती

दा पं० कृपाराम शास्त्री होरें, अनुवाद कीता ऐ । ए पोथियां छपी गई दियां न । वैराग्य शतक, (रामनाथ शास्त्री) बेताल पच्चीसी (श्याम लाल शर्मा) हितोपदेश (रामनाथ शा.) गीता प्रवचन (डोगरी संस्था) ए पोथियां अजे छपने आलियां न । स्वामी ब्रह्मानन्द जी नै वेदान्त शिक्षा डोगरी कविता बिच छपाई ऐ । गूंगे दा गुड़, मानसरोवर, गुप्त गंगा, अमृत वर्षा ते ब्रह्मसंकीर्तन इनें पोथिएं दे नां न । मधुकर हुन्दियां नमियां मिऊजरां, पं० शम्भूनाथ हुन्दी भड़ास, दीनू भाई दी 'दादी ते माँ' तारामणि हुन्दा फौजी पिन्शनर डोगरी कविता दी उन्नति ते बादे दे शैल नमूने न । डोगरी गद्य आले पासै 'पहला फुल्ल' भगवत्प्रसाद साठे हुन्दा रेआ । 'सूई धागा' (ललिता महता) 'पैरें दे नशान' (राम कुमार अबरोल) 'खीरला मानू' (मदन मोहन) कोलें दियां लीकरां, (नरेन्द्र खजूरिया) काले हत्थ (वेद राही) डोगरी लोक कथां (बन्सी लाल गुप्ता) इक हा राजा (डोगरी संस्था) जितमल बलिदान, गुलाब नामा ते नमियां पौंगरा (डोगरी मण्डल) कहानी दे खेतरे बिच पसिद्ध पोथियां न ।

नाटकें आलें पासै (डोगरी संस्था) दा 'नमां ग्रां' वेद राही दा 'घारें दे अत्थरु' ते प्रशान्त हुन्दा 'देवका जन्म' बड़े शैल ते रंग मञ्च उप्पर कई बारी खडोए दे नाटक न । सारें कशा

बड्डी ते जरूरी गल्ल ए होई ऐ जे जम्मूं कश्मीरें दी सरकारें
 “साहित्यिक अकाडमी” बनाई ऐ । साहित्य ते संस्कृति दे
 प्रचार ते बादे गीतें इऐ नई संस्था दा होना बड़ा गै जरूरी
 हा । डोगरी भाषा गी किश सरकारी मदत थोग ते श्री
 लेखक जेड़े अपनी पतली माली हालतू करी अपनी पोथी नई
 छापी सकदे उन्हेंगी छापिए डोगरी भाषा दी सेवा करी
 सकडन । इस अकाडमी नै नीहारिका, प्रातकिरण, मधुकर,
 अरुणिमा ते मगधूलि पञ्च कविता संग्रह छापे न ।

डोगरी भाषा दी साहित्यिक गति-विधि ते नमे बनदे ते
 छपदे डोगरी साहित्य दा लेखा जोखा करने गीतें त्रों म्हीन
 पिशुआं इक पत्रिका निकलदी रई । पर किश चिर चलिए
 खड़ोई गई ऐ । इसी चालू करने दी बड़ी लोड़ ऐ ।

समालोचना दी बक्खी बी खाली नई ऐ । वेद राही
 होरें ‘जगदियां जोतां’ ते ‘डोगरी लोक गीत’ उर्दू लिपि बिच
 लिखिए डोगरी कविता ते कविएं दा शैल परिचय दिता ऐ ।

किन्ने गै ग्रन्थें दियां पाण्डु लिपियां तयार न । डोगरी
 गोष्ठिएं बिच इनें ग्रन्थें दे अंश कई बारी पारखिएं सुने
 सराहे न । ईआं बभोन्दा ऐ जे डोगरी भाषा अपने पं
 खड़ोई गई ऐ, ते इसने अपने गीतें मानें दा थार बनाई लें

ऐ । डोगरी दे साधकें ते प्रेमिएं दे जतन हुन्दे रए तां
डोगरी भारती भाषें बिब अपना थार जरूर गै बनाई लैग ।
डोगरी लोक गीतें दा संग्रह (श्री राम नाथ शास्त्री हुन्दे द्वारा)
डोगरी लोकोक्तियां ते मुहावरे (तारा समैल पुरी हुन्दे द्वारा)
डोगरी निबन्ध (श्री श्याम लाल ते शक्ति जी हुन्दे द्वारा) ते
प्रशान्त, नरेन्द्र, मदनमोहन ते वेद राही हुन्दे उपन्यास दसदे
न जे डोगरी बिच प्रौढ़ चिन्तन ते गम्भीरता आवा करदी ऐ ।

रेडियो स्टेशन आले किश बन्धू डोगरी शब्द कोश बनाने
आले पासै जी लागे दे न । डोगरी गोष्ठो नै डोगरी गद्य बिच
इक रूपता आननै गीतें बचार ते गूढ़ी सोच करिए सारे
डोगरी प्रेमी ते साधकें गी किट्टे करिए डोगरी गी स्टैंडर्ड
भाषा बनाने दे जतन शुरू करी दित्ते न ।

डोगरी भाषा दा औने आला समां मतिएं हीखिएं ते मेदें
आला समा बभोन्दां ऐ ।



डोगरी शब्दें बिच इकरूपता

पं० दत्तू, गंगा राम ते रामधन हुन्दा लाये दा डोगरी भाषा दा बी भायें रक्कड़ भूमि बिच सुकदा सड़दा रेआ, पर पं० हरदत्त हुन्दा जल त्रौंका पाइऐ डूरी पेआ, ते हुण दीन भाई, शास्त्री, स्मैलपुरी, यश, प्रशान्त, राही ते शक्ति हुन्दी साधना कन्नै पौंडरिए मनमोहनी बाशना देन लई पेआ ऐ । पौंडर ते कुंगलियां पुम्मलियां दस्सै दियां न, जे फल बी शैत गै होडन । बाकी हनेरी भक्खड़ ते बिच्चै दे कीड़े दा डोगरी हुन्दा ऐ । हनेरी भक्खड़ दा ते कोई इलाज नई, पर बिच्चै कीड़े गी खोतरिए कड़ी ओड़ना लोड़चदा ऐ ।

डोगरी, बोल चालैगी भाषा थुआं गैं बदांदी, साहित्यिक भाषा तोड़ी पुज्जी पई ऐ, ते अगो बदनै गीतै खेंतर बड़ा बड़ा ते खुल्ला ऐ । हुए रुकने, पिशलियां कमियां घोखने ते पछोताने दी लोड़ नई । रस्ता पहरा होई गेदा ऐ, नभक्क होई ऐ गैं पुटदे गैं जाना चाही दा ऐ ।

जमाने दी बाऊ, ते शिक्षा दे नमें असूलें मजूब, जातकें गी तुआड़ी माऊ दी बोली बिच गैं पढ़ाना ठीक नियम ऐ । जेड़ियां गल्लां जातक माऊ दी लोरिएं बिच सिखदा ऐ, ओ उसी मौरी दे दुद्धें आड़ू तृप्त करने आलियां हुन्दियां न । दुनियां बिच सारै पासै ईऐ नियम बर्तोऐ करदा ऐ । साड़े भारत वर्षे बिच गैं कई सूबे बिच मातृ-भाषा बिच एम, ए तोड़ी पढ़ाई दी योजना चला करदी ऐ । साड़ी गौरमिण्टै बी, ए नियम मन्नेया हा, पर पहली दूई पोथी छापिए गैं चुप्प होई गई ऐ । अगड़ी गैं पुटदी गैं नई । जक्को तक्के पता नई कैदे न ।

अंग्रेजी कोला बद स्मृद्धि आली केड़ी भाषा होनी ऐ ! सारी गैं दुनियां बिच, ते सारे पासै गैं नाड़ी मानता ऐ । बोल-चाल ते लिखत-पढ़त बी मती नाड़े बिच गैं हुन्दी ऐ । बोलने बिच आयरलैण्ड दे बासी, ते इक लन्दन बासी दी भाषा

बिच लक्खें हथें दा फर्क होग, पर दवें जने जिसलै बी. बी. सी. दे रेडियो टेशना परा अंग्रेजी बिच भाषण देङ्ग, जां लेख पड़्डन, तां इक्के नेई गें अंग्रेजी बोलडन । लिखने बिच इक अमरीकी प्रोग्राम शब्दें दे हिज्जे पी० आर० ओ० जी० आर० ए० एम० करग पर अंगरेज पी० आर० ओ० जी० आर० ए० एम० एम० ई० गें करग । बोलने बिच दवें इकै नेआ गे बोलडन पर लिखने दी भाषा बिच इक अंग्रेज पूरा जोर लाग जे प्रोग्राम शब्दें दे हिज्जे सारी दुनियां बिच ऊए रौन जेड़े ओ लिखदा ऐ । अमरीका आलेंगी छोड़िए जां बेसिक अंग्रेजी आलेंगी छोड़िए सारे एम० एम० ई० गी गें तर्जीह देडन ।

इंगलैण्ड दे वेल्ज, स्काटलैण्ड, बिस्टल जा मानचैस्टर दे इलाकें बिच भामें किन्ने गें स्लैंग (Slang) काकनी (Cockney) रूप थोंडन, ते रौजें दे ब्यारा बिच बोलदे बी लबडन पर लिखत भाषा सारे (King's English) जां स्टैण्डर्ड अंग्रेजी गें लिखडन । कई विद्वान इसी भाषा दा जकड़ना, माया जाल, ते मूरखता आखदे न । पर भाषा दे विद्वान ते पराने ऋषिएं बी भाषा दे इनें निममें गी मन्तिऐ गें नाड़े उप्पर फुल्ल चाड़े न । ऋषिएं विद्या दी महमा गाइ

ते अविद्या दी बी स्तुति कीती । ओ गलान्दे न जे अविद्या
ते विद्या दौनै दा गै बड़ा महत्व ऐ । विद्या मोक्ष दिन्दी ऐ
ते अविद्या बी मौती थुआं खलासी करान्दी ऐ ।

जोका (Narrow Transcription) जां तात्त्विक
निरूपण दा बड़ा रवाज चलेदा ऐ । जीआं बोलो, ऊंआं गै
लिखो । अस दिखनेआं जे साड़ी पोथिएं बिच जां, विद्वान
लोके दी भाषा बिच 'मन्त्र' थोग । पर जातकें ते आम
जनता बिच 'मन्तर' गै बलोन्दा ऐ । कोई 'मन्त्र' नई
बोलदा, पर लिखने बिच 'मन्त्र' गै लखोन्दा ऐ । भाषा
विज्ञान दी जिसलै बड़ी तरक्की होई, ते बोलने दी पद्धति
(Phonetic Transcription) दा मता प्रचार होआ, तां
अगली पीढ़िएं भट आखना जे अस बोलने मन्तर आं, तां
लिखने बिच 'मन्त्र' की लिखचें । अस मन्तर गै बोलगे, ते
मन्तर गै लिखगे । ईआं व्याकरण भाषा विज्ञान ते जन
साधारण दे ज्ञान बिच, मता बखेड़ा पई जन्दा ऐ । पर
दिखेआ जा तां साहित्यिक भाषा, ते बोल-चाल दी भाषा बिच
फर्क जरूर गै रौन्दा ऐ । संस्कृत दे नाटकें बिच बी शुद्ध
संस्कृत दे कन्ने कन्ने, मतिएं प्राकृत बोलिएं दा इस्तेमाल होए
दा ऐ । इस करी भाषा विज्ञान दे बहु विद्वान डा० सिद्धेश्वर

बर्मा जी दा आखना ऐ जे, तात्त्विक दृष्टिकोण गो सामने रखचै, तां जातकें आस्तै दूई जमाता तोड़ी 'मन्त्र' गो 'मन्तर' गै लिखेआ लोड़चदा ऐ ।

'डोगरी शब्दें बिच इक रूपता दी गल्लै उप्पर, कई मित्तरें दो ऐ तर्क ते हुन्दी ऐ, जे "के पिद्दी ते के पिद्दी दा शोर्वा" डोगरी बिच हजें ऐ के ऐ, जे शब्दें दी इकरूपता दी समस्या आनी खड़ोती ऐ । बोलना ते सिक्खो, चिट्ठी पत्तरिएं बिच ते बतों ते किश लिखिए दस्सो, फी शब्दें बिच इकरूपता बी करी लैआ । दूइए भाषें दा बड़ा साहित्य दिक्खिए, उन्दा इआं ग्लाना ठीक गै बभोंदा ऐ । पर भाषा करोड़ें लोके दी भाषा होऐ, जां लक्खें हजारें दी, जिसलै उसी लिखगे नुआड़े लिखने बिच इकरूपता होनी गै लोड़चदी ऐ । भाषा विज्ञानें दे नियमें उप्पर जाचै, तां दस्सैं मीलें परैन्त बोली बिच फर्क पई जन्दा ऐ । ईआं ते इक इक शब्दें दे कई रूप होई जाडन । इक्के प्रान्तै बिच बस्सने आले लोकें गो इक्के भाषा पढ़ने बिच ते लिखने बिच भर्म पौडन, ते किश थौ नई आँग । कवि लोकें गोते अंआं गै खुल्ली छुट्टी हुन्दी ऐ ? जे चान, जीआं चान लिखन । बोलने बिच कोई कुसैगी इक्कें चाली बोलने उप्पर मजबूर नई करी सकदा । पर जित्यों तोड़ी चिट्ठी पत्तर

कथ कहानी जां उपन्यास निबन्ध आदि लिखने, दा सर्वन्ध ऐ गद्य लिखने बिच ते शब्दें दी इक इकरूपता लोड़चदी गै ।

डोगरी दे किश मन्ने तन्ने दे लेखकें ते सोच बिचार करने आलें बड़ए, किश शब्दें उप्पर सोच बिचार करिए उन्नैगी इकरूपता देने गीतै जतन कीता ।

ए जतन बिद्वमाता दे अक्खर ते ऐ नई, जे ए अन्तिम ते अकाट्य न । जे ए खीरले निश्चय न, ते इन्दे पर कोई बैस नई हो सकदी मते । बोलने आले, मते लिखने आले ते मते सोचने आले जिसलै मता प्रयोग करडन, तां आपूँ इकरूपता आई गै जाग । पर तां तोड़ी हनेरे बिच डांडा मारने दी के लोड़ ऐ । किश शब्दें दी इकरूपता हुणें थुआं मन्निऐ चलना बड़ा जरूरी ऐ ।

१. था, सा ते हा ए त्रैवै शब्द, डुगार देसै बिच 'था' दे अर्थ बिच बोले जन्दे न । हुण जातकै गी, पहली दूई पोथी बिच के पढ़ाचै ? 'था' उधमपुरै थुआं उप्पर २ थोड़े इलाके बिच ब्लोन्दा ऐ । 'सा' पंजाब कन्ने लगदे इलाकें च ब्लोन्दा ऐ । ते टकोदा पंजाबी दा प्रभाव ऐ । 'हा' मता प्रचलित ऐ ते नाड़े बोलने दा खेत्तर बी मता ऐ, इस करी 'था' दे अर्थें बिच

डोनरी गद्य बिच 'हा' दा प्रयोग गै मन्नी लैना लोड़चदा ऐ ।

२. बार, भार बहार ते बहार वसन्त ऋतु आस्ते लखोन्दे न । डोगरी बिच इक ऐसा लहजा ऐ जेड़ा न ते 'हा' ऐ न गै 'आ' । इनै दौनों ते बरकार इक ध्वनि ऐ । भाषां विज्ञाने दी लिपि । (Phonetic Transcription) बिच नुआड़ा चिन्ह ऐ । पर डोगरी कशा ओबड़, जां जातकें गी कीआं लिखिए दसना होआ ? चिन्हें दे सहारै चलचै, तां ते मते गै चिन्ह नाने पौन्दे न । ते भाषा मती प्लेचदार होई जन्दी ऐ । वसन्त ऋतु दे सर्वन्धे बिच बार (दिन विशेष आस्ते) भार (डोगरी बिच ए हिन्दी ध्वनि दा ए शब्द नई हुन्दा । एहदा अर्थ बोझ ऐ) बहार दी ध्वनि ठीक ऐ । पर ईआं द्वित्व शब्दें दी भरमार होई जाग । इस करी बहार रूप गी मन्नी लैना लोड़चदा ऐ । देवनागरी लिपि अपनाने करी डोगरी आस्ते बहार रूप मनने बिच मती सखल्ल ऐ । इआं गे पाड़, प्हाड़, ते पहाड़ शब्दें बिच पहाड़ रूप गै ठीक ऐ ।

३. गीतें, च, गीतें इच, ते गीतें बिच (हिन्दी-गीतों में) ए त्रैवे इन्ने प्रचलित न जे त्रैवे ठीक बभोन्दें न । फी बी गद्य

बिच 'गीतें बिच' प्रयोग कीता जाना लोड़चदा ऐ । नि, नें, नई, नेई ते नैई ए सारे नकारात्मक भाव बिच बर्तौन्दे न । पर डोगरी गद्य गीतें स्टैंडर्ड रूप 'नई' ते 'नेई' मन्नी लेना चाही दा ऐ ।

ईआं गै नैऊ 'नइऊ' 'नइयु' ते 'नेइयों' बिच 'नेइऊ' ते 'नेइयु' गी बर्तना लोड़चदा ऐ ।

५. अपने नेए, ते अपने ने (अपने जैसे) बोलने बिच 'ने' दे पिशुआं 'ए' दी ध्वनि बोदी आले तारे दी बोदी आंडू इक लमकोन्दी बाज जरूर दिन्दी ऐ । पर दवें इक्कै नेई ध्वनि आले दौं अक्खर बी किश नमीं गै समस्या बनान्दे न, इस करी सोच बचार करिए ऐ निश्चा कीता जे असली रूप 'जनेह' दा गै प्रयोग कीता जा । 'अपने जनेह' (अपने जैसे) बिच, ए दे पिशुआं ह ध्वनि बड़ी जरूरी लवदी ऐ । इक वचन बिच 'नेआ' गै ठीक ऐ ।

६. सई, सैई, संई (सोना) सही (ठीक) इन् रूप् बिच सही दा प्रयोग 'ठीक' दे अर्थ बिच ठीक ऐ । सोने दे अर्थ बिच दूआ ते त्रीया दवें ठीक लगदे न । फी बी 'सेई' रूप गी मान्यता देनी लोड़चदी ऐ ।

७. जेहड़ा, जेड़ा ते जड़ा इन् त्रीणों बिच बोलने आले दा

लहजा गै 'ह' ध्वनि गी भुगताई लै तां ठीक ऐ । पहला रूप पंजाबी बिच गै आम प्रयोग बिच औन्दा ऐ । त्रीया रूप बी कई इलाकें बिच थोन्दा ऐ । पर 'जेड़ा' रूप गी गै मान्यत देनी चाही दी ऐ ।

८. 'लभदा' ते 'लबदा' इआं गै 'लब्भा' ते 'लब्बा' बिच 'लबदा' ते 'लब्बा' गै प्रयोग लोड़चदे न । बोलने आले लहजा गै 'ह' दी छाया दई लैग ।

९. कीआं ते कीयां । 'कीआं बी मता ब्लोन्दा ऐ पर 'इ' दी दीर्घता गी मता करो तं 'य' ध्वनि बिच बदली जन्दी ऐ । इस करी कीयां जादा ठीक ऐ ।

१०. औन्दी, आऊंदी ते आओन्दी इनें त्रौणें बिच सखल्ला प्रयोग 'औन्दी' गै बभोन्दा ऐ । पहले गी गै मान्यत देनी चाही दी ऐ । ऊआं त्रैवें ठीक न ।

११. बुड्डा, बुड्डा ते बुडा बिच पहलें रूपगी मानता देनी चाही दी ऐ । इक मद्धम नैइ हकार दी छाया जरूर ऐ, बोलने आला इस लहजै गी आपू गै भुगताई लैन्दा ऐ ।

१२. दपहरीं ते दपैरीं । इस शब्द बिच हकार नै टकोदा ऐ जे 'दपहरीं' शब्द बर्तौना ठीक बभोन्दा ऐ ।

१३. शड़े ते छड़े, शतरी ते छतरी, शज्ज ते छज्ज, शुहारा ते छुहारा इत्यादि दवें रूप थोन्दे न । मता बचार होआ ते निश्चा ए होआ, जे जां श कने छ शुरू होने आली ध्वनि गी छ ध्वनि कने लिखेआ जा । बिच जां पिछुआं आने आले श जां छ गी भाएं श लिखो ते भाएं छ । मसाल आस्तें 'पिशुआं' ते 'पिछुआं' दवें ठीक न । ईआं गें "नुआड़े कशा" ते 'नुआड़े कछा' दवें ठीक मन्नी लैने लोड़चदे न ।

१४. जाइऐ, जाइए, जाइयें बिच पहलें गी मन्नेआ लोड़चदा ऐ । दूआ रूप बी कईं बोलदे न, पर मता पहला गें बलोन्दा ऐ । त्रीये बिच य-दी छाया जरूर ऐ पर पहला ए बी भुगताई लैन्दा ऐ ।

१५. रेआ ते रेया । ए दवें रूप इनें प्रचलत न, जे किश फर्क नईं बभोन्दा । फंसला होआ जे ओ शब्द जिन्दे बिच दो आ किट्टे औन जीआं आया, गाया, माया, खाया इत्यादि उन्थें दूआ रूप या होई जाग । बाकी शब्दें बिच आ गें ठीक ऐ । जीआं रेआ, नोआ, दीआ इत्यादि ।

१६. बड्डे लै ते बड्डे लै

लै बैल्लै शब्द दा संक्षेप ऐ । बड्डे ते बड्डे विच ऐ ध्वनि गै ठीक बभोन्दी ऐ । 'बड्डेले' ते टकोदा पंजाबी ऐ । 'बड्डे लै' गै ठीक ऐ ।

१७. टोरी ओड़े ते टोरि ओड़े

टोरी ओड़े ठीक ऐ । पर 'जनानीएं दा' ते 'जनानिए दा' विच दूआ रूप ठीक बभोन्दा ऐ । विशेषण दा वचन संज्ञा दे वचन अनुसार गै बदलना लोड़चदा ऐ ।

१८. रौहना, रौना, रौणा

'ह' दी छाया मसूस हुन्दी ऐ । फी बी 'रौना' गै ठीक समझोआ । ए दा डोगरी विच अपना खास थार ऐ जीआं मीणा (ताना) ।

१९. सवा सुवा, सिवा ते सुआ

सिवा ते टकोदा फारसी दा शब्द ऐ । सुआ ते सवा विच दूआ फी बी बर्लोन्दा ऐ । पर 'सवा' दा प्रयोग मन्तना लोड़चदा ऐ ।

२०. इन्हें ते इन्

पहले बिच ह दा ध्वनि ते ऐ । पर फैसला होआ जे दूआ रूप ठीक ऐ ते ह-दी-छाया बोलने आला आपूँ गें पूरी करी लग ।

२१. धना दे लालचै, धनै दे लालचै

दवै रूप प्रचलत न । पर 'धनै दे लालचै' डोगरी भाषा दा खास भलाका दिन्दा ऐ ।

२२. हत्थुएं दे ते अत्थुएं दे; हिरख ते इरख

इन्दे बिच बी न ते ह ऐ ते न गै 'अ' ऐ । दोनै दे बशकारली ध्वनि ऐ । ए डोगरी दो खास विशेषता ऐ । चिन्ह कोई लाना नई इस करी ह दा पासा भारा रोन्दा ऐ । 'हत्थुएं' ते 'हिरख' ठीक न ।

२३. उप्पर, पर, ते 'र

प्रसंगानुसार त्रै वै बर्तौन्दे न पर गद्य आस्तै "उप्पर" दा प्रयोग गै ठीक ऐ ।

२४. करने आलियां मूरतां ते करने आली मूरतां

विशेषण गी संज्ञा (विशेष्य) दे अनुसार गै अपना वचन बदलना चाही दा ऐ । पहला रूप ठीक ऐ ।

२५. अल्हड़ ते अल्लड़

‘ह’ दी छाया जरूरी ऐ, इस करी पहला रूप ठीक ऐ ।

२६. स्नेआ, सनेआ ते सनेहा

स ते न इन्ने कोल कोल न, जे पहला ठीक बभोंदा ऐ, पर मन ईऐ पक्केआ जे सनेआ शब्द गी मान्यता दिती लोड़चदी ऐ । स दा पूरा उच्चारण कीता जा तां ‘ह’ दी छाया दा समाधान होई जन्दा ऐ ।

२७. सरबन्धी, सम्बन्धी ते संमन्धी

त्रै वै रूप प्रचलत न, पर पहले बिच ‘र’दा पदार्पण डोगरी भाषा दी अपनी विशेषता ऐ । पहले गी मान्यता देनी लोड़चदी ऐ ।

२८. ओह ते ओ, केह ते के, एह ते ए

‘ह’ दी छाया मजूद ऐ पर ह दा कम्म बोलने कर्ने गै निकलना चाही दा ऐ । ओ (वह) के (क्या) ए (यह) रूपें गी मान्यता दिती जानी चाही दी ऐ ।

२९. कर्ने, कन्ने ते कण

दूआ रूप उच्चारण गी भलेआं स्पष्ट करदा ऐ । कर्ने गै गद्य बिच बर्तेआ लोड़चदा ऐ ।

३०. मिकी ते मिंगी

ग दे पासँ भक्का मता हुन्दा ऐ । मिकी बी बड़ा प्रचलत ऐ । 'मिंगी' गी मान्यता दिक्ती लोड़चदी ऐ ।

३१. परसन्न ते परसिन्न

पहला रूप ठीक ऐ । कई थारें दूआ रूप बी थोन्दा ऐ ।

३२. भलोखे, भलोके ते पलोके (प्राचीन समें दे)

ख, आला ते बिल्कुल छोड़ी ओड़ना चाहीं दा ऐ । भलोके इस्तेमाल करना चाही दा ऐ । भ उस ध्वनि दा कम्म दई जन्दा ऐ जेड़ी 'प' ते नई पर प' दा कम्म दिन्दी ऐ ।

३३. मन्तर ते मन्तर, बस ते बैस

पहले रूप ठीक न । कई थारें 'ऐ' अपनी विशेषता जरूर दसदा ऐ ।

३४. थुआटना ने ठुआटना, थुम्न ते ठुम्न
दौनें दा प्रयोग ठीक ऐ ।

३५. स्भा, सुभा, ते सबा

अपभ्रंश दी गति दी दृष्टि कन्नें दूआ रूप ठोक
समझोन्दा ऐ ।

३६. तत्सम शब्दें दे बारे बिच ए निश्चा होआ जे उन्दे
रूप बदलने दी लोड़ नई, जे लोड़ पवै ताँ दूई भाषा दा
शब्द ओदे तत्सम रूप बिच गै लई लेना चाही दा ऐ ।

शब्दें दी इकरूपता निश्चित करना कोई इकरूपता आदमी दा
कम्म नई । मते भ्राएँ दी मदत दी लोड़ ऐ । डोगरी दे हित
चिन्तक डोगरी दे साहित्य गी पढ़न सुनन ते अपने जीवनै बिच
आनन तां आपूँ गै इकरूपता आई जाग । कोई खास जतन
नई करना पौग ।

डोग भाषा दी स्मृद्धि दे उपा

आजाश्रय नेआ वातावरण हुन्दा ऐ जेड़ा कुसै बी भाषा
 गोड़ा चकदा ऐ । अस संस्कृत साहित्य गो दिखचै
 तां गल्ल बड़ी प्रतक्ख सेई हुन्दी ऐ । गुप्त वंश दे समे
 कदास, अमरसिंह, वर-रुचि, वराह-मिहिर, धन्वन्तरी ते
 क जनेह कवि, कोशकार, ज्योतष विद्या ते हिकमत दे पुज्जे
 गिन होए ।

अशोक दे समे बिच ए कृपा दृष्टि प्राकृत भाषा उपपर
 है, तां जातक ग्रन्थ, पिटक ग्रन्थ ते बुद्ध धर्म दा प्रायः सारा
 हित्य प्राकृत भाषायें बिच लखोआ ।

विजया नगर दे हरिहर राय ते बुक्का हुन्दी छतर छाया
बिच सायणाचार्य होरें बेदें उप्पर भाष्य लिखेआ ।

गजनी दे महमूद बादशा नै फिरदौसी कशा गाहनामा
लखवाया हा ।

दूर की जाना, साड़े महाराजा रणवीर सिंह हुन राज
समें बिच जिस लै डोगरी गी किश सहारा थोआ, त राज
भाषा डोगरी होई गई, ग्रन्थ डोगरी बिच लखोए, एलार ते
बाहरा दा आने आले (इत्थूँ तोड़ी ज) अंग्रेज बी महाराज
हुन्दे कन्ने डोगरी बिच गल्लां करना फखर समझदे हे ।

पर दूए पासै दिखचै तां तुलसी दास होरें राम चत
मानस लिखेआ ते हिन्दी गी अमर करी ओड़ेआ ।
“स्वान्तः सुखाय तुलसी रघुनाथ गाथा” लिखी ही । मीर
भगति गान ते सूरदास हुन्दा बालकृष्ण जी दा बालक
वर्णन भगति भावना दे टकोदे नमूने न । इन्ने गी कु
राजै दा सहारा नईं हा । किश अन्दरलो लगन ही, जि
करी नेआ शैल साहित्य निर्माण होआ ।

इस्से लगन कन्ने ब्राह्मण परिवारें भुक्खे भाने रेइए ते
पुश्त दर पुश्त जबानी गै वेदें गी जीन्दा ते सुरक्षित रखेआ ।

नईं ते अग्नेजें दा दमन-चक्कर संस्कृत भाषा गो खतम करी गेदाहा ।

इस प्रन्दरली लगन कन्नें राजें दा सहारा बी होऐ तां सुन्ने उप्प सुहागा होई जन्दा ऐ । डोगरी भाषा दी उन्नति आस्तै एबड़ा जरूरी ऐ जे बड्डे लोक डोगरी बोलन, डोगरी बिच चिो पत्तर लिखन, ते अपने रोजें दे कम्म काजें बिच डोगरी । इस्तेमाल करने बिच फखर समझन । बड्डे गो दिखिख हूऐ बी डोगरी दे बारे बिच श्रद्धा रखडन ते ईआं डोगरिउन्नति करग ।

हैं छापे-खाने नईं हुन्दे हे राजा लोक भुर्ज-पतरें उप्पर ग्रन्थखवान्दे हे । ग्रन्थ उसै राजे कोल हुन्दा हा । मती गल्लोई तां उस लेखका कोल हुन्दा हा । बाकी जनता गो दा कोई लाह नईं हा । अज इक लेख लिखो तां देस सारे पत्रें बिच छपी जन्दा ऐ । ओदी टीका-टिप्पणी हो बाकी होरनें गो बी जानकारी होई जन्दी ऐ ।

डोगरी भाषा दी उन्नति आस्तै समाचार ते मासिक दी मती लोड़ ऐ । जम्मू-कश्मीर सरकार ए कम्म ते हत्थ लै, ते जीआं भारत सरकार 'आजकल' ते 'बाल गती' कड्डा करदी ऐ । ईआं गै जम्मू कश्मीर सरकार

डोगरी बिच साप्ताहिक ते मासिक पत्र कड्डे, सस्ते मुल्ले
उप्पर बेचें । ओ एडे शैल ते लोक-प्रिय होने चाही दे न, जे
लोक उनेंगी तुप्पी २ पढ़न । जीआं 'चन्द्रकान्ता सन्त' पढ़ने
गीतें लोकें चा कर्ने हिन्दी सिक्खी ही । तां गे डोगरी भाषा
दा प्रचार होग ते ओ स्मृद्धि जाली बनग ।

सहाराजा रणवीर सिंह हुन्दे बेलै बाईबल दा अनुवाद
डोगरी बिच होआ । ज्योतिष, नीति ते धर्म श्रें दे
अनुवाद डोगरी बिच होए । लिपि, वर्णमाला बनी । गरी
बी भाषाएं दी पंगति बिच आई गई ।

डोगरी दी उन्नति आस्तै बड़ा जरूरी ऐ जे प्रसिद्धि
दे अनुवाद डोगरी बिच होन । भर्तृहरि दे शतक, रामग
बेताल पच्चीसी ते वेदान्त ग्रंथ ते पंचतन्त्र दा अनुवाद डोगरी
भाषा दी स्मृद्धि दा शुभ लखन ऐ ।

देस दे बक्खरे बक्खरे सूबें बिच उत्थुआं दी बोली
कविता बिच मुखरित करने आले कवि, लेखक ते गायक हु
न । राजस्थानें बिच जाओ तां आल्हा ऊदल, गोरा बादल
सांगा ते प्रताप दियां गाथां लोक गीतें बिच परोई दि
लोकेंगी पुराना इतिहास ते सनहरी जुग चेतै नुआंदियां न
ब्रज भाषा बिच बाल कृष्ण सर्वन्धी पद, कवित्त सर्व
मुकरणियां ते कवितां अज्ज बी भगति दी नदी बगांदि

न । ईश्रां गै साड़े देसै बिच दत्त कवि हुन्दा कमल-नेतर,
 राम धनै हुन्दी प्रीतै दी तन्द हरदत्त हुन्दा डोगरा देस ते
 अज्जै दे कवि शास्त्री, दोनू भाई, स्मैलपुरी मधुकर, सम्याल
 सम्भूनाथ अत्मस्त ते तारा चन्द डोगरी दा अत्था उच्चा करा
 करदे न । इने कविएं ते लेखकेंगी इक थार किट्टा करने
 आस्तै इक साहित्यिक संस्था दी लोड़ ऐ । इस संस्था दा
 मुख्य उद्देश्य साहित्य साधना गी सहारा देना होऐ । ओ इने
 कविएं ते लेखकें दी बाणी गी पुस्तक ते ग्रंथ रूपें बिच आनने
 दा बड्डा कम्म करै । साड़े किन्ने गै होनहार कवि ते
 लेखक प्रचार दा साधन नई होने करी, अपने भावें ते बचारें
 गी अपनी इक मात्र प्रति बिच सांबिए कुसै चंगे बेले दी प्रतीक्षा
 करा करदे न ।

डोगरी बिच धार्मिक साहित्य दा निर्माण होआ लोड़चदा
 ऐ । अपने धार्मिक ग्रन्थें दी कथा डोगरी बिचा होनी चाही
 दी ऐ । रामलीला ते हरिश्चंद्र, सर्वन कुमार नेए नाटक
 डोगरी बिच लखोने ते खडोने चाही दे न । डिबेटां (बैसां) ते
 भाषण डोगरी बिच होने लोड़चदे न । भाषण करने आलेंगी,
 नाटक खेड़ने आलें गी ते कवियें गी, खूब इनाम देने चाही दे न ।

रियासतें बिच साहित्य अकाडमी दी स्थापना बड़ा गै
 शुभ कम्म ऐ । युवराज कर्णसिंह नेए साहित्य प्रेमी ते

पारखी नुआड़े प्रमुख न, डोगरी भाषा दे भाग सराहने जोग न ।

डोगरी भाषा दी स्मृद्धि आस्ते इस भाषा दे 'अनुसन्धान कार्य' दी बड़ी लोड़ ऐ । डोगरी भाषा दा शब्द-कोष इस बेले दी पहली मंग ऐ । एदा व्याकरण सुन्दर पुस्तक रूप बिच लोड़चदा ऐ । एदे लोक गीत, प्राचीन कथां, कहानियां कारकां, भाखां, खोज करिऐ, संशोधन करिऐ, इक प्रमाणिक ग्रन्थ दे रूप बिच आनने दी लोड़ ऐ । इस अनुसन्धान शाला गी भाषा विज्ञान कन्ने सर्वन्ध रखने आले विद्वानों दी सहायता दी लोड़ ऐ । कुतै कुतै अपने भरोसै, ए कम्म शुरू बी होई पेदा ऐ, पर ए इक्क जा दौं व्यक्तिएं दा कम्म नईं । एदे आस्ते बक्खरे बक्खरे विषे दे मते विद्यार्थी लोड़चदे न । कोई लोक गीत तुप्पन, कोई कथां, ख्यानां ते मुहावरे किट्टे करन, कोई व्याकरण दे बक्खरे बक्खरे अंग सम्हालन, कोई उच्चारण सर्वन्धी भेद बक्खरे बक्खरे करन, कोई आक्सफोर्ड डिक्शनरी दे आधार उपपर शब्द किट्टे करन, इयां ए सारे जतन इक भाषा-विज्ञान दी बड़ी प्रयोग-शाला बिच होन तां डोगरी भाषा स्मृद्धि-शाली बनग ।

सारें कोला बड्डी गल्ल फिरी ऊऐ औन्दी ऐ, जे डोगरे तन-मन-धन कन्ने जतन करन, ते सरकारी सहयोग ते सहायता होऐ तां डोगरी दी स्मृद्धि तौले सम्पन्न होई सकदी ऐ ।

दूआ भाग

(संस्कृति)

संस्कृति

राष्ट्रीयता ते हिन्दी

वैष्णवों भोजन

छिन्ना ते अन्धविश्वास

गान्धी जी

संस्कृति

इस संसारै बिच अपनी अक्खीं सामनें सुखस्मृद्धि प्राप्त होऐ, मनै दियां सारियां गल्लां पूरियां होन, ते तन्दै कन्नें जीन होऐ, इऐ सुख ऐ। पर इन्ना किश हुन्दे होऐ बी इक बेसन्दोखी मनै बिच बनी दी गै रौन्दी ऐ। वासना पूरी हुन्दी जा तां अग्नि बिच घिओ पौन्दा गै जन्दा समझो। उस मते थुआं मता गै मकदे जानां ऐ। असली सुख वासना दे पूरे होने बिच नई, वासना दे शांत होने बिच ऐ।

संसारै दे भोगें थुआं रज्जिऐ बी, जिसलै अतृप्ति बनी रौन्दी ऐ तां मनुक्ख धर्मै आलै पासै तलोफां मारदा ऐ। पर छड़े श्रद्धा दे सहारै गै दुनियादारी दी लोड़ें दी पूर्ती नई

हुन्दी तां परतिए ओ संसारी उन्नति आलै पासै परतोन्दा
 ऐ । पर बुद्धि कन्ने सोचने उप्पर उसी बभोन्दा ऐ जे
 ए भला गोरख-धन्दा ऐ । छड़ा श्रद्धा ते धर्म उप्पर रवो
 तां बी सन्दोख नई हुन्दा, ते दुनियादारी दियां मौजां मारदे
 रवो तां बी सन्दोख नई हुन्दा ।

साड़ै समाजै दवै पक्ख दिक्खे दे न । “ऋणां कृत्वां घृतं
 विबेत्” बी “ते ब्रह्म सत्यं जगन्मिथ्या” बी । भलेयां बचाव
 करिए ईऐ तत्थ थोआ, जे सुख दुनियादारी दी बरतै बिच
 नई आत्मा बिच ऐ । इस करी धर्म ऊऐ चंगा जंड़ा इत्ये
 इस दुनियां बिच बी सुख ते चैन देऐ, ते अगगें बी परलोक
 सुधारै ।

संसारी दुख, आत्मा, ते इनें दौनें गो सहारा देने गिते
 ‘ब्रह्म’, ऐ त्रैवै होन तां सत्चित् ते आनन्द मिलिए सच्चिदानन्द
 बनदा ऐ । मनुक्ख लौका नेया ऐ, जिन्ना बी अपना फला
 (वस्तार) बड्डा करै उन्ना गै भला ऐ । ‘मैं’ दी भावना
 गो छोड़िए ‘असैं’ दी भावना ग्रहण करै । ‘मैं’ दी भावना
 दा त्याग गै बड्डापन ऐ । त्याग आवै तां स्वार्थ, वासना
 ते कामना भस्म होई जन्दियां न । ‘मैं’ छुड़कै तां मनुक्ख
 व्यक्ति थुआं ‘विश्वात्मा’ बनी जन्दा ऐ । फी उसी सारे अपना

रूप गै लब्धन लगी पौन्दे न । समाजै दे इऐ जनेह अंग होन तां फौज, पुलस ते कचैरिएं दी लोड़ बी नईं रौंदी । पर जदूं तोड़ी नईं दशा नईं औंदी समाजै दी व्यवस्था ते प्रबन्ध जरूरी ऐ । नाड़े गितै हिन्दू संस्कृति नै ए उपा सोचेया जे धन किट्टा करना ते राज प्रबन्ध चलाना, ए दवैं कम इक व्यक्ति कोला नईं होने लोड़चदे । इनैं दौनैं दे उत्पर त्यागी, स्वार्थहीन ते छलकपट थुआं परे रौने रहने आलें दा कण्ट्रोल होना लोड़चदा ऐ । तां समाजरचना ठीक चाली चलदी ऐ । भारती संस्कृति दी सारें कशा बड्डी गल्ल ईऐ जे समाजै दा हर इक व्यक्ति परमात्मा दा रूप ऐ ते समाजै दे इक इक व्यक्ति दी सेवा परमात्मा दी गै पूजा ऐ । ईऐ नईं संस्कृति दे सहारै चलाये दा समाज गै दुनियां बिच ऐसनी ते शान्ति कायम रक्खी सकदा ऐ ।

भारत वर्षे बिच रौने आला हर कोई हिन्दू नईं ऐ । बेदें ते स्मृतिएं जेड़ी समाजै दी धन प्राप्ति, शासन करने दी पद्धति, ते धर्में उप्पर चलने आली नीति बनाई दी ऐ, ओदे उप्पर चलने आला गै हिन्दू होई सकदा ऐ, । इस दुनिया बिच बी मर्यादा ते उन्नति गी चंगा समझै, ते परलोक भी सुआरै । आश्रम धर्म ते वर्ण व्यवस्था

गी मन्नै, आवागमन गी मन्नै, इन्दे उप्पर चलै, ओ हिन्दू हुन्दा ए । शङ्गे हिन्दुस्तानै बिच जस्मने, रौने, इत्थुआं दा लाबा लाने कन्नै हिन्दू नई बनी जन्दा ।

मनुक्खै दियां नेइयां कृतियां जां चेष्टां जिन्दे करी उस समाजै दा मान बदै, ओदी सोभा होए, उनें कृतिएं गी संस्कृति आखदे न । ओ कृतियां ते चेष्टां धर्म दे अनुसार होन तां सोभा हुन्दी ए । शरीर बल हनुमान, भीमसेन ते राममूर्ति हुन्दा बी ए, ते हिन्दुस्थानै बिच रौने आले 'गामे' दा बी ए । पर ब्रह्मचर्य ते धर्म दी सोभा बढाने गिते अस गामे गी भारत दी संस्कृति दा नमूना नई आखी सकदे । शरीर बल दी प्रशंसा करगे, ते अगली पीढ़िये गी उपदेश देगे, तां हनुमान बजरंगबली दी गै जय बोलगे !

धनसंग्रह करने ते खर्चने बिच इत्थे किन्ने गै सम्राट ते बादशाह होई गे, पर धनै गी धर्म ते समाज आस्तै लाने करी गै कर्ण, हर्ष, ते आमाशाह गी हिन्दू संस्कृति दा नमूना आखदे न । बुद्धि-बल ते बचार शक्ति दी गल्ल आवै तां चाणक्य, शंकराचार्य, विवेकानन्द ते गान्धी हिन्दू संस्कृति दी सोभा बधांदि न । जिन्ना, जां मौण्टबैटन हिन्दू संस्कृति दे नमूने नई होई सकदे ।

जेड़ी शक्ति ते शूरवीरता, शरीर बल ते पराक्रम,
बचार ते बुद्धि, धन ते सम्पदा धर्म ते शास्त्रों दे अनुसार
इस लोक ते परलोक दे भले आस्तै हुन्दी ऐ ऊऐ साड़ी
संस्कृति होई सकदी ऐ ।

मनुख के ऐ ? कुत्थुआं आया ? कुत्थें जाग ? इस
जिन्दू दा के लाभ ? इस संसार दा रूप के ऐ ? इसी कुस
बनाया ? सुख के ऐ ? दुःख के ऐ ? आनन्द के ऐ ?
के करम चंगा ते के करम मन्दा ऐ ? ए सारियां लोक परलोक
सम्बन्धी गत्तां ते सोचबचार धर्म, शास्त्र ते फलासफी दे
अधार उप्पर गै हुन्दे न । इस करी धर्म ग्रन्थ गै संस्कृति
दे अधार हुन्दे न ।



राष्ट्रीयता ते हिन्दी

राष्ट्रीयता ते हिन्दी

साञ्जे जीवन दे किट्टा होइए इकै नेआ लब्बने गी
राष्ट्रीयता आखदे न । ईए पवित्तर भावना ए जेड़ी इक
व्यक्ति गी हौसला ते अपना बलिदान करी ओड़ने दी प्रेरणा
हिन्दी ए । ए भावना कोई इकदम गै नईं आई जन्दी ।
ए बल्ले २ मठोन्दी ए । पहले टब्बर, फी जात ते पिछ्छां
सारा राष्ट्र ईआं दर्जेबार गै पटीन्दी ए । अपने राष्ट्र दे
सर्वन्ध बिच नेईं भगती ते शर्धा लोड़चदी ए जेड़ी ताईं
तुआईं नईं फिरकी सकै । नेईं शर्धा गै राष्ट्रियता दा मूल
मैन्तर ए ।

“वसुधैव कुटुम्बकम्” (सारा संसार गै इक टब्बर ऐ) ते कन्नै ‘संसार में एकशासन’ (one world govt) साड़े भारसवर्षे दिआं ए दवै गल्लां मनुक्खा दे सोचने दी खीरली हद न । पर इन्दा सहारा बी राष्ट्रीयता गै ।

अन्तर्राष्ट्रीयता (सारे संसारै दे राष्ट्रों गी इक टब्बर समझने दा भाव) दा जन्म राष्ट्रीयता थुआं गै हुन्ना ऐ । जेड़ा राष्ट्र जिन्ना बड़ा मजबूत, ते धन शगती कन्नै रजोए दा होग, ओ राष्ट्र उन्नी गै दलेरी कन्नै अन्तर्राष्ट्रीयता दी गल्ल सोची सकदा ऐ “पल्लै नईं फक्क ते जगन्नाथे दी तक्क” जे अप्पू गै राष्ट्रीयता दी पक्की भूमी उप्पर खड़ीते दे नईं होओ, ते गल्लां राष्ट्रीयता दियां करो तां “लौका मुंह बड्डी गल्ल बझोन्दी ऐ ।”

पैहलें अपने राष्ट्र गितै अटल प्रेम, ते नईं बफादारी लोड़चदी ऐ जेडी कदे बी फिरकने आलो नईं होऐ । अपने देसै गी जेकर साड़ी जिन्दू दी लोड़ पवै तां बी पिच्छे नईं हटना ईऐ, नेए भाव राष्ट्र दा मान बधां दे न ते कन्नै हूए लोक नुआड़ी कदर करदे न ।

राष्ट्रीयता दे विकास आस्तै जिनै गलें दी लोड़ हुन्दी ऐ ओ न देस (रौने आस्तै थाँ) समाज (बसने आले लोक)

भाषा (आपूँ बिचें गल्ल-कत्थ करने दा सांभा साधन-बोलचाल) संस्कृति (उस समाजै दे चंगे २ गुण ते सिफतां) ते कन्ने धर्म । इन्नियां गल्लां किट्टियां होन तां राष्ट्र बनदा ऐ ।

सारें कशा पैहली ते जरूरी लोड़ हुन्दी ऐ अपने देस दी, जेदियां हद्दां निश्चित ते पक्कियां होन । टकोदा लब्ब जे ए फलाना देस ऐ । ए जन्म भूम हुन्दी ऐ जिसी अङ्गरेजी बिच होमलैण्ड (Home land) आखदे न । अपने बस्सने आस्तै थां गै नईं होऐ तां राष्ट्र कुत्थुआं दा बनना ते कोदे बारे बिच सान्ने कन्ने आखना जे ए साड़ा देस ऐ । अपने देसैं बगैर स्वाभिमान, अपने बारे बिच इज्जती दा भाव गै नईं आई सकदा ।

अपने देसैं गी अपनी मातृ-भूमि जां पितृ-भूमि समझना ते इस भाव कन्ने उच्चा सिर करिऐ शानै कन्ने चलना पसिख चित्तै कन्ने ते खुल्ली ग्लानी कन्ने नुआड़े गुण गाना, इसी बन्दना ते पूजना, ए देश-भगती दियां नशानियां हुन्दियां न ते देश भगत मनुक्खै दे गुण हुन्दे न । दिक्खो जहूदी लोक धनवान, बुद्धिमान ते सारें गुणों दी खान हे पर जिन्ना चिर अपना देस (इज्राईल) नईं हा तहूँ तोड़ी बचारे मां-म्हेटर

गै रए । सबनै पासेआ फटकार थोन्दी ही । कदें जर्मनी बिचा देस नकाला होआ करदा ई, ते कदें तुर्क डण्डा लेइऐ पिच्छे लगे दे नीं । अज्ज जहूदिएं दा अपना देस ऐ, ते बड़े मान्नै कन्नै सारे संसारें दे सामनै सिर उच्चा करिए गल्ल करदे न ।

देसै बिच छड़ा बस्सना गै नईं, ओदे गीतै परम भगती दी लोड़ बी हुन्दी ऐ । देसै दे ओ बासी जिन्दे बस्सने कन्नै देसै बिच इक खास समाज ते जाति बनदी ऐ, राष्ट्र निर्माण गीतै दूए बड़े अंग हुन्दे न । उन्नै लोकें दा जीवन नेआ हुन्दा ऐ जे राष्ट्र ते जाति बिच कोई फरक नईं बभोन्दा । जाति ते राष्ट्र दवै इक्कै अर्थ देन लगी पौन्दे न । जियां सिरीप्ला दा इक चौल सारे सिरीप्ला दा सुआद दस्सी ओड़दा ऐ, ईआं गै उस जाति दा इक व्यक्ति सारे राष्ट्र दा प्रतिनिधि हुन्दा ऐ ।

राष्ट्र जीवनै दा त्रिया जरूरी अंग नुआड़ी संस्कृति ऐ, जेड़ी राष्ट्र जीवनै दियां खास सिफतां, समाजै दे नमूने आड़ू दस्सने आले आदर्श, कलापूर्ण परानियां घासियां, बुद्धि दे चमत्कारी नमूने ते अभिमान कन्नै गल्ल करने गीतै बनी गेदे इतिहास दिऐं जित्तें कन्नै उस राष्ट्र दे व्यक्ति दे हिरदे बिच भगती, शर्धा विश्वास ते गौरव पैदा करदी ऐ । नुआड़ी

रखेआ आस्तै जिन्दू दी बी लोड़ पवै तां दई ओड़ने दी हिम्मत दिन्दी ऐ ।

राष्ट्र बिच इक धर्म नुआड़ी एकता आस्तै बड़ा भारी साधन रेआ ऐ । संसारै दे जिन्ने बी बड्डे २ राष्ट्र न, जे सारें दे अपने अपने धर्म न । ओ अपने जीवनें गी उस धर्म द्वारा चलांदे न । दिक्खो ईसाइयत दे प्रचार ते फला आस्तै अमरीका ते पच्छमी राष्ट्र किन्ने स्कूल ते हस्पताल चलाइए धर्म दी सेवा करा करदे न ।

पर, राष्ट्र दी इक मुठ ते इक सूत्तरता आस्तै जेड़ी जरूरत इक भाषा दीऐ ओ इनें सारें कशा बड्डी ऐ । जीआं खूनें दा दौरा सारे शरीरै दी नाड़ी २ बिच हुन्दा ऐ, ते सारे शरीरै दी एकात्मता गी कायम रखदा ऐ, इयां गै राष्ट्र भाषा सारे राष्ट्र दे बक्खरे २ अंगें गी इकरूपता दिन्दी ऐ । सारे राष्ट्र दियां भावनां, हीखियां ते मेदां इस्सै साधनें कन्ने प्रगट हुन्दियां न ।

साड़े राष्ट्र दी भाषा हिन्दी राष्ट्र भाषा दी पदवी उप्पर छड़ी गल्ले कन्ने नई आई । विकासवाद दे असूलै कन्ने आई ऐ । बेदिक प्राकृत, अपभ्रंश, संस्कृत ते अपने २ इलाके दिएं बोलिएं दिएं पौड़िएं उप्पर पैर रखदी २ जनता

दी बोली (जनभाषा) दे रूपे बिच हिन्दी पुज्जी ऐ । हिन्दी बिच देसै दी 'सर्वव्यापकता' दे गुण न । देसै बिच होर बी मतियां भाषां न. ते उन्दा साहित्य बी बड़ा चंगा ते मुगता ऐ, पर ए सब किश हुन्दे होए बी सर्वव्यापकता दे लखन उन्दे बिच नई । ईऐ कारण हा जे साड़ी पारलीमैण्ट दे पत्र सबौ मिम्बर जेड़े सारे देसै दे मुखिए हे राष्ट्र भाषा निश्चित करन बेल बड़ी बहस, शानबीन ते सोध-साध करिए इस्सै निश्चे उप्पर पुज्जे, जे हिन्दी गै भारत वर्षे दी राष्ट्र भाषा होने जोग ऐ । अज्ज कश्मीर कोला लइऐ दूर हेठ कन्या-कुमारी लोड़ी जनता दी बोलचाल दा जरीआ हिन्दी ऐ । दखन भारत बिच हिन्दी दा प्रचार मता होआ करदा ऐ, ते इक-राष्ट्रीयता दे भाव पुष्ट होआ करदे न । उत्तरी भारत गी बदेस आखने आल्ली गल्ल मुक्कै करदी ऐ, ते अस सारे भारत माता दी सन्तान आं, ए भाव पक्का होआ करदा ऐ । बाहरले देसै बिच जाइऐ साड़े राजदूत अपने प्रमान पत्तर हिन्दी बिच दिन्दे न । हिन्दी भारत दी प्रतिनिधि ऐ ।

संसारे बिच जिन्ने लोक न ते जिन्नियां उन्दियां भाषां न, उन्दी संख्या दिखवै तां हिन्दी पजमे दरजे उप्पर आन्दी ऐ । ए गल किश घट्ट माने दी नई ।

हिन्दी साड़ी संस्कृति दा टकोदा नमूना ऐ । तुलसीदास, सूरदास, मीरा, मैथिलीशरण गुप्त ते महादेवी जी नै भगती दी लहर बगाई ऐ । जायसी, कबीर, जयशंकर प्रसाद ते निराला नै रहस्यवाद दा झुण्ड गुआड़ेआ ऐ । राम कुमार वर्मा, नवीन, प्रेमी ते दिवाकर छायावाद गी, भारतेन्दु, महावीर प्रसाद द्विवेदी, अयोध्या सिंह उपाध्याय, मैथिलीशरण, भारतीय आत्मा, ते मुनशी प्रेम चंद राष्ट्रीयता, डा० राम विलास शर्मा, प्रभाकर माचवे ते रंगिय राधवन प्रगतिवाद गी लेइऐ हिन्दी गी चक्कखेआ गब्बर बनाबा ऐ । वियोगी हरि, महादेवी, हरिभाऊ उपाध्याय हुन्दा अध्यात्मवाद हिन्दी दे शान्त ते पलोखे सुभा दा नमूना ऐ । हिन्दी दी तरक्की इक राष्ट्र दे बनाने ते पक्का करने आली गल्ल ऐ ।

अज्जकल भारत वर्ष बिच कई थाए मातृभाषा ते राष्ट्रभाषा दा नां लइऐ हिन्दी कोला जेड़े लोक बांटे न, नाई बिच थोड़ा नेया मोह ते खिज गै । हिन्दी कशा दूइए भाषे गी किश नकसान नई, सगुआं हिन्दी कन्न ओ सौरडन । इस बेले हिन्दी दिए नाड़िए बिच सारिए भाषे दी रत्त ऐ । देस गी इक सूतरै बिच परोई रखने दी ताकत ऐ । नाड़ा ते स्वागत करना, लोड़चदा ऐ । मातृ भाषां ते लाके परती

बोली जाने आलियां बोलियां अपनेर थार उन्नति करन, फलन फुल्लन ते वदन बड़ी चंगी गल्ल ए । हिन्दी दा दावा ते सेवा दा ए । देस दियां दुइयां भाषां 'प्रादेशिक' हुन्दियां होइयां बी भारत दियां भाषां न । राष्ट्रीय भाषां न । पर जिन्नी 'व्यापकता' फला, ते बस्तार हिन्दी दा ए, उन्ना होर कुसै भाषा दा बी नई । इस करी उन्दा हिन्दी कन्ने टक्कर लेना, दुःख करना, जां बरोध करना चंगी गल्ल नई । ईआं गै कई लोक अंग्रेजी भाषा कन्ने मोह करदे न ते हिन्दी कशा डरदे न । अंग्रेजी भाए किन्नी भी सारे गुण आली भाषा ए, पर साड़ी राष्ट्र भाषा दी पदवी उप्पर नई बेई सकदी । जेड़े आखदे न जे देस बिच एकता ते उन्नति अंग्रेजी कन्ने गै आई, ओ अंग्रेजी दा जरूरत कशा सता पक्ख लैन्दे न । दुनियां बिच होर बी देस न । जापान ते चीन नै इन्नी तरक्की अंग्रेजी दे सहारं थोड़ी कीती ए ? गांधी जी, नेहरू ते पटेल भाए अंग्रेजी करी उच्चे चकोए होडन, पर राणा प्रताप, शिवा जी ते गुरु गोबिन्द सिंह होरें देस भगती सिक्खने आस्त कदू अंग्रेजी पढ़ी ही ? उन्दी देस-भगती गान्धी नेहरू ते पटेल हुंदी देस भगती कशा सवाई गै ।

ईस्टइण्डिया कम्पनी गी सस्ते क्लर्क' दी लोड़ ही, ते कन्नै 'मैकाले' दे आखने मूजब अंग्रेजी दी पढ़ाई भारती लोकें बिचा देस भगती दी भावना दा लोप करने गितै शुरू कराई ही, इस करी अंग्रेजी भाषा आस्तै मोह कोई मान वधाने आली गल्ल नई' । अंग्रेजी अपनै थार साहित्य दे रूपै बिच फुल्लदी फलदी रवै, कुसै गी कोई चेड़ नई' । पर अंग्रेजी साड़ी देसभगती, राष्ट्र भावना ते संस्कृति दी प्रतिनिधि नई' बनी सकदी । ए कम्म हिन्दी गै करी सकदी ऐ ।

असैं गी बड़ें संजम ते धीरज कन्नै अपनी राष्ट्र भाषा दी सेवा करदे जाना ते मान्नै दा थार दिन्दे जाना लोड़चदा ऐ ।



वैष्णों भोजन

वैष्णों भोजन

भोजन साड़ा शरीर गै नई बनान्दा, साड़े मनै गी बी बनान्दा ते प्रभावित करदा ऐ । तन्दरुस्त मनै गितै कन्ने शुद्ध ते टिके दे विचारै गीतै पवित्तर ते जीवनी शगति आला भोजन बड़ा गै जरूरी ऐ । मासाहार छड़ा नैतिक दृष्टि कन्ने गै नई वैज्ञानिक दृष्टिकोण कन्ने बी छोड़ने जोग ए ।

जेड़ा भोजन अस रोज करनेआं ओदा साड़े मनै उत्पर ते चरित्तर उत्पर मता प्रभाव हुन्दा ऐ । जे ओ सात्वक होग तां आत्मा गी शुद्ध ते बलवान बनाग । राजसिक होग तां काम बासना बदाग ते सात्विकता गी घटाग । जे मूल

गै नखिद्ध (तामसिक) होआ तां मानसिक शक्ति गी खीन करग मन ते बुद्धि गी निकम्मा करग ।

गीता बिच त्रौ भान्ति दा भोजन दस्से दा ऐ :—

सात्विक, राजसिक ते तामसिक ।

सात्विक भोजन ते बारे बिच आखेदा ऐ :—

आयुः सत्वबलारोग्य सुखप्रीति विवर्धना :

रस्याः स्निग्धाः स्थिरा हृद्या आहाराः सात्विकप्रियः

उमर, जीवन शक्ति, शरीरिक बल, सेहत खुशी, ते प्रेमभाव बदाने आले, खाने गी सुआद, घिआो मक्खन दे बनेदे, अंगें लगाने आले, मन गी तृप्त करने आले भोजन सात्विक लोकें गी पसिन्दा औन्दे न ।

कट्वम्ल लवणात्युष्ण तीक्ष्ण रुक्ष विदाहिन :

आहारा राजस्येष्टा दुःख शोकामय प्रदाः ।

कामी लोकेंगी पसिन्दा औने आले कसैले, खट्टे, लूतके, बड़े तत्ते, त्रिक्खे, रुक्खे, ते दाह लाने आले हुन्दे न । ए बमारियां, पीड़ां ते क्लेश पैदा करने आले हुन्दे न ।

यातयामं गतरसं पूति पर्युषितं च यत् ।

उच्छिष्टमपि चामेध्यं भोजनं तामसप्रियम् ॥

जेड़े भोजन कच्चे पक्के, खुश्क (संघै फसने आले) मुश्कें आले, बेए त्रबेए, बची दी जूठ आले, ते गन्दे हुन्दे न, उतेंगी तामस भोजन आखदे न।

शाकाहार कन्ने हमेशा आस्तै सेहत बनी रौन्दी ऐ। शाकाहार भोजन बिच सारे अंग प्रोटीन, मिनरल, विटामिन दुद्ध, फलें ते सब्जिएं बिच थोन्दे न। शाकाहार दिमाग गो चुस्त ते मस्तिष्क गो मता सज्जर बनाई रखदा ऐ। दिमाग गो मता शुद्ध ते स्पष्ट सोचने दी शक्ति दिन्दा ऐ।

आर्थिक दृष्टिकोण :- सब्जियां, फल, अनाज ते दुद्ध तौले, सस्ते, ते मुगते थोई जन्दे न। मासै आस्तै किन्ने पशु मारने पौन्दे, न ते दुद्ध ते स्निग्ध पदार्थे दी किन्नी कमी आैन्दी ऐ। बाहरा दा मास ते मच्छी मंगाने गीतै जेड़ा धन खर्चौन्दा ऐ ओदा वो भार बक्खरा। भारत जनेह कृषि-प्रधान देसै बिच वैष्णों भोजन सच्ची देस भक्ति ऐ। त्रिए मन ते मस्तिष्क दी शुद्धी आस्तै वैष्णों भोजन कोला शैल केड़ा भोजन होई सकदा ऐ ? वैष्णों भोजन करने आले गो इक मानसिक सन्तोख, दमागी सन्तुलन, ते इक शान्ति जरूर प्राप्त रौन्दी

ऐ । शाकाहारी कुसै जीव-जन्तु गी कष्ट नई पजान्दा । शाकाहारी देसै दी आर्थिक दशा गी गै नई सुधारदा, ओ बड़ी भारी देस-भगति बी करदा ऐ । अहिंसा ते सचाई त उपदेश ते सन्देश आखिर इक शाकाहारी गै दई सकदा ऐ । अस भोजन इस करी करनेआं जे जीन्दे रौचै, इस करी नई जीन्दे, जे खन्दे गै रौचै । साड़ियां खाने पीने दियां आदत साड़े जीवनै दा दृष्टि-कोण न, ते शन्नगुग्राण्डे कन्ने साड़ा मेल-मलोप दसदियां न । सारें कशा मता सेहत मन्द ते कुदरती भोजन सब्जियां, फल ते खेतरे दियां पैदावात हुन्दियां न । ए भोजन सादे जीवन ते उच्चे विचारें पावनेन्दा ऐ, मांसाहार ते झिगड़ा गै खिचदा ऐ ।

दुनिया बिच जिन्ने बी महापुरुष होए न, कला ते साहित्य दे मन्ने प्रमन्ने दे लोक होए न, ते जिन्ने बी फलासफ ते विद्वान होए न, सारें दा ईए मत रेआ ऐ, जे मनुक्ख ते पशु पक्खरू कुसै गी बी बलेश नई पजाया लोड़चदा । इस असूलै गी तोड़ चाढ़ने गीत ए बड़ा जरूरी ऐ, जे भोजन तेआ खादा जा जेदे करी कोई हिंसा नई होऐ । कुसै पशु पक्खरू दे हिंसा नई होऐ । मनुक्ख पशुएं दी, खाने दिए आदतें कोला उन्नति करनी शुरू कीती ही । ओ शं

भग्याड़ें ते चित्तरे दी शक्ति ते भयंकरता कोला तरवकी करदा करदा मन बुद्धि दे सन्तुलन, ते बिचार शक्ति दे सहारे कत्ते सभ्यता ते संस्कृति दी टीसी तोड़ी आई पुज्जा ऐ । ए विकास वाद दा सिद्धान्त ऐ, जे मनुक्ख स्थूल कस्में कशा सूखम गल्लें आसैं आन्दा ऐ । मांसाहार मनुक्खे दी शुरू अवस्था दी आंकी ऐ । साहित्य ते फलासफी नै दुए तोड़ी सतियां मजलां टप्पी लैती दियां न ।

मांसाहारी भोजन दी गल्ल चलाना, घड़िऐ दी सूइएँ गी पिच्छें परताने आली गल्ल ऐ । अगें चुक्की दी गैं, अगें गें बधी लोड़चदी ऐ, ते ईऐ प्रकृति दा नियम ऐ ।

अगें साड़े घरें बिच जनानियां मांस कदें नईं सियां खन्दियां । जोकी पछमी सभ्यता नै उनेंगी बी, ते जेड़े तुआईं दा पढ़ी आन्दे न उनेंगी मांस खाने दा फैशन सखाई ओड़ेआ ऐ । नतीजा ए निकलेआ ऐ जे जिन्दगी दी पबित्तरता दा भाव गैं सम्भै करदा ऐ । स्कूलें कालजें दे जातक अपने माइतरें ते प्रोफैसरें गी (जे ओ जातकें गी इम्तहानें बिच तकल मारदे फगड़ी लैन) छुरे मारी ओड़दे न । अपने माऊ-बबबे उप्पर हत्थ चुक्कने थुआं संकोच नईं करदे । इस मांसाहारी भोजन ते हिन्दुस्थानें गी डोबन लाया ऐ ।

इऐ भाव परमाणुबम ते दूए हाईड्रोजन बमों दी तयारी बिच प्रकट हुन्दा ऐ । इस तयारी नै दुनियां गो महा प्रलय दे ओड़क शोए उप्पर खेड़ेरी ओड़ें दा ऐ । इक्कै चक्का लगा ते बेड़ा पार । शाकाहारी भोजन अपनाने दी प्रथा पाना बेजबान ते गूंगे दी अवाज बनना ऐ । गूंगे ऊऐ हुन्दे न जेड़े अपने भाव नईं दस्ती सकदे । ओ बेजबान ते मसूम साड़े पशु पक्खरू गै न । कुदरत नै गै नेआ सरिस्ता कीता दा ऐ, जे ओ अपने भाव प्रकट नईं करी सकदे । इस करी ए बड़े गौरव आला अधिकार ते सनहरी मौका मनुक्खै हत्थ गे ओन्दा ऐ, जे ओ पशु पक्खरूएं दी रक्षा ते उन्दी जिन्दगी आस्तै बोलै । परमात्मा नै जिन्नी उमर उन्दे जोन्दे रौने आस्तै दिस्ती दो ऐ, उन्ना चिर जोन्दे रौने दा उन्दा बो उन्ना गे अधिकार ऐ जिन्ना मनुक्खै दा ।

ए नेक कम्म शाकाहारी व्यक्ति गे करी सकदा ऐ जेड़ा कुसै जीव जन्तु दी हिंसा नईं करदा वैष्णों भोजन साड़ी संस्कृति दा खास अंग ऐ ।

छिन्ना ते अन्धविश्वास

छिन्ना ते अन्धविश्वास

हिन्दी बिच जिसी 'अन्धविश्वास', 'मूढ़ाग्रह', जां 'रुढ़िवाद', 'पुरानी लकीर का अन्धानुकरण', आखदे न ते अंगरेजी भाषा बिच जिसी (Taboo) आखदे न, उसी डोगरी बिच छिन्ना ग्लान्दे न । व्याकरण दी दृष्टि कन्ने छिन्ना शब्द छिद् घातु दा क्तान्त डोगरी बिच संज्ञा रूप बिच बर्तोए दा ऐ । एदे अर्थ न बक्ख कीता दा, बहुं दा, भेट्ठा कीता दा, ठाके दा, आदि आदि । नेई रस्म जा रवाज, नेआ कस्म जां भाव, जेदे करी लोकें बिच आपूं बिच, जां

लोकें ते किश चीजें बिच धर्म, रवाज जां कुसै पुरानी गल्लें
 करी किश गल्ल ठाकी दी होऐ, उसी छिन्ना आखदे न।
 इक घासी जनेई पई जन्दी ऐ, ते किछ डर जनैआ पक्का
 होई जन्दा ऐ, ते फिरी ए गल्ल पीड़ी दर पौड़ी टुरी पौन्दी
 ऐ । जे कोई इस गल्लें गो नई मन्नै जां त्रोड़ी ओड़ें तां
 उस मानुऐ उपपर, नुआड़े टब्बरै उपपर जां शन्न गुआण्डे
 उपपर जरुर किश बिपता आग ए पक्की धारणा हुन्दी ऐ ।
 जम्मू सूबे बिच इक तसील हीरानगर ऐ । उत्थें इक गां
 ऐ कूटा ते सांगड़े ब्राह्मण रौन्दे न । उन्दा ठप्पें, बिल्लालोचें
 ते ममयालियें कन्नै छिन्ना ऐ । ए इक दूए कन्न छोन्दे
 नई । जे कदें कोई भुल्ल भलोखें छोई जा, तां नौना पौन्दा
 ऐ ते कुलदेवता कोल जाईऐ माफी मंगनी पौन्दी ऐ ते जे ए
 किश नईं करो तां देवता पुढे सुटदा ऐ । ताप चढ़ी जाग,
 जड बां भज्जन जां होर किश पद्रो होग । छिन्नै दा त्रा
 मता हुन्दा ऐ । इस छिन्ने दी कहानी ऐ । महाराजा
 रणवीर सिंह हुन्दा राज हा । महाराजे दा सौरा मियां
 बिजे सिंह जिलेदार हा, ते जसरोटा गां उन्दा हैड-क्वाटर
 हुन्दा हा । इक बारी मियां साब दे घोड़े घा चरदे चरदे
 कूटा गां दे सांगड़े दे खेतरे बिच जाई पे । सांगड़ें दे बडेरें

चाचू इन्द्रू नै जागतें गी आखेआ ते डण्डे लाइए धोड़ें गी बाहर कड़ी ओड़ेआ । इक दौं धोड़ें गी किश खरी लग्गी गई । सनाने आले मियां साब गी सनाया जे सांगड़ें धोड़े फतकाई ओड़े न । मियां साब नै तरारे बिच आइए कूटे आलें दा पानी बन्द करी ओड़ेआ । पानी बन्द करना ए हुन्दा हा, जे खू, बां, तला ते सूटें उप्पर डूम डल्लें गी बहाली ओड़दे हे । छूतछात दा बड़ा जोर हुन्दा हा । लोक उत्थुआं पानी भरना छोड़ी ओड़दे हे । कूटे दे लोक व्याए तड़फन लगे । ठप्पें बिल्लालोचें ते ममयालिये किट्ट कीता ते मियां बिजे सिंह गी ग्लाय़ा जे सारा दोष ते चाचू इन्द्रू ते सांगड़े दा ए । सारे ग्रां गी कैत सूली टंगे दा ए । मियां साब नै डूम डल्ले सांगड़ें दे घरें चाढ़ी ओड़े ते छड़ा उन्दा पानी बन्द करी ओड़ेआ । सांगड़ें गी कड़ा धूं लगन लगा । चाचू इन्द्रू गी बड़ा रो चढ़ेआ । उन बेड़े बिच चिखा बनाई, उप्पर चढ़िए टिठ छुरा सारेआ ते मरदे मरदे ग्लाय़ा जे ठप्पे बिल्लालोचें ते ममयालिये कन्नें बर्तन बर्ता बन्द, ते छोना तक नई । सांगड़ें ग्रां छोड़ेआ ते समकालि टुरी आये । जिसलें इस ब्रह्म हत्या दी खबर महाराजे गो पुज्जी, उसी, बड़ा दुःख होआ । आपूं समकाल पुज्जा, सांगड़ें कशा माफी मंगी, ते उनेंगी फिरी कूटे आन्दा । अद्दू दा सांगड़ें ते ठप्पें

बिल्लालोचें ते ममपालिये दा छिन्ना चलदा आवै करदा ऐ ।

जम्भू दे मनालिये पावे सैंदी कन्ने छिन्ना करदे न ।
उन्दी नूं जेकर कुत सैंदी लाई लै तां नुआड़े सिर मुंह ते
हत्थें उप्पर फिम्मनियां निकली औन्दियां न । एदी
कहानी ईश्रां ऐ जे इन्दी कोई पड़दादी जां चढ़दादी लौडू गी
मैन्दी दे बूटे हेठ सुआला करदी ही जे उप्परा टाला त्रुट्टा ते
जातक मरोई गेआ । उस अपने टब्बरै गी गलाया जे अपने
कुलै बिच अगुआं मन्दी नईं लानी । तदूं दा मैन्दी कन्ने
छिन्ना चलदा आवै करदा ऐ ।

टकोत्रें दै ब्याह आदि शुभ कारज बिच परोतै गी नईं
सददे । नुआड़े कन्ने छिन्ना ऐ । ए गल्ल ईश्रां बनी जे
टकोत्रें दी धिआन कुतै दूर बोई । जदूं प्योकै आई तां
भगवान दी करनी ए होई जे नुआड़ा घरै आला खट्ट भुज होन
लगा । घरै आलें परोतै गी भेजेआ जे लाड़ी गी सदी
लईआ । परोत पुज्जा ते खातर दारिएं बिच पई गेआ, ते
हूऐ दिन उस महाराजें दी बमारी दी गल्ल सनाई ते कुड़िएं
गी कन्ने लईऐ चली पेआ । रस्तै बिच कुड़िएं दी भैतूं दा
ग्रां पौन्दा हा । उत्थें नुआड़े खस्मै दी बमारी ते नुआड़े
चानचक्क सुर्गबाम होई जाने दी खबर पुज्जी गेदी ही । उस

कुड़ी गो सनाया ते परोतै गो फटकारेया । कुड़ी नै उत्थें गै चिखा बनाई ते सती हो गई । चिखा उप्पर चढ़दे उस गलाया जे माढ़े प्योकिऐ शुभ कर्ममें बिच परोतै गो नईं सहन, ते सारी मानता अपनी धियानू गो देन । तहूँ दा टकोत्रों दा परोतै कन्ने छिन्ना चलदा आवै करदा ऐ ।

जम्मू दे कालक-दासिएं दा कुलदेवता उस ग्रां बिच ऐ जित्थे उन्दा कोई बडेरा मरोई गेया हा । उन्दा उस ग्रां कन्ने छिन्ना ऐ । अपने जातकें दे मूनन करन जहूँ ऐ उस ग्रां जन्दे न तां अपनी धियान कन्ने लेई जन्दे न । कुतै कण्डा तड़ी जा जां, जूड़ै कन्ने टल्ला पलची जा । तां उनें आपूँ नईं कड्डना, नां गै टल्ला छड़काना । धियान गै कण्डा कड्डदी ऐ ते ऊऐ टल्ला छड़कांदी ऐ । ओ ते उत्थों दा पानी बी नईं पीन्दे । इग्रां छिन्ना उन्दी रीत बनी गेदा ऐ । ते नुआड़ी मानता होई गेदी ऐ ।

इऐनेऐ छिन्ने बाहरले देसैं बिच बी थोंदे न । पश्चमी अफ्रीका बिच शार्क प्वाइंट इक थां ऐ । उत्थें राजे गो अपना थां छोड़ने कन्ने छिन्ना ऐ । ओ अपना थां छोड़िए होर कुतै सौने गीतै नईं जाई सकदा । उनें लोकें बिच इक नेआ 'अन्ध-विश्वास' ऐ जे राजा थां छोड़ग तां समुन्दरै

बिच तफान आई जाग ते बपार ठप्प होई जाग ।

दखन भारत बिच टोडा लोक रौन्दे न । उन्दा इकरवाज ऐ, जे उन्दी 'दुग्धशाला' (जीआं साड़ी डेयरी हुन्दी ऐ) दा मुखिया कुतै नईं आई जाई सकदा । उन कुआरे रौना हुन्दा ऐ । बोएदा होऐ तां लाड़ी घर टोरी ओड़नी पौन्दी ऐ । कोई उसी छोई नईं सकदा । उस बाल नईं कटाने, नै नईं लुआने, पुला उप्परा नदी नईं पार करनी । उसी छोना ते दूर दी गल्ल ऐ जे कोई नुआड़े टल्ले कन्ने बज्जी जा तां उसी छाले ते पलुए पई जन्दे न । ईऐ नै गल्ल होई जा तां फिरी उत्थुआं दा राजा अपने पैर छुआ तां क्लेश हटदा ऐ ।

अमरीका बिच एमेजान नदी दे कण्डे बसने आले आदिवासिएं बिच इक ए 'अन्ध विश्वास' ऐ जे हामला जनानी दा जूठा खाने करी आदमी दी ते गल्ल ग जान देओ कोरि जंगली जनौर खा तां ओबी नपुंसक होई जन्दा ऐ । कोरि पालतु पशु खाई लै तां मरी गे जन्दा ऐ ।

फिज्जी टापू बिच बी ईऐ नेआ अन्ध विश्वास ऐ जे हामला जनानी कोल पति दा जाना बी खतरनाक ऐ । इकरा बारी इक पति टपले कन्ने अपनी हामला लाड़ी दे बिस्तर

उप्पर बई गया । पता लगने उप्पर ओ इन्ना डरेआ जे
पन्दरे दिनें अन्दर गै बचारा मरी गोआ । आस्ट्रेलिया दे
आदिवासी हामला जनानी गी बड्डे कनारें आली हैट पुआई
ओड़दे न, जे ओ सूरजै गी दिक्खिए कलंक नईं लाई ओड़ें ।

जम्मू दे कई घरें बिच हामला जनानी गी सप्पे पासै
नईं दिक्खन दिन्दे । बचार ए ऐ, जे सप्प अन्ना होई जन्दा
ए ।

डोगरी बिच नेईं ठाकी दिएं गल्लें गी 'कोडर' बी
आखदे न । कोई सफरै उप्पर जान लगै ते निच्छ पेई
जा, तां कोडर होई जन्दा ए । बाहर जान लगो तां कोई
पुछी ओड़ें 'कुथें चलेओ । तां इसी बी 'कोडर' गिनदे न,
बिल्ली रस्ता टप्पी जा तां भी सफरै उप्पर नईं जन्दे । रुट्टी
खन्दे खीरले ग्रा उप्पर कोई निच्छी ओड़ें, इसी बी कोडर
आखदे न । जागत होने आली जनानी गी बिच्चू लड़ी
जा तां उसी फांडा करने आले दा सैन्तर नास होई जन्दा ए ।

इक एबी अन्ध विश्वास हुन्दा हा जे राजा कुसै बमार
गी दिक्खन जा तां ओ बमार नईं बचदा ।

जे राजा कुसै शैल चीजै गी दिक्खी लै तां उसी नजर
लगी जन्दी ए ।

ए छिन्ने कोडर अन्ध विश्वास मूढ़ाग्रह आदि सारे देस बिच कुसै न कुसै रूप बिच थोन्दे न । इन्दे पिच्छें कोई न कोई भावना ते हुन्दी ऐ, पर ए किश भलोके समें दियां गल्लां बभोन्दियां न । कईएँ गल्लें पिच्छें किश भलाई दी भावना बी हुन्दी ऐ, तामी अज्जै दे ज्ञान ते साईं स दे जमाने बिच इन्दी कोई मानता नईं रई । इक चंगी गल्ल बी होऐ पर उसी कोडर जा अन्ध विश्वास दे स्हारें की करना । प्रसूता दे पिच्छुआं पति गी मूननै तोड़ी इस्तरी गी नईं छोना लोड़चदा । ए गल्ल जनानी, मर्द ते जागतै त्रौ गीतै गै चंगी गल्ल है । पर इसी 'अन्ध विश्वास' दे स्हारें की मन्नना । जोका ज्ञान मता बदी गेदा ऐ । उस जिन्दगी दे सारे पासे तलोफी सुट्टे न, ते तत्थ कड्डी टकाए न । समझदारी कन्नै ते संजम कन्नै कम्म कीता जा ओदे बि मनुक्खे दी उन्नति दा भलाका जादा असर रखनै आला ऐ ।

कई कोडर, छिन्ने ते अन्ध विश्वास नेए डिरगे गल्ल हुन्दे न जे बुद्धि कन्नै परखने उपपर लौके जागतै समझाने आलियां गल्लां बभोन्दियां न ।

ज्ञान, विज्ञान, समाजिक ज्ञान ते इल्ले दी लोई नै न्हेरि खुन्दरां बी चनैन करी ओड़ियां न । इने कोडरें छिन्ने अन्ध विश्वासें ते मूढ़ाग्रहें गी समाजें दी शुरू दी कहानी समझी रखली ओड़ना चाहीदा ऐ ।

गांधी जी

राष्ट्र-कवि मैथिली शरण गुप्त होरें 'साकेत' दी भूमिका
बिच लिखेदा ऐ ।

“राम तुम्हारा वृत्त स्वयं ही काव्य है
कोई कवि बन जाये सहज सम्भाव्य है ।”

ईंआं गै गान्धी जी दा जीवन भारत वर्षे दा इतिहास
ऐ । उन्दे जीवने दी लौकी २ घटना बिच बी भारतीयता
ते भारती संस्कृति दे दर्शन हुन्दे न । उन्दी बाणी भारत
वर्षे दी बाणी ही । उन्दी बिन्द नेइ सारता उप्पर लक्खां
लोक इक्के वारी टुरी पौन्दे हे । लक्खां हत्थ इकदम

चकोई जन्दे हे । गान्धी जी साक्षात् भारत वर्ष हे । गान्धी जी जड़वादे दे सागरै बिच इक लाइट हाँस (Light house) हे, ते भारती संस्कृति दे पक्के कुप्पड़ें उप्पर खड़ोते दे हे, ते रस्ते दा खुञ्जी गोदे, ते सही रस्ता तुप्पदे जहाजें गी रस्तें पान्दे हे, ते धीरज दिन्दे हे । उन्दे जीवनें दियां लक्खां घटनां संसारें दे रेतले पैण्डें बिच पैरें दे नेए नशान न, जेड़े रस्ता भुल्ले दे मशाफरें गी सहारा दिन्दे न, जे ओ मजला उप्पर पुञ्जी गै पौडन ।

महादेव डेसाई, प्यारे लाल, मनु भैन, सुशीला नायर, जमना लाल बजाज, पैथिकलारेंस, लुई फिशर, ते होर हजारें महारथी लखारिएं गान्धी जी गी अपने २ नजरिए कन्ने दिक्खेया ते सरस्वती देवी दा भण्डार भरेआ ऐ, ते कन्ने अपनी लेखनी गी पवित्तर कीता ऐ ।

गान्धी जी दी आत्म-कथा My experiments with truth नेआ तजबें कन्ने भरोचेदा, ते सिक्खें सत्तें आला ग्रन्थ ऐ, जे हरकोई इसी पढ़िए अपनी जिन्दगी सुझारी सकदा ऐ । गान्धी जी नै अपने बचारें तजबें ते भावें गी एडी दलेरी ते सचाई कन्ने वर्णन कीते दा ऐ, जे उन्दे बलै सामनै आपूं गै बन्दना करनी पौंदी ऐ ।

अपनी बाल ब्रेसी दी गल्ल छड़दे उनें लिखे दा ऐ, जे अऊं कोई बड़ा लैक विद्यार्थी नईं हा। बड़ा शर्माकल ते इक्कला २ रौंदा हा। स्कूल दी घँण्टी बजने थुआं पंज मिण्ट पहलें स्कूल पुज्जना, ते छुट्टी दी घँण्टी बजदे गै सिद्धे घर दुरी आना, बस इन्ता गै प्रोग्राम हुन्दा हा। पढ़ाई दिऐं पोथिएं गी छोड़िएं दूइयां कताबां पढ़ने दी बेल गै नईं ही थोंदी। इक निजम पक्का बनाएदा हा जे स्कूल दा जिन्ना कम्म थोए, उसै रोज करी ओड़ना भायें सारी रात की नईं जागना पवै।

स्कूल दी पढ़ाई दे दिनें दो एक बड़ी मजेदार घटना उनें लिखी दी ऐ। इन्स्पेक्टर साब स्कूल दे मुआइने आस्तें आये। उनें अक्खरें दे जोड़ दिक्खने गीतें किश लफज लखाए। इक शब्द हा Kettle (केतली)। गान्धी जी नै जोड़ गल्ल लिखेआ। मास्टर होरें दिक्खेया ते टोह कराइऐ आखेआ जे गेड़े जागतें दी कापी दिखिएं जोड़ ठीक करी लै। ओ आखदे न जे मिगी चित-चेतें बी ए गल्ल नईं आन्दी ही, जे मास्टर जेड़े निगरानी आस्तें उर्थें हे जे कोई नकल नईं मारें आपूँ आखी सकदे न जे नकल मारिएं जोड़ ठीक करी लौ। गान्धी जी दी आत्मा

नईं मन्ती । उनें नकल करिएँ जोड़ ठीक नईं कीतै ।
इन्सपैक्टर साब नै दिक्खेआ सारी जमाता बिच उन्दे
गै जोड़ गलत निकले । गान्धी जी लिखदे न जे जोड़
भायें गलत होए पर माढ़ै मनै बिच सन्दोख हा ते दूई बड्डी
गल्ल ए ही जे माइटर होरें प्रति मेरे मनै बिच कोई बी
श्रद्धाहीनता नईं आई । में ईऐ सिक्खे दा हा जे बड्डें दे
दोष नईं दिखदे । उन्दे सदा गुण गै ग्रहण करने हुन्दे न ।
बाल ब्रैस बिच गै गांधी जी किन्ने सच्चे ते पक्के निश्चे
दे जागत हे ।

इक बारी इनें दौं नाटक दिक्खे 'पितृ भक्त श्रवण
कुमार' ते 'सत्यवादी हरिश्चन्द्र' । गांधी जी आखदे न जे
श्रवण दी पितृ-भक्ति ते हरिश्चन्द्र दी सचाई नै मिगी इन्ना
मोहित कीता जे अऊं सोचन लगा जे लोक हरिश्चन्द्र आडू
सत्यवादी ते श्रवण कुमार आडू माऊ बब्ब दे सेवादार होई
जान तां धरतौ दे दुखें दा अन्त होई जा ते सारे शान्ति ते
ऐमनी कर्ने रौन ।

गांधी जी गो बलैत भेजने दी गल्ल पक्की होई । पर
साधूसुभा दी माऊ गो बसा नईं पवै जे बलैत जाइऐ चरित्र
दी रक्षा कीआं होग । गांधी जी नै माऊ अगें सगन्ध

खादो जे मास नईं खाड, शराब नईं पीड ते पराई स्त्री
 गो माऊ तुल्ल समझड । ए सगन्ध उने इंगलैण्ड गै नईं नभाई,
 सारी उमर गै नाड़ा पालन कीता, ते, सारी दुनियां सामने
 इक आदर्श घरिस्ती दा नमूना पेश कीता ।

इंगलैण्ड थुआं परतोने उपपर गान्धी जी नै मसूस कीता
 जे आत्मा ते स्वाभिसाने दी रखेया गिते भारतबासिएं गो
 तपस्या करनी पौग । इने देस सेवा दा बीड़ा चुक्केआ ते
 जीवन भर इसी नभाया । इक घटना घटी । गांधी जी दे
 बहु आऊ उपपर राजकोट दा पोलिटिकल एजेण्ट (Political
 Agent) रोए होई गेआ । गान्धी जी बरिस्टर बनो
 आए दे हे । ओ अपने आऊ पासेआ अदालती बिच पेश
 होए । ए एजेण्ट गान्धी जी दा जानू पशानू हा, पर इसलै
 नेआ तोतेचश्म ते बेलिआज बनी गेआ जे पूरी गल्ल बी नईं
 सुनी ते गान्धी जी गो अदालती बिच धिक्के मारिए बाहर
 कड्डी दित्ता । पूरी गल्ल सुने बगैर इक बरिस्टर कन्ने ईआं
 सलूक बड़ी भारी बेजती हो । गांधी जी कनूनी चाराजोई
 करन लगे, पर फिरोजशाह मेहता होरे ग्लाय़ा जे भारत बिच
 रमाने कन्ने रौना ऐ तां नेए अपमान जरी लेने चाहीदे न ।
 जिसलै सतमे एडवर्ड जेडे अद्व प्रिस आफ बेलज हे भारत

आये उन्हें गी नेइएँ गल्लें दा पता लग्गा । उन्हें अपनी मा
गी चिट्ठी लिखी जे अंग्रेज अफसर भारतीयों कन्ने बेजती
बर्ता करवे न ।

अपने स्वाभिमान दी रक्षा गिते देस दी अजादी जत
असूल ऐ, इसदा पक्का जहोन गान्धी जी गी दक्ख
अफ्रीका जाइएँ होया । गान्धी जी उत्थें इक भारतीय
मुकदमा लड़न गे हे । उत्थुआं दे तजबे नेए न, जे मनुक्ख
बी अंग्रेजों दे जुल्में अगें शरमसार हुन्दी ऐ । गान्धी
लिखदे न—दक्खनी अफ्रीका बिच सारे हिन्दोस्तानिएँ गी कुल
आखदे हे । अऊँ उन्दा बकील हा इस करी मिकी बी 'कु
बरिस्टर' आखदे हे । पहले दिन जिसलै अदालती गया
माढ़ी पगड़ी तुआरी ओड़ी । पहले दर्जे दा टिगट ल
गड्डी बिच बैठा पर मेरा समान चुन्निके बाहर सुट्टी ओड़े
कि, जे उत्थें इक अंग्रेज बी बैठे दा हा । इक बग्घी
सफर करा करदा हा जे सीटा परा ठुआलिएँ ड्राइवर
बाली ओड़ेआ, फिरी पायेदान उत्पर बौने गी आखन
ते कन्ने गे मारना भी शुरू होई पे । इक गोरे
हिन्दोस्तानी दा बौना बड़ा भारी जुर्म हा । इऐ गल्लां
नईं हियां, जे ओ इक होर कनून बनान लगे जे हिन्दोस्ता

कशा बोट देने दा हक बी खोई लौ । गान्धी जी नै 'नटाल कांग्रेस' बनाई ते इस हालतें गी सधारने दे जतन शुरू करी दिते । उसै बेलै बोअर युद्ध (Boer War) शुरू होई गई ही । गान्धी जी नै अंग्रेजों दी मदत कीती । युद्ध मन्त्री लार्ड लैन्सडौन नै गांधी जी दे कम्म दी बड़ी तरीफ कीती । पर जिसलै युद्ध मुक्का तां ए तरीफ बी मुश्कपूर आडू बाऊ बिच उड्डी गई । दक्खनी अफ्रीका बिच रौने आले हिन्दोस्तानिएं बिच किश होश ते जागृति पैदा होई पर गोरे दी हठधर्मी किश नई करन दिन्दी । राष्ट्रीय संघ (U.N.O.) नै दक्खनी अफ्रीका गी ए भेदभाव छोड़ने ते सुधार करने दा अपील कीती पर अपने जाति अभिमाने दे नशे बिच ओ गोरे इन्ने डुब्बे दे न जे हजे तोड़ी कुसै दी बी किश पर्वा नई करदे ।

दक्खनी अफ्रीका दा परतोई औने उपपर गोपाल कृष्ण गोखले होरे गांधी जी गी स्लाह दिस्ती जे सारे हिन्दोस्ताने दा दौरा लाओ । गान्धी जी नै उंआं गै कीता । उनें जनता जनार्दन दे दर्शन कीते । ओ लिखदे न अऊं थर्ड क्लास बिच सफर करदा हा उत्थें मिगी गरीब, भोले भाले पुरानी घासी दे फकीर, ते मूढ़ विश्वासें बिच फसे दे देश

बासिएं दे दर्शन हुन्दे हे । गान्धी जी नै एहमदाबाद कशा पञ्ज मील दूर साबरमती आश्रम बनाया । अछूतें दा कल्याण करने दा असली कम्म इत्थें शुरू होआ हा । साबरमती सारे भारतवर्षें दा केन्द्र बनी गेआ । बिहार दे चम्पारन सत्याग्रह नै गान्धी जी गी सारे देसैं दी आशा दा केन्द्र बनाई ओड़ेआ; गुजरात प्रांतें बिच खैरा थां दे कसानें दे बलेश दूर कीते । हुए नई स्थिति बनी जे कोई बी गल्ल होए मेरी सलाह जरूर गै लैदे हे । गान्धी जी सारे देसैं दे लीडर बनी गये ।

दुनियां दा पहला युद्ध पूरे जोरें बिच हा । गांधी जी आखदे न मेरी अंग्रेजें दे बारे बिच किश नई श्रद्धा ही जे में उन्दी मदत करनी जरूरी समझी । अंग्रेजें दे किश आदर्शें दे बारे बिच सिकी बड़ा मोह हा । अङ्गरेजें सारे हिन्दोस्तानें गी शस्त्रहीन ते निहत्था कीता दा हा । इस युद्धें बिच मदत करिए शस्त्र विद्या सिखाने दा बड़ा शैल मौका हा ।

पर जिसलै युद्ध खत्म होआ अङ्गरेजें हिन्दोस्तानिएं गी अजादी दे बदलें माण्टफोर्ड रिफार्म स्कीम दित्ती । ए तत तवे ऊपर फुड बी नई हो । एदे कम्मे कुसै गी सन्दोष नई होआ । फिरी दमन चक्कर चलेआ । रौलट ऐकट बनेआ ।

जल्लेआंला बाग नेई दुर्घटना होई । पञ्जाब बिच लोकें उप्पर इन्ते जुलम होए, मातृ शक्ति दा इन्ना अपमान होआ, जागते पूगते ते बुड्डे ठेरें कन्ने नेआ पशु समान बर्ता होआ जे श्री रवीन्द्र नाथ ठाकुर जी न अपनी 'सर' दी उपाधि अङ्गरेजी सरकार गी परताई ओड़ी । उनें आखेआ बेजबान मसूम जनता दा रोह द सने गीतें अऊं इस उपाधि गी परताने दे सबा के करी सकनां । एदी जांच पड़ताल ते पुछताछ करने आस्तै इक कमेटी बनी । पं० मदन मोहन मालवीय, स्वामी श्रद्धानन्द, पं० मोती लाल नेहरू ते श्री चितरञ्जन दास इस कमेटी दे मिम्बर हे ते गान्धी जी प्रधान । जित्थें २ घटना होइयां हियां उत्थें जाइए इने रिपोर्ट तैयार कीती । ए रिपोर्ट पढ़िए सारा देश कम्बी उठेआ ।

गान्धी जी न आखेआ नेई जालम सरकार कन्ने कोई सहयोग नई देना चाही दा । नतीजा ए निकलेआ जे विदेसी माले दे बाइकाटे दी बा चली । उनें दिनें गे अंग्रेजें टर्की दे खलीफे गी गद्दी दा तुआरी ओड़ेआ, नतीजा ए होआ जे मुस्लिमान बी अंग्रेजें दे खलाफ होई गये । उनें बी कांग्रेस दा साथ दईए अपना रोह कडुआ । अदू हिन्दू मुस्लिमानें किट्टे होइए कम्म कीता । पण्डित जवाहर लाल नेहरू जी

नै रावी दे कण्डै नारा लाया जे हिन्दुस्तान पूरे तौर उप्पर
अजाद होना लोड़चदा ऐ ।

लण्डन विच रौण्ड टेबल कांफ्रेंस होई । गान्धी जी गो
हिन्दुस्ताने दी स्थिति दस्सने गीत सहे आ । बादशाह जार्ज
पंजम कन्ने गान्धी जी दी भेंट होई । बादशाह नै ग्लाय
“गान्धी, तुस ते बड़े राजभक्त हे । हुए तुस बागी की होई
गे ओ” ? गान्धी जी नै बड़ो अक्लमन्दी काने मौका
सम्हालेआ ते ग्लाय “इसलै अऊं थुआड़ा महमान आ ।
इस मौक के बहस करनी ऐ” किश खुड़वा-खुड़बी होई
जन्दी तां माड़ी गे गल्ल ही । इस घटना गो सर टम्पल बुड
होरें बड़े मजे कन्ने अपनी पोथी (Nine troubled
years) विच लिखे दा ऐ ।

उस वेल ते कांफ्रेंस फेल होई गई, पर १९३५ दा ऐक्ट
इस्से कांफ्रेंस दा नतीजा हा । गान्धी जी दे सलाह देने उप्पर
कांग्रेस नै १९३५ दा ऐक्ट मन्निऐ सूबे दियां गदियां
सम्हालियां हियां ।

१९४२ विच ‘हिन्दुस्तान छोड़ो’ अन्दोलन चलेआ ।
अंग्रेजें पूरे जोरै काने इसी दबाया तो जुल्मे दी हद्द करी

ओड़ी, पर इस दमन चक्कर नै अंग्रेजी राजे दियां नीअ्रां पुल्लियां करी ओड़ियां । लार्ड वेवल नै सिमला कान्फ्रेंस कीली, सर स्टैफर्ड क्रिप्स अपना मिशन लईऐ आया । लार्ड पैथिक लारैन्स होर कैबनिट मिशन लई आये । पर कुतै नई पुञ्जन होऐ । जिसलै समुद्री फौजा बिच बगावत होई ते तुआईं दा अजाद हिन्द फौज बनी उसलै इंगलैण्ड दे प्राइम मिनिस्टर एटली नै मसूस कीता ज हुए दमन चक्कर चलाइऐ बी हिन्दुस्तानै गी अपने काबू नई रक्खन हुन्दा । लार्ड मौण्ट बैटन आखरी वायसराय बनिए आया ते उसने गान्धी जी दी सरजी दे खिलाफ कांग्रेस दे लीडरें दी मदता कन्ने देसै गी दौं टुगड़ें बिच बण्डी ओड़ैआ । गान्धी जी दी हिन्दू मुस्लिम एकता दी जोत बुझी गई । पर गान्धी जी नै फी बी हिम्मत नई हारी ते अपने हिन्दू मुस्लिम एकता दे प्रचारै बिच लगगे रहे ।

१९४७ बिच जिसलै देस बण्डीआ ते कत्तल लुट्ट मार ते फसादे दी चढ़ीपची उसलै गान्धी जी नै इक्कले नोआखली ते बिहार बिच जाइऐ अमन कैम कीता । जित्थे फौजें कम्म नई कीता उत्थे इक्कले मानुऐ जाइऐ गरमी शान्त कीती । मौण्ट बैटन होरें इसी (One man's force) ग्लाइऐ गान्धी जी गी श्रद्धाञ्जलि दिती ही ।

गान्धी जी अमनै दे देवता हे ।

त्रीया भाग

(साहित्य)

डोगरी लोक गीतें बिच्च नारी चित्रण

बैर ते बीरो

बस्सोआं

तमीज

टपला

घापेमारी

बताल पचीसी

जन्म तिथि

(१९३१)

जन्म तिथि १९३१ १९३१ १९३१ १९३१

१९३१ १९३१

१९३१ १९३१

१९३१ १९३१

१९३१ १९३१

१९३१ १९३१

१९३१ १९३१

डोगरी लोक गीतें बिच नारी चित्रण

डोगरी लोक गीतें बिच नारी चित्रण

डुग्गर देस नेया पशेडा देस ऐ जे इत्थें पुजदे संगीत बी
बुड्डा होई गेआ। धरती नेई अड्डोखोड़ ऐ जे सत्थे मानुएं
गी दिनें दपैरीं ठेडे लगदे न। जदूं परमेसरै फलें दी बंड
कीती, तदूं बी डोगरे देसै गी छड़े गरने, बर ते ककोए गे
थोए। अम्बे दा टपला पता नेई कीआं लग्गी गेआ हा।
गरमी दी बहारा जिसलै ब्रैकड़ां त्रिड़कदियां न ते बट्टे बिच
गणाईं सूंकदियां न, तां ईआं सेई हुन्दा ऐ जे डोगरा देस
बड़ा बदकिस्मत ऐ। गरीबी इन्नी ऐ जे जागतें दे ओठ
फौजें बिच भरती होने परैन्त गै घुलदे न। बचारियां
जनानियां, कुड़ियां, जुआन ते बुड़ियां ठेरियां डंगरें गी गेरदियां

रौन्दियाँ न, ते पानी ढोई ढोई उन्दे तालू बी पुल्ले होई जने
 न । जेड़ा कोई मर्दे बुड़ा जां अधकड़ घर रेई गेआ होऐ,
 ओ वाड़िया बिच अपने जनेह जिरड़े दान्द लेइऐ बट्टे कने
 घोल लाई रखदा ऐ । छप्पड़िएं दा पानी पी पी, ते बाजरे
 दे ढोडे चापी चापी, ते बड्डे 'लै ते संजै' लै पानी ढोई ढोई
 कुसै गी सारे देसै दा जां देसै दी दसा दा बच्चार आई सकदा
 ऐ, बड़ी कठन गल्ल ऐ । इससै करी डोगरी दा साहित्य
 गे बड़ा थोड़ा ऐ । ते जेड़ा थोड़ा मता ऐ, ओदे बिच
 राष्ट्रप्योता नां दी कोई चीज नई लबदी । हन्नै हन्नै राज
 हा । इक राजै दूऐ गी ढाने दा ते मरोड़ने दा जतन गे
 कीता, ते इससै चिक्कड़ लाने लुआने बिच उमरां बीली गेइयां ।
 लामां लगियां तां मौरिएं कोला जागत खुस्सिएं गिलगित
 टोरी ओड़े । भैनें दे आ, ते नमिएं व्यानुएं दे कन्त अगने
 लाई ओड़े । सूंक सुट्टिएं सेई रौने दे सवा बचारी लाड़ी
 करी बी के सगदी ऐ । टब्बरै बिच नू बचारी ते निरी
 गौ गे हुन्दी ऐ । अपने कन्त दे बारे बिच ओदा मुंह गे नई
 खुलदा । सस्सू गी भसां ईआं पुछदी ऐ :—

नू पुच्छे सस्सू गी शपाई किआं रौन्दे न

पहरा दिन्दे टल्ले धोन्दे, सूंक सुट्टो सेई रौन्दे न ।

इने बोलें बिच सस्सू दे माऊ दे कालजे दी पीड़ ते नूएं
दा सोल कालजा जरूर धड़कदा लबदा ऐ । कुतें कुतें नूं
जिगरा करिए सस्सू गी आखी गै ओड़दी ऐ :—

सस्सू जी तेरा धन्न जिगरा
धन्न तेरा कालजा
पुत्तर परदेस गी टोरेआ ओ ।

सस्स जबाब दिन्दी ऐ जे सल्ल ते ओदे ढिड्डा बिच बी
बड़ा ऐ, पर के करां इस ढिड्डे दी मुआन्दरिए उसी परदेस
टोरने उप्पर मजबूर कीता दा ऐ ।

नूएं ओ ! जली जन्दा कालजा
भुजी जन्दा जिगरा
दमै दे लालचै टोरेआ ओ !

धनै दे लालचै उसी लामें उप्पर टोरे दा ऐ । साढ़े
समाजै बिच बी नारी, कुड़ी, भैन, नूं, सस्स ते माऊ दे रूपें
बिच लबदी ऐ । साढ़े लोक-गीतें बिच इन्दियां बक्खो-बक्ख
भांकियां लबदियां न ।

कुड़ी बोई दी प्योकेआ सौहरै घर आन्दी ऐ । पर पिछली
तन्व सैभन गै नेईं ब्रुट्टी जन्दी ब्रुट्टी सगदी गै नेईं । बचारी

घरें दा कम्म-काज करदी ऐ । कम्म बी के न, धार कड्डना,
गोआ पथना, गोडी करना, घा बड्डना । पर ए कम्म करदी
बी ओ आऊ गी नेई बसारदी :—

चम्बे दी ए धारे बिन्द नीठड़ी होयां ।

चम्बे दी ए धारे ।

घा बड्डो करी पुलड़े बनान्दिए गी

हत्थुएं दे छाले दिक्खी दिक्खी करी गान्दिए गी

दिक्खी लै आ

बिन्द नीठड़ी होयां ।

घा बड्डो २ पूले बना करदी ऐ । हत्थें छाले पेई गेदे
न । अत्थरूं बी बगा करदे न । पर जे इस हालती बिच
आ धारा पिछुआं भाती मारिए दिक्खी लै तां उसी बड़ा
सन्दोख होई जाग । ए भैनू आऊ दा नाता गै प्रेम भरोचा
ते नेआ प्यारै कनें प्रसिज्जले दा हुन्दा ऐ जे नाढ़ी उपमा
कुतै नेई थोन्दी ।

कुड़ी बोई जन्दी ऐ । सौहरें घर रेइए फी प्योकै औन्दी
ऐ, तां मा सुखसांद पुछदी ऐ । धी माऊ दी गोदा बिच
मुंह देईए बुआसरदी ऐ :—

जली जाए ओ पहाड़िएं दा देस
 अम्मां जी मैं नेइऊं बस्सना
 गुड्डनूं कदालू दिन्दे, खाने जो कचालू दिन्दे
 दस्सी दिन्दे लम्मे लम्मे खेत
 जली जाए ओ पहाड़िएं दा देस
 अम्मां जी मैं नेइऊं बस्सना
 बिहागा ते हुन्दा नेईं, माए टोकरी चकाई दिन्दे
 पलची जन्दे सिरै दे ए केस
 अम्मां जी मैं नेइऊं बस्सना ।

नमीं नमीं बोई दी गई । ओदी अक्खीं बिच सुरगै दे
 सुखने हे । ओदा मन पता नेईं के लुआरे ले करदा हा ।
 अगों सौरिएं कम्मै गी डाई ओड़ेआ । लम्में लम्में खेतरें बिच
 गोडी करनेईं लाई ओड़ेआ । खाने गी छड़े कचालू गै दित्ते ।
 गोआ ढोई ढोई सिरै दे बाल बी पलची गे ते सिर पुल्ला होई
 गोआ । ए के जीन होआ ? ईआं गै कण्डी बिच बोई दी
 कुड़ी आखदी ऐ :-

बाजरे दी राखी करी
 डंगर डराई करी
 चिड़ियां डुआरी करी

कीयां कीआं कत्तना ।

क्रोह जाई पानी भरी, पत्थरें'च पैर भन्नीं

ढक्किया दा दुख भैने, कुसी जाई दस्सना ।

डोगरी लोक गीतें बिच नारी-चित्रण दियां ईऐ नेइयां
भांक्रियां जरूर थोडन, पर इस चित्तरकारी बिच मता भोला
ते टब्बरै बिच रुज्भा दा रूप गै लबदा ऐ । काम बासना
गी भड़काने आली नंगी चित्तरकारी कुतै टामीं टामीं गै
लब्दी ऐ । साड़े लोक-गीतें बिच मता चित्रण गुण ते सुभा
दा ऐ । नारी गी छड़ा बासना-पूरती दा भांडा नई
बनाएदा ।

इस कबता बिच बुड्डी दादी दी मूरत दिक्खो :—

ऋसिखें मत्तें गूढ़ें सोचें आली सिद्धी-सादी

लाडें प्यारें आली चंगी मुन्नुऐ दी दादी

बीते दे रवाजें रीतें पीढ़िएं दी घास

भुरे-मुरे चेहरे बिच जोन्दा इतिहास ।

मुन्नुएं दी दादी सरल सुभा दी सिद्धी सादी जनानी ऐ
जेड़ी सिक्खां मत्तां दिन्दी ऐ ते गूढ़ियां गल्लां सोचदी ऐ ।
बजुर्गी दी नशानी ऐ, ते सब्बै पराने रवाज ते रीतां उसी

मुंह जबानी याद न । साढ़े भायें इतिहास नुआड़ी कल्ले दी
बीती गल्ल ऐ । ओ इतिहास दी सामधाम मूरत ऐ ।

इस तस्वीर बिच ऊऐ जनेई गल्ल बी के होई सगदी
ही । इक जुआन इस्त्री दी मूरत दिखो :—

अलहड़ जुआन कम्मे रुज्जे दा सुभा
ममता दी मूरत ऐ ए मुन्नुऐ दी मा
छाती इच दुद्ध ऐ ते अक्खीं बिच चाह
मने इच हिरखै दा सागर अथाह ।

जुआनी बिच अलहड़पना आपूँ गै आई जन्दा ऐ । पर
कम्मे काजै बिच लग्गी रौन्दी ऐ । अक्खीं बिच ममता
छलकदी ऐ ।

कुतै कुतै बजोगन भूरदी लबदी ऐ । कौन्त दूर महीमै
उप्पर गेदा ऐ । न कोई सनेआ न पत्तर । बचारी आखदी
ऐ :—

तेरा मिकी लगदा ई मन्दा ओ गद्दिया
तेरा मिकी लगदा ई मन्दा
ए पटवारी मिकी खत नैऊं लिखी दिन्दा
सौ सौ करनीआं छन्दा ।

बहारा बिच जहूँ सूए पीले काशनी ते गलाबी फुल
खिड़दे न ते डाली २ नमां गै रंग दस्सन लगदी ए तां बजोगत
संभन कूकी उठदी ए :-

तेरे बाज चन्नां बहार सुन्नी सुन्नी रौनी ए
बागें दी बहार दौं दिनें दी परौनी ए
छन्दा तेरे पैरें दा इक बारी आई जा
बहारां परतोई आइयां तुम्मी घर आई जा ।

प्रेम दी पीड़ ईयां संगदी संगदी डोगरी लोक-गीतें बिच
लबदी ए । ए कसक सारें देसैं बिच सारें आस्ते सांभी ए ।
डोगरी नारी दी ए मूरत कुसैं भी देसैं दी कुड़ी, नूँ, लाड़ी दी
मूरत होई सकदी ए । साड़े लोक-गीतें दी सिफत ए जे
इन्दे बिच नग्न-बासना बड़ी गै घट्ट ए । यथार्थ चित्रण दे
नां उप्पर इस्त्री गो बासना-पूरती दा भांडा नई बनाए दा ।
डोगरी लोक-गीतें बिच नारी-चित्रण डोगरें दे सरल सुभा
ते समाज-मर्यादा दा टकोदा नमूना ए ।



बैर ते बीरो

बैर ते बीरो

जुग बदलोआ पर मोइए तुई के थोआ जे उनें गै
खुण्डें ते ग्लाखें गी पलचदी एं । दुखिया दे भाग ! बीरो
मुआलिया बैठी दी अपनी गैला मुण्ड पोंगरदी बैरी गी दिक्खा
करदी ही । दिखदे दिखदे कुण बेला ते बस्त होई गेआ ।
किन्ने कां ओदे कोटै उप्पर आइए बैठे, ते कां कां करी उसी
बभालने दा जतन करी गे । चूं चूं करदियां किन्नियां गे
चिड़ियां बैरी उप्परा बीरो गी ओदे दिला दा हाल पुछदियां
रइयां । पर बीरो जुगें दे पच्चाड़ पता नई के तुप्पे करदी
ही । बीते जुगें दे डूंगे पानिएं बिच चलोबी मारिए, ते
तलोफी तलाफिए कुतै कोई चमकदी सिप्प कढदी, उसी बड़ी

लालसा कन्ने दिखदी पर ओ सिप्प बी सुखने दी मठ्याई
 दे स्वादै आडू अनुभूति कराए बगैर गै छूमन्तर होई जन्दी
 ही । कनेआ हा ओ जमाना ! कुत्थें गए ओ दिन जदूं
 धुप्प बढ़ेपे आडू चिट्टी, ठण्डी ते बेहिस नईं सी हुन्दी
 ओदी सनहरा बिच धनोइ धनोइ बीरो दियां अछी अछी
 खुल्लियां अक्खियां किन्नियां मस्त रौन्दियां हियां । अज्ज
 कुत्थें ओ दुद्धे जनेई चिट्टी चाननी जेदे बिच खेड़दे दिक्खिए
 गासै दियां परियां बीरो उपर चप्प खन्दियां हियां । ठण्डी
 मिठ्ठी बा जानी जानी मश्करियां करदी, बीरो दे दपट्टे
 गी सिरै परा खस्काई ओड़दी ही । अज्ज सबबै गल्लां कुत्थें
 जाई सुत्तियां । इनें सोचें पई दी बीरो बेरी दे बूटे दी
 पौंगर दिक्खा करदी ही । बीरो ईआं पज्जी पौंगरां दिक्खी
 बैठी ही । इन्नें दिनें हमेशां बैर ईआं गै पौंगरदी ही ।

तेरें बरें दी बीरो गी ब्याइए ओदा दुहाजू बर बड्डी
 लामा उप्पर गेआ उठी, ते बीरो दो दिन रफेरें रईए
 प्योकै आई गई ही । ओदे मराजें आखेआ हा—आन्दे होई
 उत्थुआं शैल शैल बडा, सराइयां ते चन्ननहार लई ओड़ ।
 तौले गै परतोने दा जतन करड । कई बारी चिट्टी आई
 “छुटी लेने दी दखास्ति दिती दी ऐ । मनजूर होने दी तक्क

लगी दी ऐ ।” हर चिट्ठी बीरो दी आसा दी तन्दू गी पक्का करदी, ते चिट्ठी आने दे कई दिन पिशुआं तक्कर बीरो उसै मुहाल्लिए बइऐ नमिए बंडे ते सराइए कन्ने सजदी ते चन्ननहार पाइऐ शमाइ शमाइ बौन्दी । ओदिए प्यासिए हीखिए ते मेदे दा ग्वाइ बैरी दा बूटा अदू बी ईआं गे पौंगरदा हा । पर अदू ओदी पौंगरा कन्ने बीरो दा मन बी बौरदा हा । जे कदे उस व्हारा चिट्ठी आई जन्दी तां बीरो दी हीखिए दा बूटा फुल्ली फली बी पौन्दा हा । सनहरी धुप्प बसन्त बछाई ओड़दी, ते चाननी बिच परियां भांकी मारिए दिखदियां पई चन्ननहार पाइऐ बीरो उन्दी रानी कोला मती शैल ते नई लब्बै करदी ।

चिट्ठी आये दे किन्ने गे दिन होई गे हे बीरो दियां ख्याली बडा, सराइयां ते चन्नहार भुसनुसे होई चले दे हे । उसी बड़ी मेद ही जे इनेंगी रंग देने आली कोई खबर तौले गे आंग । पर इस बारी जेड़ी खबर आई ओ की आई ते कैली आई !

बैर पौंगर करदी ही ते हमेशां आडू बीरो मुआली बइऐ उसी दिखै करदी ही । ओदा देर पच्चाड़ आले रस्तै होइऐ बीरो दे अगगे आई खड़ोता । पता नई लगा

जे पहले बीरो दा कालजा कम्बेआ जां उन्नै ढां सुट्टी । पर
 दौनै गल्लें दा अन्त इक्कै होआ । रोन ते पिट्टन । ख्याली
 भुसमुसे बिच छपदियां बडा ते सराइयां, ओदे नक्का दा
 लौड ते बाएं दियां कच्चू दियां दौं चूड़ियां बी लुआई लई
 गइयां । बीरो दियां सनहरी धुप्पां ते चिट्टियां चाननियां
 मिट्टी २ बाऊ दे कनाढ़ चढ़िऐ टुरदियां होइयां ।

इन्नां किश होआ पर बीरो दी मुहालिया बौने दी खो
 नई गई । ओ अज्ज भी उत्थें बइऐ पौंगरदी बैरी गी दिखदी
 पुछा करदी ही—“जुग बदलोई गेआ पर तू ऊऐ नेई रई ।
 मीइऐ तुकी के थोआ ?”



बस्सोआँ

बस्सोआँ

साढ़े कन्तू आली बड्डी भाबी नै मते आरी आखेश्रा
अड़िए बस्सोआं ते मतियां औदियां न पर किश मन नै
नईं खड़ोंदा । थुआड़ी जानू पशानू कोई होए तां खरी
गल्ल ए । में डूरा भरिए चुप्प रई । भाबी दा सुभा पलें
बिच तोले मासे आला ए इस करी बस्सोआं छें महीने कशा
जादा कदें बस्सी नईं । में टालने आस्तै आखी ओड़ेआ
इक स्हेलड़ी आखा ते करदी ही पर ओ शर्त ए लान्दी ऐ,
जे दौ बरे मालक मकान कड्डने दा नां नईं लै तां । भाबी
आखन लगी—“लै, तेरी स्हेली ऐ, तां के डर ऐ । अऊं नईं
कड़दी । तूं सही लै ।

में लुआने दी कीती ही एह चम्बड़ने आली गल्ल बनी ।
जोकी मालक मकानें ते बासीदारें दी नेई गल्ल होई गेईदी
ऐ जे गुरु चेला लालची ते खेडन दाओ दा । किरायादारें
गी मालक मकान कोई न कोई उखलतूनी लाई गै रखदे न ।
ए बिजली मती बालदे न । इन्दे जागत नलका बन्द करिऐ
नई सौन्दे । ए राती डयोडी नई बन्द करदे । ए कराया
मतियां मनौनियां कराइऐ दिन्दे न । इन्दे साक समन्धी मते
आन्दे न, ते इन्हें साढ़ा मकान ठोली मारेआ ऐ । इन्दे
जागत मता रौला पान्दे न । दुआरी दा भित्त ठुल्लेआ,
इन्हें टल्ले धोनेई बहनी बनाई लई । ते होर पता नई
किन्नियां कसूमतां लाइऐ मालक मकान बासीदारें गी रुआंदे
धुआन्दे रौन्दे न । हुन उल्टी बा बगा करदी ऐ । करायेदार
छन्दे मिनतां करिऐ इक बरी आई बड़ी जान ते फी मालक
मकान भायें टक्करां मारिऐ सिर नई भन्ती लै ओ मकान
नई छोड़दे । जोके कनून बी बासीदारें दी मती मदत करदे
न । मालक मकान जो बी आखन करायेदार उसलै भट
मन्नी जन्दे न, ते पेशगी बी दई ओड़दे न । पिछुआं रण्ट
कण्ट्रोल दे दफतर जाइऐ दर्खास्त दिन्दे न । कराया मन
मरजो दा घटाई लैन्दे न । पहलें करायेदार आपूं ते अपनी
लाड़ी गो लइए ओंदा ऐ पिछुआं नुआड़ा आ, बब, तातो

उन्दे कन्ने भरभाई, माई ते ताई होर बी आनिए डेरे लाई
 'लैन्दीआं न । निक्के-शुक्के ते कन्ने होने गै होए । जेकर
 मालक मकान कुसकेआ ते हत्थे बी सिज्जने दियां गल्लां
 मतियां सुनचोंदियां रौन्दियां न ।

इस करी अऊं नेए रफड़ बिच औंदी नईं पर बड़ी
 भाबी खैड़ा बी छोड़े । “अड़िए ! आखी भेज अपनी
 स्हेलड़ी गो, आई जा ।”

में टालने आस्ते स्हेलड़ी दा नां लेइए शर्त लाई ही
 पर भाबी किश लोड़मन्द ही मन्ती के गई पिछें गै पई
 गई । चेचा इक स्हेलड़ी बनाई तो भाबी दी बस्सोआं बसाई ।
 खबरें हुन ए भाबी दी लोड़मन्दी हो जां स्हेलड़ी दा मेलमलाप,
 जे भाबी ते स्हेलड़ी खण्डखोर होई गइयां । बड़ा समोध,
 बड़ा भाईचारा, ते शण्ड गुआंडा दियां जनानियां दंद टुक्किए
 आखन “रौंगली ते बड़ी ए पर धुलदी पता नईं कहुं ए ?
 चबात मिकी बी लगा, पर दौनें दा कम्म चली गै निकलेआ ।
 हां, असें गी नमीं स्हेलड़ी दा नन्द औन लगा । साड़े घरा
 अखवारें ते रसालें दे बड़े शकीन न । शकीन कैदे बड़े भारे
 शर्धालू ते भगत । किताब पढ़नी होए तां ओबी अपनी
 खरीदिए । में किन्ने बारी आखेआ-ए लाईव्रेरियां कैदे गितें
 बनी दियां न, पर ओ आखन लगी पौन्दे न-तुस टल्ला कुसै

दा मंगिए नईं लान्दे, गहना कुसै दा मंगिए नईं पान्दे, बिस्तरा कुसै दा मंगिए नईं बछान्दे, ते अखबार ते किताब गै कुसै दी मंगिए की पढ़नी होई । ते जेकर सारें गै ईश्रां किताबां अखबारां मंगिए पढ़ना शुरू करी ओड़न तां साहित्य दी उन्नति कीश्रां होनी ऐं । बाहरले आजाद देसैं बिच सारे लोक अपनी २ कताब ते अखबार लैन्दे न । गुआंड़िए दिऐं उपर गजारा नईं करदे । साढ़ी आपूं बिच खुड़बो खुड़बो लग्गी गै रौन्दी ऐ ।

हुन के होन लगा जे उनें सरिता आन्दी, ते स्तेलड़ी दी कुड़ी शीलो आई जन्दी, ताई जी ! तातो होरें नमी सरिता आन्दी ऐ ? में सरिता दइ ओड़ी ।

ओ मिकी पुछदे 'अड़िए सरिता आन्दी ही । में आखी ओड़ां-आपूं पढ़ा करनीश्रां । त्रिये रोज शीलो ने सरिता परताई ते उप्परली मूरत गै नईं । में पुच्छेआ शीलो-मूरत की पाड़ी ? अपने आऊ दा नां लइऐ आखन लग्गी-दीनू गो परसिन्द आई गई ते उनै मढ़ाइऐ अपने सरैनें लाई लेई ।

अखबार मसां गै पुजदी ते शीलो आई जन्दी 'ताई जी' बाबू होर आखदे न अखबार आई ऐ ते देओ हां, आखदे न हुन भेजी ओड़नेश्रां ।

जिसलै ओ आनिए अखबारा आसेआ पुछदे न उसलै
सिद्धान्तै ते दुनियांदारी दा खरा महांभारत होई जन्दा ऐ ।

असैं बड़े चायें २ फुल्लें दे बूटे लाये । गमले आनियैं ।
स्हेली दे घरा आलें अपने कुसैं अफसरा गी चा आखी ।
शीलो आनिए गमले चुकी लई गई । दूए रोज गमले सत्तें
चा त्रै साबते पुज्जे ते शीलो दी मा आखन लगी—ए लोक
बी गवां रखी ओड़दे न । पर घर बन्निए नई रखदे ।
लूर लूर फिरदिआं ते लोकें दे नसकान करदियां न । कल
नेई कवैस्ती गौ आई बड़ी, जे फुल्ल त्रूडी गई ते गमले
भन्नी त्रोड़ी गई । बावू होर बड़ा बसोस करा करदे हे ।

मिकी नौकरी जाने दी तौल रौन्दी ऐ । निक्के शुक्के
टल्ले बी हर बारी धोबी कोल कुन भेजदा रवै । में आखेआ
इक बिजली दी प्रैस गै लेई आओ । रोजै दी खचो खच
मुक्कै । प्रैस आई ते शीलो दी मा आखन लगी—

“भैतू ! बिन्दक दस्सेआं । बावू हुन्दी पैण्ट प्रैस करिए
हुन्तै पजाई जन्नियां । प्रैसै दा महूर्त शीलो दी माऊ नै कीता ।

दूए दिन प्रैस बापस नोआई तां प्लगै बिच लाने आला
शू गै द्रोड़ खाई गेदा हा । पुच्छेआ ते तां शीलो दी मा, ते
तां शीलो मन्ने । औंदे गै कसूमत लगी गई ।

बरतूनिएं दी गल्ल ते भला चलदी रौन्दी, ते खिञ्जदे खपदे साड़ी गड्डी बी रिढ़दी गै रौन्दी । पर इक नमा कम्म शुरू होआ ते मेरा धीरज बी मिकी जवाब देन लगा । नौकरी दा सजा आओ । रसोई दा बपार खुल्ली जन्दा ऐ । मती तौल भी करो तांमी दौं त्र घण्टे ते लग्गी गै जंवे न । उत्थुआं बेले होइए बिस्तरे बिच बौन गै लगो जे शीलो कापी पिनसल लईए आई जन्दी—“ताई जी, कल मैं प्रस्ताव बोलना ऐ । नई ते भैन जी बड़े निक्खरडन । किश लखाओ । शन्दा । उसले मन आखदा जे हुन कोई गल्ल बी नई करै । इत्थे प्रस्ताव कुन लखा । अजकल जागत कुड़ियां बस कढ़ा गै तुपदे न । अपना दमाग ते खोतरदे नई, दूएं दा सिर खंदे न । बड्डे भ्राऊ गी आख । कुसै कताबे दी नकल मार । जां गुआंडे बिच कोई भैन जी होए तां उत्थें जाई पुज्जे ।

मन मारिए कौड़ा घुट्ट करना पौन्दा ।

किश महीने बिच गै बभोन लगा । जे ए स्हेलड़चारा नई नभान हुन्दा ।

पर परमात्मा ने पता नई किआं साढ़ी दीन पुकार सुती लई । शीलो हुंदी बदली नमें शहर होई गई । जान लगे ते शीलो दी मां गलें लगो । मरो । मिकी बी बड़ा मन्दा लगन लगा ।



तमीज

“चल बच्चुआ । अज्ज शैल भूरत ऐ । तुकी स्कूल पढ़न पाई आवां ।” बुड्डे मास्टर राजा रामे बड़े चा कर्ने अपने पोत्रुऐ गी आखेआ । ए बी लौकी नेई लालसा उन्दे मनै बिच ही जेड़ी अज्ज पूरी होन लगी ही ।

“कोकड़े स्कूला बिच दाखल करागेओ इसी ? बाबा जी” पोत्री शैलो नै पुछेआ ।

तुआईं निक्कू बी बछे आडू नच्चा त्रप्पा करदा हा ।
चाएं चाएं ओ बी अपनी पट्टी ते बस्ता तुप्पन लगा ।

“साड़े कन्नू आले स्कूला दी पढ़ाई शल ऐ, कन्नू उत्थे जेड़ा नमां हैडमास्टर लग्गा ऐ ओ मेरे कोला गै पढ़ेआ दा ऐ ।”

मास्टर हुन्दी ग्लानी बिच अपने पुराने शगिर्द आस्ते मोह ते ममता भरोची दो ही ।

“तां ते निक्कू दा खास ख्याल करडन । तुन्दे कशा पढ़े दे जे होए ।” शीलो बड़े शतूने सुभा दी ही ।

‘आहो बच्चू ।’ मास्टर होरें ऐनक सम्हाली ते बड़े मानां कन्नू आखन लगे—“उस मिकी एडे गै तौले थोड़ा बसारी ओड़ेआ होग । तद्दू नुआड़े बबबै दी हालत माड़ी ही । ए बी पढ़ाई बिच कमजोर हा । अऊं घर सदिए उसी पढ़ांदा हा । कन्नू स्कूला दा मदत करिए उसी चंगे जातकें बिच बौने जोग बनाया हा । एडी तौली कीयां भुल्ली जागा ?”

तां ते अऊं उन्दे कशा गै पढ़ड । ओ बी तुन्दे आड़ू गै चंगे होडन । निक्कू नै सैज सुभा कन्नू आखेआ ते बस्ता चुक्किए बाबे कन्नू चली पेआ । लौके जागते गी पहलो पहल स्कूल जाने दा बड़ा चा हुन्दा ऐ ।

स्कूला दे दफतरै सामनै पुजदे गै निक्कू खड़ोई गेआ ।
बाहर इक चपड़ासी ठूलै उप्पर बेठे दा हा । आसै पासै
इक रोब जन बभोन लगा । बाबे दी चाल थमोई गई ।

“हेडमास्टर होर अन्दर न ?” राजाराम होरें बल्लें
नेऐ पुच्छेआ ।

“आहो जी ” चपड़ासिए बेरुखी कन्नै आखेआ ।

“आखेआ मास्टर राजाराम होर आए दे न ।”

चपड़ासी अन्दर गेआ ते फिरी बाहर आनिऐ आखन
लगा “इत्थें बेंच उप्पर बई जाओ । पन्दरें मिण्टें बाद
मलाटी दा टैम ऐ ।”

दादा पोत्रा बेंच उप्पर बई गे । दादे गी इस नमीं
दुनियां गी दिक्खी दिक्खी चबात लगन लगा ।

“साड़े एलै ते ईआं कदे नईं होआ । कोई बी आई
जन्दा अस सुआड़ा भट मान करदे हे । शहरा दा कोई
मन्ने तन्ने दा आई जा, कोई अपना बड़्ठा बडेरा आई जा
तां मूल गै मता करदे हे ।’ मास्टर होर बैठे दे बीतें जुगें गी
तलोफन लगे । चेता आया—“इक बारी माढ़े प्रेमरी स्कूला
दे मास्टर सीताराम होर आये हे । दूरा दिखदे गै अऊं

उन्दे कोल जाई पुज्जा । सारा स्कूल उनेंगी दस्सेआ । “ए साड़े माइटर होर न ।” सारें कन्ने उन्दी पशान कराई । जिसलै जान लगे तां स्कूला दे दर्वाजे तोड़ी

“चलो जी” चपड़ासी दी ग्लानी कन्ने उन्दा ध्यान भंग होआ । उनें त्रिकू दा हत्थ पगड़ेआ, सिरकी पुट्टी ते अन्दर लंघे । बड़ा रोब दाब हा । बचारे किश घटोन लगे । उनेंगी इआं बभोन लगा जे ओ कोई बड़ा परह करिए आये होन ते अदालती बिच जज्जे सामनै खड़ोते दे होन ।

सनाओ जी के गल्ल ऐ ?

रुक्खा नेआ सुआल सुनिए माइटर राजाराम होरें अपने आपै गी सम्हालेआ ते बोले—“राम राम दीपक जी । तुसें मिकी पशानेआ नई लब्दा ।”

“मिकी पता ऐ ।” दीपक होर किश परसिज्जले । “तुस साड़े माइटर हुन्दे हे । सुनाओ कीआं आए ?”

अज्ज अपने पोत्रुऐ गी दाखल करान आयां । मैं सोचेआ तुस अपने गै घरै देओ

“ओहो । तुस चिरें आये । साड़े कश इन्ने जातक होई गेदे न जे हुन गुंजैश गै नई । होर कोई सेवा दस्सो । खरा राम राम । ओ चपड़ासी, ए चिट्ठियां कागत बड्डे दफतर

दई आ ।” दीपक होरें इक्कै साई अपनी मजबूरी, कम्मं काजें दा रोब, ते माइटर हुन्दी खातर करी ओड़ी ।

राजाराम होर चुप चपीते कमरे चा बाहर उठी आये । उन्दी हालत ठीक उस विद्यार्थी आडू ही जेड़ा साल पर खूब मेहनत करिऐ बलगा करदा होऐ जे ओ अक्बल ओग ते नतीजे इच होई जा फेल ।

में ए कनेए जातक पढ़ाए न ? ए खुञ्ज कुत्थें रई गेदी ऐ इक भुल्ला दा मानू चरस्तें खड़ोइऐ जीआं सोचें पेया दा होऐ, ईआं माइटर राजाराम भलखोए दे सोचन लगे—

“ए ते सुखने इच बी नईं हा सोचेआ, जनेआ पतंख होआ ऐ ।”

निक्कू बाबे दी चुप्पा कशा खिञ्जी पेआ । आखन लगा-
“बाबा मिकी पढ़न नईं पाना ?”

“कुसै दूऐ स्कूल चलनेआं ।” बाबे नें बल्लें नेऐ आखेआ ।

“ए तुन्दे अपने शगिर्दें दा स्कूल ऐ, तुस आखदे हे ।

राजाराम होर चुप ।

“बाबा बोलदे नईं ? निक्कू नें अड़ी कीती ।

“अड़ेआ । तूं कनेऐ फलूस लैने न ?”

“सूऐ ते चित्तर मित्ते ।”

फलूसें दी खुशी बिच जातकै दा ध्यान होर पास होई
गेआ । माइटर होर उसी दूऐ स्कूल लई गे । उऐ नेइआं
गल्लां उत्थें बी करिए मुनिए ते जातकै गी दाखल कराइए
माइटर होर घर परतोई आये ।

चार बरे बीती गे ।

“बाबा जी । अज्ज साड़ स्कूल इन्सपैक्टर साब नै श्रीता
ऐ ।

निक्कू हुन स्याना होई गेदा हा । अज्जे दो खबर श्री
अपने बाबे गी कीआं नई सनान्दा ।

“कुण ऐ इन्सपैक्टर ?

“दीपक चन्द्र बर्मा ।”

“उऐ तुन्दा शगिर्द जिस निक्कू गी दाखल नई हा
कीता ।”

शीलो बड़ी लूत ही । बाबे दा पुराना जखम दखाली
बैठी ।

तां तौली तौली त्यार होई जा, निक्कू । बाबे नै

आखेआ ते बीती गल्ला बिच किश तलोफन लगा ।

जातक स्कूले दी तयारी करन लगे ।

“इन्सपेक्टर साब आवा करदे न । सारे जातक कायदे कन्ने खड़ोई जायो । तरीके कन्ने बवेआ, ते सुआले दे जबाब ठीक ठीक दयो ।” ईऐ नेइयां सिक्खेआं दइऐ हैड-मास्टर होर कोई अद्धे घण्टे परैन्त इन्सपेक्टर साब कन्ने कमरे बिच फी दाखल होए । इन्सपेक्टर साब किश मुच्छें गी मरोड़ी चाड़ा करदे हे । सारे जातक सहमिए खड़ोई गे । पर निक्कू बेठा रेआ ।

ओए निक्कू ! मास्टर कँखी चाड़ी ।

हैडमास्टर सफाई देने मारी भूठ बोलेआ—ए जातक नमां नमां साड़ै स्कूख दाखल होआ ऐ । इसी कायदे तरीके अजे नईं औन्दे ।”

“जातको ! स्कूल आनिए तुसें गी अकल ते तमीज सिक्खनी लोड़चदी ऐ । मास्टर साब कमरे बिच औन तां खड़ोई जाना । जे किश आखन ओ ध्यान कन्ने सुनना, ते जे किश पुच्छन ठीक जबाब देना ।” इन्सपेक्टर साब उपदेश देन लगे ।

“अऊं हर सुआलै दा ठीक जबाब देड ।” निक्कू ते नभक्क खड़ोइऐ आखेआ ।

इन्सपेक्टर साब नुआड़े पास आए । मखौलै कन्नै पुच्छन लगे—

“तेरा नां के ऐ बै ?”

नां ते रमेश कुमार ऐ । पर लाडै कन्नै निक्कू बी आखेदे न ।”

सारे हस्सी पे ।

“तूं बड़ा स्याना एं । पर कमरे बिच माइटर होर ओत तां उन्दा आदर करना लोड़चदा जां नईं ? उट्टिऐ खड़ोई जाना चाहिदा जां नईं ? ए बई रौने आली तमीज तूं कुत्थुआं सिक्खी ?”

“तुन्दे कशा गै, इन्सपेक्टर साब ।

नुआड़े नभक्क होई जबाब देने उप्पर सारें गी चबात लगा । हैडमाइटर गी बड़ा रो चढ़ेआ ते किश आखन गै लगा हा जे इन्सपेक्टर साब ते हसिए पुच्छेआ—

“ओ निक्कू ! ए तमीज सिक्खन तूं माड़े कछ कइ आया हा ?”

अपने बाबे कन्ने जेड़े तुन्दे माइटर न । मिकी ओ तुन्दे स्कूल दाखल करान आये हे तां तुस अपने माइटर हुन्दी इज्जत करने गीतें जीआं आकड़े दे बंठे रे हे ओ मिकी भलेआं चेतें ऐ ।

इन्सपेक्टर साब मरीऐ मिट्टी होई गे, ते भुजा खिरल तुप्पन लगे ।



टपला

(ए सच्ची घटना ऐ । जिन्दे कन्ने ए घटी दी ऐ श्री
श्री हंस राज द्विवेदी होर जीन्दे न ! साम्बै (जिला
जम्मू) रौंदे न । रेडिओ ते लौडस्पीकरें दा कम्म
करदे न । होर किश पुछना होऐ तां उनें
गी चिट्ठी लिखिए पुछी लौ)

टपला

सम्मत 1997 बिक्रमी दी गल्ल ऐ । मेरी दूई घर
आली बमार होई । बड़े लाज कराए पर किश नई बनेआ ।
ओबी चलदी होई । निक्का नेआ जागत ओदी नशानी रई
गेआ । हुन उस समालां जां आपूं गी बड़ा गै कठन समां

आई गेआ । सारा दिन जागते गी लारे लाई रखां ते रातीं इक्कला बइए अथरुं केरदा रवां । दिलें दा गबार कढदा रवां । मेरी सस्सू नै दिक्खेआ जे ए दिनें बुआसरदा नई, जागते गी पत्यान्दा रौन्दा ए, ते रातीं चोरी चोरी रौंदा रौंदां ए । ए बड़ी माड़ी गल्ल ए । ईआं ते ए फामां होई जाग । उनें मिगी भडू दी शरदाई पत्यानी शुरु कीती । मिगी किश नशा नईं होए । भडू दी मात्रा तेज हुन्दी गई । पर मिगी फी बी किश नईं बभोए । किश अमल जन होई गेआ । आपूं गै भड मलनी, त्रामें दे पैसें दी पुट्ट देनी ते उसी तेज करना । कदें कुसं साधू कोल टुरी जाना ।

इक दिन साधू कोल बइए सेर भड मली मली इक शटांक कीती । ते चाढ़ी गेआ । उस दिन बड़ी गै भुक्ख लग्गी । घर आया, रुट्टी नंगी । सस्स आट्टा गुन्ना करदी ही । चिर लग्गी गेआ । में बरफी दी टुगड़ी मुंए बिच पाइए पानी दा घुट्ट पी लैता । ए करने कन्ने मेरी भुख बन्द होई गई । सस्स आखें रुट्टी खा । मिगी भुख नईं ही रेइदी । ओ समझन लग्गी रोए होई गेआ ए । तरले करी करी उन्नै दौं फुलके खलाई गै ओढ़े ।

रातीं मन घिरन लगा । इक तुआड़ होई । पिशुआं पता लगा जे ओ लहुए दी तुआड़ ही । मिगी ईआं बभोए जिआं पिण्डे गो अग जन लग्गी गई ए । में पानी दा घड़ा सिरै उप्पर सुट्टेआ । पर ए तत्ते तवे उप्पर पानी दी फुड ही । दौं त्रै चार घड़े सुट्टे । फी मिगी किश होश नईं रई ।

दिक्खां के जे दो जमदूत आई गए । काला रंग, बड़े लम्मे चौड़े देह, छड़ियां रमालियां बन्नी दियां । उन्हें मिगी फगड़ेआ, ते लई चले । में छड़ा चकोए दा गै बभोआं । इक थार पुज्जे । उत्थें इक हौद बने दा हा । ते मेरी पहली लाड़ी बैठी दी ही । उस नै मिगी सद्देआ । अगों इक बूटे हेठ दूई बी लब्बी । ओ बी सदन लगी । पर जमदूत मिगी छोड़न गै नईं । कईं रिश्तेदार बी लब्बे । इन्ने बिच इक बड़्ठा नेआ मकान आई गेआ । बट्टे दा बड़ा गै बड़्ठा मकान हा । अन्दर गए तां दिखेआ जे बड़ा गै शैल मकान हा । बड़ी चित्तरकारी, शीशे ते लो । इक राजा जन बैठे दा हा । जमदूतें मिगी बाहर छोड़ेआ । आपू अन्दर जाइए सनेआ दित्ता महाराज ! उसी लई आएआं ।

बाज आई पेश करो । ओ मिगी कुसै कोठड़ी आसै लई चले । उत्थें इक बुड़्ठा जनेआ लब्बा । कुरती लाई दी ते

गोडें तोड़ी धोती । पुछन लगा कुसी आन्दा ? जमदूतें मेरे
 आसै सारत कोती । ओ आखन लगा—राजू आखेआ हा ।
 इसी छोड़ी आओ । ओ मिगी लइए परतोए ।

परतोने दा मिगी किश पता नई लगा । मेरे कन्ने
 बिच रोने दियां बाजां औन लगियां । में अक्खीं गुआड़िआं ।
 दिक्खेआ जे घरै आले ते आंड गूआंड किट्टा होए दा हा ।
 बैद होर आखा करदे हे—भगवान नै दूआ जनम गै दित्ता
 समझो ।

मिगी बल्लें बल्लें सुरत फिरी । कोई दौं घण्टे पिशुआं
 संखै दी लम्मी फूक सुनोची । रौला पेआ राजू शाह हुन्दा
 काल होई गेआ । अऊं सोचन लगा जमदूतें गी बी भला
 टपला लगंगा ।



घापे मारी

(१)

घापे मारना इक कला ऐ । एदी बड़ी सिफत ए ऐ
जे एदे बिच मते जनें रले दे हुन्दे न । ओनेए प्लेच
पान्दे न ते गल्लें बिच गल्लां लान्दे न, जे दूए गी सिर नई
होन दिन्दे ।

जालम सिंह होर डयोडी अफसर हे । महाराजा प्रताप
सिंह होरें गी दान पुन्नं दी स्लाह ते ओदा बन्दोबस्त ईऐ
करदे हे । महाराज होर मन्दर जान, जां बा-खोरी आस्त

निकलन, जालम सिंह होर ते किश डूरा भरने आले कन्ने हुन्दे हे ।

इक दिन कास्ती ही, महाराज रघुनाथ मन्दर गए । प्रदक्खना बिच इक महात्मा होर बैठे दे हे । महाराज गी महात्मा दे तप करने दी कनसो लग्गी दी ही । गल्लें लग्गी पे । फी आखन लगे—हुन तुसें जग्ग करना होग । सौ रपेआ साड़ा पाई लैओ । जालम सिंह जी ! “महात्मा होरें गी सौ रपेया दर्ई ओड़ो ।” “सत्त बचन महाराज ।” जालम सिंह होर धीनगी कन्ने बोले । अपने मुनशी गी सारत कीती ते आपूं फी महाराज हुन्दे कन्ने जाई मिले । मुनशी नै महात्मा गी इक रपेआ दित्ता । महात्मा बड़ा तभ्शेआ । आखन लगा—“ठहर बच्चा ! अभी बताता हूं । महाराज ने एक सौ रुपया कहा । तू एक रुपया देता है । तुमनै अपने घर से देना है ।”

मुनशी होरें ईऐ नइआं लक्खां सुनी दियां हिआं । ओबी अन्दर गे उठी । जेलें महाराज अन्दरा बाहर निकले जालम सिंह हुन्दे घापेमार साथी उन्दे अगें पिच्छें होई गे । महात्मा गी कोल पुज्जने दा मौका गे नई देन । महात्मा दूरा दा गे बां उच्ची करिए इक रपेआ दस्सन लगा । महाराज दी

नजर तुआईं पई । पुच्छन लगे—“महात्मा के आखा करदा ऐ ?”

डूरा भरने आलें बिचा इक बोलेआ महाराज, आखा करदा ऐ इक रपेआ खुट्टा आई गेआ ऐ ।

नढ़ीनमे ते ठीक न इक खुट्टा आई गेआ ।

तां के होआ । ए आखिए महाराज होरें अगड़ी गें देई ओड़ी ।

महात्मा होर बां गै खड़ी करदे रए ।

(२)

आखदे न महाराजा प्रताप सिंह हुन्दे बेलें डयोडी अफसर बनना कुसै बरदानै कोला घट्ट गल्ल नईं ही । इक बेरी ए भूटा कश्मीरचन्द होरें गी बी आया । लोक सनान्दे न जे उन्नै बड़े घापे मारे ते अपना घर भरेआ । घापे मारन लगे ते फी रानिएं दे मोख होन जां राजें दे सराध, कोई बकशीश होऐ जां अन्तदान, रपे बिच बारां आने कश्मीर चन्द हुन्दे ते चार आने रोई पिट्टिए दान लैने आले गी थोदे हे । इक दिन उन्हें मसां परोहत गी आखेआ-आओ, परोहत जी, तुसैं गी गौ दुआचैं । परोहत होर पसोए दे डयोडी

पुज्जे । महाराज नै गौ मनसी । गौ के ही कामधेन गै
ही । लौके लौके सिङ, मुट्टे मुट्टे थन, एडा पल्ला, ते
पिच्छे बड़ी गै शैल गोरी बच्छी । इक गोला गड़बी, धोती,
परणां ते दस रपे । परोहत हुन्दी कमीजा दा बटन त्रुटन
लगे । ओ अजे मंडिआ दा दर्वाजा बी नईं हे टप्पे, जे
कश्मीर चंद हुन्दे भीरै, परोहतै गी ग्लाय़ा--अफसर होर आखा
करदे न "गौ ते ए सारा किश साड़ै घर लई चलो ।

परोहतै दी अद्धी खुशी उत्थै गै मुक्की गई । कश्मीरचंद
हुन्दे घर जाइए गौ बन्नी ओड़ी ते बलगन लगा । इन्नै
बिच कश्मीरचंद होर आई पुज्जे ते फर्मान लगे—ए गौ
ते सब किश थोड़ू पणतै गी दुआना हा । ओ साड़ै बडेरे
दी सल सुट्टन गंगा जी गेदा ऐ । तुसै गी बी कदै दुआगे ।
तुस ए सीधा लइ जाओ । ए आखिए पज सुच्चियां ते चार
पैसे नगद परोहतै गी देन लगे ।

परोहतै दे टिड्डै दियां आन्दरां जली उट्टियां । उन्नै
आखेआ—"महाराज ए सुच्चियां इत्थै गै रौन देओ । जातकै

गी न्हारी होई जाग । ते चौं पैसैं दा तमाकू नुआइऐ तुस
चिल्म छिक्की लैओ ।”

कश्मीरचन्द होरें गी बट्ट ते मता आया, पर बड़े धीरजें
आले हे, पो गए ।



बताल पचीसी

(सोमदेव रचित बेताल पंचविशति के, लेखक द्वारा
डोगरी अनुवाद से उद्धृत आमुख खण्ड)

बताल पचीसी

गदाबरी नदी दे कण्डै प्रतिष्ठान नां दा इक थार हा ।
पलोके समें बिच उत्थें त्रिविक्रमसेन नां दा इक बड़ा मन्ने
परमन्ने दा राजा हुन्दा हा । ओ विक्रमसेन दा पुत्तर हा ।
ताकती बिच ओ इन्दरें दी बरोबरी करदा हा । रोज उन्दा
दरबार लगदा हा । के होऐ जे इक साधू क्षान्तिशील रोज

दरबारै बिच आवै, सीलबचन आखै, ते राजे कोल खड़ोते दे
अफसरै गी इक फल नवेद दई ओड़ै । इआं करदे दस बरे
बीती गे । इक दिन के होआ जे ताईं साधू फल नवेद दइऐ
गेआ, तुआईं राजे दा इक पालतू टोलो अपने राखें कोला
छुड़किए दरबारै बिच आई बड़ेआ । राजे ओ फल उसी
दई ओड़ैआ । बान्दरै फल खादा तां नुआड़े बिचा इक बड़ा
कीमती हीरा पुजा पेई गेआ ।

राजे ए दिखिए ओह हीरा चुक्की लैता ते खजाने दे
अफसरै गी पुछेआ—अड़ेया ! जेड़ा फल साधू रोज नवेद
दई जन्दा ऐ, ते अऊं तुगी दई ओड़नां ओ फल कुत्थें छोड़े
दे न ? ए सुनिए अफसर किश डरेआ ते आखन लगा—
महाराज ओ फल दुआरी कशा खजाने बिच सुट्टी ओड़दा
रेआं । सरकार हुकम करन तां खजाना खोलिए दिक्खां ।
राजे दी आज्ञा लइऐ ओ गेआ ते तौला गे परतोई आघा ।
आखन लगा—ओ फल ते सारे सड़ी गेदे न । पर उत्थें हीरें
दा ढेर लगा दा ऐ, ते ओ लोई आड़ू लिस्का करदे न ।

राजा ए सुनिए बड़ा खुश होआ ते सारे हीरे उससै अफसरै
गी नाम दई ओड़े ।

दूऐ रोज जिसलै साधू आया तां राजा आखन लगा—
महात्मा जी, तुस मेरी भेटा आस्तै रोज इन्ना धन की खर्च
करदेओ ? अज्ज जिन्ना चिर तुस मिगी गल्ल नईं दसगेओ
मैं फल भेटा नईं लैनीं । राजे दी ए गल्ल सुनिए साधू नै
राजे गी बक्खरे गलाया—मैं इक मन्तर सिद्ध करना ऐ । इस
कम्मै बिच इक बहादर आदमी दी मदत लोड़चदी ऐ । तुस
बड़े बीर ओ, मेरी मदत करो । राजे आखेआ 'खरा' ते
सहायता दा बचन दित्ता । साधू बड़ा खुश होआ । आखन
लगा—“अऊं इत्थे मसान घाट रौनां । तुस ओन्दे न्हेरे पक्खे
बिच मिगी उत्थें बड़े हेठ मिलेओ । अऊं मस्या गी दिन
घरोन्दे तुसैं गी उत्थें बलगड । राजे पक्की हामी भरी ते
क्षान्तिशील साधू बड़ा पसोएदा अपने आखमै गी परतोई
गेआ ।

न्हेरा पक्ख शुरू होआ, ते जइं मस्या दी रात आई
राजे गी साधू दी गल्ल ते उसी दित्ता दा बचन चेतै आया ।
सिरै उपर काला मनासा बन्नेआ हत्थै बिच तलवार फगड़ी,
महलै बिच कुसै गी किश नईं दस्सेआ, ते नभक्क होइऐ

मुड़दे गी लई आओ । तुस बीर ओ । इस कम्मै बिच मेरी मदत करो करो ।

राजा शूरवीर हा, बचनै दा बद्धा हा आखन लगा--
 "अऊं ए कम्म जरूर करड ।" ओ दक्खनै आसै चली पेआ ।
 बलदिएं चिखें दी लोई बिच उस बक्खी जन्दे ते रस्ता तलोफदे
 राजे गी ओ टाली दा बूटा मस्यां लब्बा । चिखें दे धूएं
 कन्नै ओ बूटा भडोई गेदा हा ते नुआढ़े बिचा कच्चे मासै
 दी दरकन्न आवा करदी ही । ओ भूत जन खड़ोता दा
 सेई हुन्दा हा । ओदे डाले उप्पर इक मुड़दा टंगोएदा ईआं
 लबदा हा जीआं कुसै राकशै नै मूण्डै उप्पर चुक्केदा होए ।
 राजा बूटे उप्पर चढ़ेआ ते जिस रस्सी कन्नै ओ मुड़दा
 टंगोए दा हा ओ रस्सी बड्डी ओड़ी । ते उसी भुजां सुट्टेआ ।
 जीआं ओ पुंजां पेआ ओ पीड़ा कनें करलाया । राजे
 समभेआ खबरै ए जीन्दा ई । ते हेठ आनिए हमदर्दी कन्नै
 मलेआ ते चिक्केआ । ईआं करने उप्पर मुड़दे नै राकशै
 आडू गड़ाका सुट्टेआ । राजा समभी गेआ जे नाढ़े बिच
 बताल प्रवेश ऐ । उसनै नभक्क होई पुच्छेआ-- हस्सना की

भई ? “आ किट्टे चलचै ।” दिखदा के जे मुड़दा जेदे बिच बताल प्रवेश हा, फी बूटे उप्पर जाई टंगोआ । राजा फी चढ़ेआ ते उसी भुजा तुआरेआ । बहादरें दा दिल हीरे कोला बी सख्त हुन्दा ऐ ते उत्थें कोई भै नई संजरी सकदा । राजे त्रिविक्रमसेन नै उस मुड़दे गी मूंडे उप्पर सुट्टेआ ते चुप चपोते चली पेआ । उस मुड़दे बिच जिस बताल ने प्रवेश कीता दा हा ओ राजे गी आखन लगा--

“राजा जी ! अऊं तुसैं गी कथ सनानां जेदे कन्ने तुन्दी बत्त कटोई जाग ते पैण्डा नई बभोग । ध्यान लाई सुनेओ ।”
